

# Números

*Nopa ceno catli israelitame quichijque ipan Sinaí*

<sup>1</sup> TOTECO quicamanalhui Moisés ipan nopa huactoc tlali Sinaí ipan nopa yoyon tiopamitl campa mopantiyayaj. Quicamanalhui ipan 15 itequi nopa ompa metztlí ipan nopa israelita calendario [1:1 Quemantic huetzis ni tonal ipan abril huan quemantic ipan mayo ipan tocalendario tlen ama.] quema ya panotoya se xihuitl huan se metztli para nopa israelitame quistoyaj tlen tlali Egipto. Huan ya ni catli TOTECO quiilhui:

<sup>2-3</sup> —Monequi ta ihuaya Aarón xijtlananaca se censo tlen nochí israelita tlacame catli quiaxititoque 20 xihuitl para huejcapa huan catli hueli tlahuilanatij. Xiquijcuiloca sese itoca, huan itoca itata, huan itoca ihuejcapan tata, huan xiquinpoahuaca quesqui itztoque. Huan quema ya anquinpojtose nochí, xiquintecpanaca ipan huejhueyi pamitl quen soldados para tlahuilanase. <sup>4</sup> Nojquiya anmechpalehuis se iteipan ixhui nochí nopa 12 huejcapan tatame catli huejcayja itztoyaj. Sesen motlapalehuijca elis catli más tlayacana ipan iteiximatcahua ipan ihueyi familia. <sup>5-15</sup> Ya ni intoca nopa tlayacanani catli anmechpalehuis tlen sesen hueyi familia:

Familia, Tlayacanquetl  
 Rubén, Elisur, icone Sedeur  
 Simeón, Selumiel, icone Zurisadai

Judá, Naasón, icone Aminadab  
 Isacar, Natanael, icone Zuar  
 Zabulón, Eliab, icone Helón  
 Efraín, icone José, Elisama, icone Amiud  
 Manasés, icone José, Gamaliel, icone Pedasur  
 Benjamín, Abidán, icone Gedeoni  
 Dan, Ahiezer, icone Amisadai  
 Aser, Pagiél, icone Ocrán  
 Gad, Eliasaf, icone Deuel  
 Neftalí, Ahira, icone Enán

**16** Ya ni elque inintoca nopa tlayacanani catli tlapejpenilme para tlayacanase ipan sesen hueyi familia.

**17** Huan Moisés huan Aarón ininhuaya ni tlayacanani catli TOTECO quintocaxtlalijtoya, **18** quinnotzque nochí israelitame ma mosentilica ipan nopa tonal quema TOTECO quicamanalhui Moisés. Huan pejque quinijcuiloahuaj nochí tlacame catli ya quiaxitijtoyaj 20 xihuitl ica huejcapa. Huan sesen quiijcuilojque ajqueya eliyaya ihuejcapan tata huan ajqueya itata. Moijcuilojque sesentzitzti. **19** Huajca nopona ipan nopa huactoc tlali catli itoca Sinaí quinpojque nochí ni tlacame quen TOTECO quinahuatijtoya Moisés.

**20-43** Huan quema Moisés, Aarón huan nopa 12 tlayacanani tlen israelitame ya tlantoya inintequi, ya ni quesqui tlacame quipojque catli quipixque 20 xihuitl para huejcapa catli huelque yohuij tlahuilanatiij:

Familia, Quesqui  
 Rubén, iachtihi ejca Israel, 46,500

Simeón, 59,300  
 Gad, 45,650  
 Judá, 74,600  
 Isacar, 54,400  
 Zabulón, 57,400  
 Efraín, icone José, 40,500  
 Manasés, icone José, 32,200  
 Benjamín, 35,400  
 Dan, 62,700  
 Aser, 41,500  
 Neftalí, 53,400

**44** Huajca ya ni techilhui catli quipantijque Moisés huan Aarón huan nopa 12 tlayacanani catli tlayacanayayaj ipan sese ifamilia tlen iteipan ixhuihua Israel. **45** Quinpojque nopa israelita tlacame catli quiaxitijtoyaj 20 xihuitl ica huejcapa huan catli huelque yohuij para tlahuilanatij. **46** Huan quipantijque para ica nochí itztoyaj 603 mil 550 tlaca israelitame catli huelque tlahuilanatij.

### *Amo quinpojque nopa levitame*

**47** Pero amo quinpojtoyaj tlacame ipan nopa hueyi familia tlen iteipan ixhuihua Leví, **48** pampa TOTECO quiilhuijtoya Moisés: **49** “Quema tijtlananas se censo tlen nochí israelitame catli hueli tlahuilanatij, amo xiquinpohua nopa levitame, injuanti catli hualajque ipan nopa huejcapan tata Leví. Amo xiquintlali san sejco ihuaya ne sequinoc israelitame. **50** Pero xiquintequivimaca nochí levita tlacame ma quimocuitlahuica noyoyon tiopa catli quipiya nopa caxa, huan nochí catli eltoc ipani, huan nochí llamantzitzí catli nopona calijtic quitequihuíaj. Quema anyase

hasta seyoc lado, elis levitame inintequi para quihuicase nopa yoyon tiopamitl campa na nimocahua amohuaya huan nojquiya quihuicase nochí catli quipiyaj. Nojquiya levitame ma qui-quetzaca ininyoyoncalhua nechca nochaj para ma quiyahualoca. <sup>51</sup> Huan quema monequi qui-huicase nopa yoyon tiopamitl, inijuanti catli quic-ocopitzase. Huan quema anajsise campa anqui-quetzase amoyoyoncalhua, inijuanti catli sempa quicualchijchihuase nopa Tiopamitl quen eltoya. Pero sintla se tlacatl catli amo se iteipan ixhui Leví quinechcahuis nopa yoyon tiopamitl campa na nimocahua amohuaya, monequi anquimictise. <sup>52</sup> Huan monequi nochí masehualme ipan sesen hueyi familia tlen israelitame quipiyase campa quiquetzase ininyoyoncalhua san sejco, ica se pamitl nopona campa quintocarohua iteipan ixhuihua ininhueyi familia. Huan sesen huejcapan tata quipiyase ininbandera para quinextis canque mocahua ininpamitl. <sup>53</sup> Pero nochí nopa levitame quiquetzase ininyoyoncalhua yahualtic tlen nopa yoyon tiopamitl campa nimocahua amo-huaya huan catli quipiya catli amohuaya nimocajtoc pampa inintequi levitame quimocuitlahuise nopa tiopamitl. Quimocuitlahuise para aqui hueli masehuali amo huelis monechcahuis huan amo nicualanis ica anisraelitame.”

<sup>54</sup> Huajca nopa israelitame quichijque senquistoc nochí catli TOTECO quinahuati Moisés.

## 2

*Campa sesen hueyi familia quiquetzase ininchaj tlen yoyomitl*

**1** Nojquiya TOTECO quiilhui Moisés huan Aarón ni tlanahuatilme:

**2** “Nochi israelitame monequi quiquetzase ininyoyoncalhua para huejca quiitase nopa yoyon tiopamitl campa timopantíaj. Huan sesen mocahuas nechca ibandera ihuejcapan tata huan mocahuas nechca ihueyi bandera nopa tlahuilanca pamitl catli quitocarohua.

**3-8** “Nopa tlacame tlen nopa huejhueyi familias tlen Judá, Isacar huan Zabulón quiquetzase ininyoyoncalhua huan ininbandera ica campa hualquisa tonati tlen nopa yoyon tiopamitl. Huan nica eltoc inintoca sesen hueyi familia, inintlayacanca huan quesqui tlacame huelque yohuij tlahuilanatij:

Familia, Tlayacanquetl, Quesqui  
 Judá, Naasón, icono Aminadab, 74,600  
 Isacar, Natanael, icono Zuaranca, 54,400  
 Zabulón, Eliab, icono Helón, 57,400

**9** Huajca ipan nopa tlahuilanca pamitl tlen Judá elis tlacame tlen hualahuij ipan ni eyi huejhueyi familias huan san sejco ajsique 186,400 tlacame catli huelque tlahuilanase. Huan ni tlahuilanca pamitl tlayacantiyas quema anisraelitame anquistehuase para anmochihuase ipan seyoc lugar.

**10-15** “Nopa tlacame tlen nopa huejhueyi familias tlen Rubén, Simeón huan Gad quiquetzase ininyoyoncalhua huan ininbandera ica sur tlen nopa yoyon tiopamitl. Huan nica eltoc inintoca sesen hueyi familia, inintlayacanca huan quesqui tlacame huelque yohuij tlahuilanatij:

Familia, Tlayacanquetl, Quesqui  
 Rubén, Elisur, icono Sedeur, 46,500  
 Simeón, Selumiel, icono Zurisadai, 59,300  
 Gad, Eliasaf, icono Reuel, 45,650

**16** Huajca ipan nopa tlahuilanca pamitl Rubén elis tlacame catli hualahuij ipan ni eyi huejhueyi familias huan san sejco ajsique 151,450 tlacame catli huelque tlahuilanase. Huan ni tlahuilanca pamitl motecpanase iica nopa tlahuilanca pamitl Judá quema anquistehuase para anmochihuase ipan seyoc lugar.

**17** “Huan teipa motecpanase nopa levitame catli quihiuicase noyoyon tiopa, niamoTECO quema anquisase para seyoc lado. Huan quisase tlatlajco ipan nochí huejhueyi familias san quen mocahuaj tlatlajco ininyoyoncalhua. Quej nopa quisase campa monequi sesen itzintla ibandera.

**18-23** “Nopa tlacame tlen nopa huejhueyi familias tlen Efraín, Manasés huan Benjamín quiquetzase ininyoyoncalhua huan ininbandera ica campa temo tonati tlen nopa yoyon tiopamitl. Huan nica eltoc inintoca sesen hueyi familia, inintlayacanca huan quesqui tlacame huelque yohuij tlahuilanatij:

Familia, Tlayacanquetl, Quesqui  
 Efraín, Elisama, icono Amiud, 40,500  
 Manasés, Gamaliel, icono Pedasur, 32,200  
 Benjamín, Abidán, icono Gedeoni, 35,400

**24** Huajca ipan nopa tlahuilanca pamitl Efraín elis tlacame catli hualahuij ipan ni eyi huejhueyi familias huan san sejco mochihuase 108,100. Huan ni tlahuilanca pamitl motecpanase iica nopa levitame.

**25-30** “Nopa tlacame tlen nopa huejhueyi familias tlen Dan, Aser huan Neftalí quiquetzase ininyoyoncalhua huan ininbandera ica norte tlen nopa yoyon tiopamitl. Huan nica eltoc inintoca sesen hueyi familia, inintlayacanca huan quesqui tlacame huelque yohuij tlahuilanatij:

Familia, Tlayacanquetl, Quesqui  
 Dan, Ahiezer, icono Amisadai, 62,700  
 Aser, Pagiel, icono Ocrán, 41,500  
 Neftalí, Ahira, icono Enán, 53,400

**31** Huajca ipan nopa tlahuilanca pamitl tlen Dan elis nopa soldados tlen ni eyi huejhueyi familias huan san sejco ajsique 157,600 tlacame catli huelque tlahuilanase. Huan ni tlahuilanca pamitl motecpanase iica ibandera hasta teipa huan nejnemise iica nopa tlahuilanca pamitl Efraín.”

**32** Huajca quema quinpojtoyaj nochí israelita tlacame catli huelque tlahuilanatij ipan nochí huejhueyi familias ajsique 603,550 tlacame.

**33** Pero amo quintlalijque san sejco nopa levitame pampa TOTECO quinahuatijtoya Moisés ma amo quinpojtoyaj ica catli tlahuilanase. **34** Huajca nopa israelitame quichijque nochí senquistoc quen TOTECO quinahuatijtoya Moisés. Huan sesen hueyi familia quiquetzque ininchaj tlen yoyomitl iica ibandera campa quinilhuijtoyaj.

Huan quema quistejque, motecpantiyajque huan nejnenque sesen hueyi familia senquistoc quen TOTECO quinahuatijtoya Moisés.

### 3

#### *Inintequi nopa levitame*

<sup>1</sup> Ya ni techpohuilá tlen iteiximatcahua Moisés huan iicni Aarón ipan nopa tonali quema TOTECO quicamanalhui Moisés ipan nopa tepetl Sinaí.

<sup>2</sup> Inintoca iconehua Aarón eliyaya: Nadab catli achtihui ejquetl, Abiú, Eleazar, huan Itamar.

<sup>3</sup> Nochi inijuanti quinajalti ica aceite huan quiniyocacajqui ma elica totajtzitzi para ma tequitica tiopan calijtic. <sup>4</sup> Pero Nadab huan Abiú mijque iixpa TOTECO nepa ipan nopa huactoc tlali Sinaí pampa amo quitoquilijque icamanal TOTECO huan quitequihuijque se tliltl catli amo tlatzejzeloltic. Huan catli mijque ayamo quinpiyayaya ininconehua, yeca san mocajqui Eleazar huan Itamar para quipalehuise inintata Aarón ipan itequi quen totajtzi ipan inejnemilis.

<sup>5</sup> Huan TOTECO quinojnotzqui Moisés huan quiilhui:

<sup>6</sup> “Xiquinnotza ma hualaca nochí iteipan ixhuihua Leví huan xijchihua para ma monextica iixpa Aarón para quitequipanose. <sup>7</sup> Huan inijuanti quitequipanose Aarón huan quintequipanose nochí israelitame pampa quichihuase miyac piltequitzitzí catli tiquinilhuis ma quichihuaca ipan nopa achtihui cuartos ipan nopa yoyon tiopamitl campa timopantíaj. <sup>8</sup> Quimocuitlahuise nopa cuamesas huan nochí tlamantzitzí catli eltoc

ipan nopa yoyon tiopamitl campa timopantíaj. Huan quichihuase nochi catli nimechnahuatijtoc anisraelitame xichihuaca. <sup>9</sup> Huajca xiquinmaca Aarón huan itelpocahua nochi nopa levitame. Quena, nochi tlacame ipan nopa hueyi familia Leví quinpalehuise. Huan levitame mocahuase iyoca tlen nochi ne sequinoc israelitame para melahuac ma elica iaxcahua Aarón huan iniaxcahua itelpocahua. <sup>10</sup> Pero san Aarón huan itelpocahua xi quintequimaca para ma elica totajtzitzi, huan ne sequinoc levitame, amo. Sintla seyoc catli amo totajtzi quichihuas itequi se totajtzi huan monechcahuis campa más tiopan calijtic, monequi xijmictica.”

*Nochi levitame iaxcahua TOTECO*

<sup>11</sup> Huan sempa TOTECO quinojnotzqui Moisés huan quiilhui:

<sup>12</sup> “Ya nimechilhuijtoc para monequi techmacaca nochi amoachtihui ejcahua, pampa quen nopa nechtocarohua para noaxcahua. Pero para amo monequi antechmacatiyase amoachtihui ejcahua, ininpatlaca ni quiselis nochi levitame para ma elica noaxcahua ininpatlaca nochi sequinoc israelitame, <sup>13</sup> pampa na noaxcahua nochi catli achtihui tlacatij. Quema nijchijqui para ma miquica nochi catli achtihui ehuani tlen nochi tlali Egipto, nimocuili nochi coneme catli achtihui ehuani tlen nochi anisraelitame, huan nojquiya nochi tlapiyalme catli achtihui tlacatise, huan yeca nochi noaxcahua. Na ni amoTECO.”

*Motlananqui se censo tlen nochi levitame*

<sup>14</sup> Huan TOTECO quinojnotzqui Moisés sempa ipan huactoc tlali Sinaí huan quiilhui:

<sup>15</sup> “Xiquinpohua nochí levitame ipan sesen cali, huan iyoca xiquinpohua ajqueyame hualajque ipan sese itelpoca nopa huejcapan tata Leví. Xiquinpohua nochí oquichpilme catli ya quiaxitijque se metztli para huejcapa.” <sup>16</sup> Huan Moisés quinpojqui senquistoc quen quinahuatijtoya TOTECO.

<sup>17</sup> Huan nopa huejcapan tata Leví quinpixqui eyi itelpocahua:

Gersón, Coat huan Merari.

<sup>18</sup> Huan Gersón quinpixqui ome itelpocahua:  
Libni huan Simei.

<sup>19</sup> Huan Coat quinpixqui nahui itelpocahua:  
Amram, Izhar, Hebrón huan Uziel.

<sup>20</sup> Huan Merari quinpixqui ome itelpocahua:  
Mahli huan Musi.

Huajca nica nimitzilhuijtoc ajqueya itztoyaj nopa tlayacanani ipan nopa familias tlen iteipan ixhuihua nopa huejcapan tata Leví huan ama tiquintocaxtía nochí levitame.

### *Iixhuihua Gersón, itelpoca Levi*

<sup>21</sup> Huajca iixhuihua Gersón mochijque ome huejhueyi familias catli quisqui tlen itelpocahua, Libni huan Simei. <sup>22</sup> Huan ama nochí inintlaca ixhuihua catli quipiyayayaj se metztli para huejcapa mochijque 7 mil 500. <sup>23</sup> Huan TOTECO quinnahuati iixhuihua Gersón ma quiquetzaca ininyoyoncalhua nechca nopa yoyon tiopamitl ica campa huetzi tonati. <sup>24</sup> Huan Eliasaf, icono Lael, elqui nopa tlayacanquetl tlen iixhuihua Gersón. <sup>25</sup> Huan inijuanti quipixque inintequi

para quimocuitlahuise nopa tiopamitl huan nochí yoyomitl catli quipixqui. Quimocuitlahuijque itzajca, icortinas, <sup>26</sup> huan nopa icortinas catli mochihua nopa tlatzactli catli quiyahualohua nopa tlaixpamitl huan tiopamitl, huan nopa cortinas catli quicuapilohuaj campa calaquise, huan nochí mecatl catli quitequihuía tiopamitl. Ya nopa eliyaya inintequi iixhuihua Gersón.

### *Iixhuihua Coat itelpoca Leví*

<sup>27</sup> Huan iixhuihua Coat mochijque nopa nahui huejhueyi familias catli quisque tlen itelpocahua, Amram, Izhar, Hebrón huan Uziel. <sup>28</sup> Huan ama nochí inintlaca ixhuihua catli quipiyaj se metztli para huejcpa mochijque 8 mil 600. Huan iixhuihua Coat tequitiyayaj tiopan calijtic. <sup>29</sup> Huan TOTECO quinnahuati iixhuihua Coat ma quiquetzase ininyoyoncalhua nechca tiopamitl ica sur. <sup>30</sup> Huan Elizafán, icono Uziel, elqui nopa tlayacanquetl tlen iixhuihua Coat. <sup>31</sup> Huan inijuanti quipixque tlanahuatili para quimocuitlahuise nopa caxa, nopa cuamesa para pantzi, nopa tlahuil quetzali, nopa tlaixpamitl para copali, nopa tlaixpamitl para Tlacajcahuatlistli Tlatlatili, huan nochí tepostli catli quitequihuija que tiopan calijtic. Nojquiya inintequi para quimocuitlahuise nopa cortina yejyectzi catli quitzajqui campa Tlahuel Tlatzejtzelotic. Nojquiya inintequi para quicualtlalise nochí ni tlamatli sintla monequiyaya se quentzi tequitl. Ya nopa eliyaya inintequi iixhuihua Coat.

<sup>32</sup> Huan Eleazar, icone nopa totajtzi Aarón, eliyaya nopa tlayacanquetl catli más hueyi ipan nochí levitame. Yaya catli quintequimacayaya nopa tlacame catli tlapalehuiyaj tiopan calijtic.

### *Iixhuihua Merari itelpoca Levi*

<sup>33</sup> Huan iixhuihua Merari mochijque nopa ome huejhueyi familias catli quisque tlen itelpocahua Mahli huan Musi. <sup>34</sup> Huan ama nochí inintlaca ixhuihua catli quipiyaj, se metztlí para huejcpa mochijque 6 mil 200. <sup>35</sup> Huan TOTECO quinnahuati quiquetzase ininyoyoncalhua nechca tiopamitl ica norte. Huan Zuriel, icone Abihail, elqui nopa tlayacanquetl tlen iixhuihua Merari. <sup>36</sup> Huan inijuanti quipixque inintequi para quimocuitlahuise nopa huapalme ica catli quichijque caltechtli, nopa cuaitlapalme, nopa tlaquetzalme, huan inintepos cuatetonyo, huan nochí tlamantzitzí catli quitequihuía. <sup>37</sup> Nojquiya quimocuitlahujque nopa tlaquetzalme para nopa calixpamitl catli quiyahualohuayaya nopa tiopamitl ihuaya nopa tepos cuatetomitl para tlaquetzalme, ihuaya iniestacas huan ininmecayohua. Ya nopa elqui inintequi iixhuihua Merari.

<sup>38</sup> Huan TOTECO quinnahuati Moisés, Aarón huan ininconebla ma quiquetzaca ininyoyoncalhua nechca tiopamitl ica campa hualquisa tonati. Huan quipixque inintequi para quinmocuitlahuilise nochí nopa yoyon tiopamitl campa TOTECO mopantiyaya ica nopa israelitame. Huan sintla catli hueli

tlacatl quinechcahuisquía nopa yoyon tiopamitl, monequi quimictise.

<sup>39</sup> Huan nochí nopa levita tlacame catli Moisés huan Aarón quinpojque catli quipiyayaya se metztli para huejcapa ajsique 22 mil oquichpilme huan tlacame.

*Quenicatza quicohuilise TOTECO iniachtihui oquichpil*

<sup>40</sup> Teipa TOTECO quiilhui Moisés:

“Xiquinpohua nochí achtihui ehuani oquichpilme huan tlacame ipan israelitame catli quipiyaj se metztli para huejcapa, huan xiquinijcuilo ica intoca. <sup>41</sup> Nochi levitame elise noaxcahua para nechtequipanose na, niamoTECO. Huan yeca ayacmo nimoaxcatis iniachtihui conehua nochí israelitame. Huan intlapiyalhua levitame nimoaxcatis, huan yeca ayacmo elis noaxca iniachtihui cone sesen sihua tlapiyali catli iniaxca sequinoc israelitame catli amo levitame.”

<sup>42</sup> Huajca Moisés quinpojqui nochí israelitame catli achtihui ehuani catli oquichpilme o tlacame senquistoc quen TOTECO quinahuatijtoya.

<sup>43</sup> Huan nochí oquich israelitame catli quiaxitijtoyaj se metztli quinijcuilojque huan mochijque 22 mil 273 por nochí.

<sup>44</sup> Huan TOTECO quicamanalhui Moisés huan quiilhui:

<sup>45</sup> “Techmaca nochí levitame para nechtequipanose ininpatlaca amooquichpilhua catli achtihui ehuani, huan techmaca intlapiyalhua nopa levitame quen ininpatlaca inioquich tlapiyalhua catli achtihui ehuaj tlen nochí

israelitame. Quena, nochi levitame elise noaxcahua para ma nechtequipanoca na, niamotoTECO. <sup>46</sup> Pero nopa achtihui ehuani oquichpilme huan tlacame tlen nochi israelitame quionpano ica 273 imiyaca nopa oquichpilme huan tlacame catli itztoyaj levitame. Huajca por nopa 273 achtihui ehuani israelitame, amo aqui se oquichpil o tlaca levita para ica nijpatlas huan monequi antechcohuilise. <sup>47</sup> Huajca para sesen nopa 273, monequi techmacaca 5 plata tomi catli quipiya 11 gramos ietica quen nopa tlatamachihuali catli quitequihuíaj ipan tiopamitl. <sup>48</sup> Huan xiquinmactili nopa tomi Aarón ihuaya iconehua para antechcohuilise nopa 273 achtihui ehuani ipan israelitame catli mocajque.”

<sup>49</sup> Huajca Moisés quiseli nopa tomi tlen nopa masehualme quitlaxtlahuiyayaj por nopa achtihui ehuani israelitame catli mocajque. <sup>50</sup> Huan para nochi quiseli 1 mil 365 plata tomi ica ietica quen nopa tlatamachihuali catli quitequihuíjque ipan tiopamitl. <sup>51</sup> Huan teipa Moisés quinmactili Aarón huan itelpocahua nopa tomi senquistoc quen TOTECO quinahuatijtoya.

## 4

### *Inintequi iteipan ixhuihua Coat*

<sup>1</sup> Teipa TOTECO quinnojnotzqui Moisés huan Aarón huan quinlhui:

<sup>2</sup> “Xijtlananaca se censo tlen nochi nopa levitame catli nojquiya itztoque iteipan ixhuihua Coat. Xiquijcuiloca ajqueyame hualajque ipan sesen nopa huejhueyi tetajme catli eliyayaj

itelpocahua nopa huejcapan tata Coat. <sup>3</sup> Ama xiquinpohuaca nochí tlacame catli quipiyaj 30 hasta 50 xihuitl huan catli huelise tequitise ipan nopa yoyon tiopamitl campa timopantíaj.

<sup>4</sup> “Huan ya ni nopa tequitl catli quichihuase iteipan ixhuihua Coat ica nopa tlamatli tlatzeloltic tiapan calijtic. <sup>5</sup> Quema monequi anquijcuinise nopa yoyon tiopamitl para anyase seyoc lugar, Aarón ihuaya iixhuihua calaquare achthui huan quiqxtilise nopa cortina catli quitzacula ipan puerta campa calaquij campa nopa caxa catli quipiya catli amohuaya nimocajqui, ni-amotECO, huan quipajpatlahuase nopa cortina ipan nopa caxa. <sup>6</sup> Huan ipani nopa cortina quiixtzacuase huan quimimilose ica inincuetlaxo pesojme. Huan iixco quipatlahuilise nopa patiyo yoyomitl catli azultic huan sempa quicalaquare nopa cuahuitl huehueyac ipan ianillos para ica quihuicase.

<sup>7</sup> “Teipa ipan nopa cuamesa campa mocahua nopa pantzi monequi xijpajpatlahuase se yoyomitl azultic. Huan ipan nopa yoyomitl quitlalise nochí platome, cucharas, caxime huan nopa tazajme catli quitequihuíaj quema quitoyahua se tlacajcahualistli tlatoyahuali. Huan nojquiya nopa pantzi catli nochipa eltos nopona. <sup>8</sup> Huan iixco nochí nopa tlamatli quipatlahuase nopa patiyo yoyomitl catli chichiltic. Huan teipa quipiquise ica inincuetlaxo pesojme huan teipa sempa quicalaquare nopa cuahuitl huehueyac catli ica quihuicase.

<sup>9</sup> “Teipa quicuisse seyoc nopa patiyo yoyomitl catli azultic huan quipatlahuase ipan nopa tlahuil

quetzali ica itlahuilhua, nopa tepostli para quitzquise tlicoli, iplatos, huan nochí ixarro para aceite catli nopona quitequihuáj. <sup>10</sup> Huan nochí nopa tlamtatl ihuaya nopa tlahuil quetzali quimilose ica inincuetlaxo pesojme. Huan teipa sempa quicalaquise nopa cuahuitl huehueyac para ica quihuicase.

<sup>11</sup> “Teipa quipatlahuase seyoc patiyo yoyomitl azultic ipan nopa tlaixpamitl tlen oro para copali. Teipa quipiquise ica inincuetlaxo pesojme huan sempa quicalaquise nopa huejhueyi cuahuitl para ica quihuicase. <sup>12</sup> Huan nochí tlamtitzitzi catli motequihuátiopan calijtic quisentilise huan quitlalise ipan seyoc patiyo yoyomitl azultic. Teipa quiquirimilose ica inincuetlaxo pesojme huan sempa quicalaquise nopa huehueyac cuahuitl para ica quihuicase.

<sup>13</sup> “Teipa monequi quiqxintse nochí nopa cuanextli tlen nopa tlaixpamitl campa quitlatíaj tlacajcahualistli. Huan ipan quipatlahuase seyoc patiyo yoyomitl morado. <sup>14</sup> Huan iixco quitlalise nochí tlen motequihuá ipan tlaixpamitl. Quitlalise itepos caja campa quitemaj cuanextli, iteposchijcolhua para quiitzquise nacatl, ipalas, huan nopa huajcali para quiselis estli, huan nochí sequinoc teposme catli nopona motequihuáj. Huan teipa quipiquise ica inincuetlaxo pesojme huan sempa quicalaquise nopa huehueyac cuahuitl para ica quihuicase. <sup>15</sup> Huan quema Aarón huan itelpocahua ya tlantose para quipijpiquise nochí nopa tlamtatl catli tlatzejzeloltic catli eltoya tiopan calijtic, huajca quena, hueli quicuiquij iixhuihua Coat

para quihuicase ipan ojtlí hasta campa anajsise. Pero iteipan ixhuihua Coat amo hueli quiitzquise nopa tlamantli tlatzejzeloltic, pampa miquise. Huajca nochí ni tlamantli inintequi iteipan ixhuihua Coat para quihuicase.

*Itequi Eleazar; itelpoca Aarón*

<sup>16</sup> “Huan Eleazar itelpoca nopa totajtzi Aarón quipiyas imaco nopa aceite para tlahuilme, nopa copali catli ajhuiyac mijyotía, nopa tlacajcahualistli tlen harina catli monequi mojmostla, huan nopa aceite catli tlatzejzeloltic para tlaiyocatlalise para na, niamoTECO. Nelía mocahua imaco Eleazar para quimocuitlahuis nochí nopa yoyon tiopamitl campa nimocahua amohuaya ica nochí cuamesas huan tlamantzitzi catli onca tiopan calijtic huan nochí catli mochijtoc nopona.”

<sup>17</sup> Huan TOTECO quinilhui Moisés ihuaya Aarón:

<sup>18</sup> “Amo xijcahuilica para iteipan ixhuihua Coat ma quichihuaca tlamantli tequitl catli amo quipiyaj tlahuatili quichihuase huan quej nopa miquise. <sup>19</sup> Para amo tlantiyase iixhuihua Coat ipan levitame, quej ni anquichihuase. Aarón huan itelpocahua ma itztoca tiopan calijtic inihuaya huan ma quinilhuica sesen iixhuihua Coat catli monequi quichihuase huan catli monequi quihuicase para amo quinechcahuise catli tlatzejzeloltic huan miquise. <sup>20</sup> Huan sintla amo aqui itelpocahua Aarón tiopan calijtic, amo ma calaquica coaititame niyon se tlatoctzi, pampa huelis quiitase se tlamantli catli tlatzejzeloltic, huan sintla quiitase se tlenijqui, miquise.”

*Inintequi iixhuihua Gersón*

**21** Teipa sempa TOTECO quinojnotzqui Moisés huan quiilhui:

**22** “Xijtlanana nojquiya se censo tlen nochí nopa levitame catli iixhuihua Gersón catli itz-toya huecjajya. Xiquicuilo ajqueyame hualajque ipan sesen nopa huejhueyi tetajme catli eliyayaj Gersón itelpocahua huecjajya. **23** Xiquinpoahuaca nochí tlacame catli quipiyaj 30 hasta 50 xihuitl catli huelise calaquise ipan notequi, niamoTECO, ipan nopa yoyon tiopamitl campa timopantíaj.

**24** “Huan ya ni elis inintequi iixhuihua Gersón quema tequipanose tiapan calijtic huan quema quihuicase tlamamali. **25** Quihuicase nopa cortinas ica catli quichijque nopa cuartos ipan tiopa, huan nopa inincuetlaxo pesojme catli ica quitzac-toque, huan nopa cortinas catli ica quitzacuaj campa ancalaquij tiapan calijtic. **26** Nojquiya qui-huicase nopa cortinas ipan nopa tlatzactli iteno calixpamitl, ihuaya nopa cortina catli quitzacuaj campa ancalaquij campa calixpamitl catli quiyahualohua nopa tiopamitl huan nopa tlaix-pamitl. Huan quihuicase nochí mecatl huan teposme catli motequihuíaj ipan nopa cortinas. Huajca inintequi iixhuihua Gersón para qui-huicase ni tlamantzitzi. **27** Huan Aarón ihuaya itelpocahua quinilhuise iixhuihua Gersón sesen tequitl catli monequi quichihuase huan catli qui-huicase. **28** Pero elis Itamar, itelpoca nopa tota-jtzi Aarón, catli achi más quinnahuatis iixhuihua Gersón ipan inintequi.

*Inintequi iixhuihua Merari*

<sup>29</sup> “Xiquinpohua nojquiya nochí levitame catli elij iixhuihua Merari tlen huejcajya ica sese itelpocahua, pampa nochí ome mochijtoque huejhueyi tetajme. <sup>30</sup> Xiquinpohua nochí iniihxuihua catli quipiyaj 30 hasta 50 xihuitl huan hueli calaquise tequipanose tiopan calijitic. <sup>31</sup> Iixhuihua Merari quihuicase nopa tiopamitl ihuapalyohua, icuaitlapalhua, itlaquetzalhua huan itepos cuatetonyo. <sup>32</sup> Nojquiya quihuicase nopa tlaquetzalme ipan calixpamitl huan inintepos cuatetonyo, huan inintepos estacas, huan ininmecayohua huan nochí nopa tlamantzitzí catli quitequihiáj. Huan Itamar monequi quinotzas sesen tlacatl ica itoca huan quilhuis tlaque quihuicas quema anmijcuinise. <sup>33</sup> Huajca ya ni eli inintequi iixhuihua Merari huan monequi quinnahuatis Itamar, icona nopa totajtzi Aarón.”

<sup>34</sup> Huajca Moisés huan Aarón huan nochí nopa tlayacanani tlen nopa israelitame quinpojque iixhuihua Coat. Huan quiniyocatlali ipan nahui familias quen quisque tlen inahui telpocahua Coat huejcajya. <sup>35</sup> Quinpojque catli quipixque 30 hasta 50 xihuitl huan quinijcuilojque para quitequipanose TOTECO ipan nopa yoyon tiopamitl campa timopantíaj. <sup>36</sup> Huan iixhuihua Coat ajsique 2 mil 750. <sup>37</sup> Ya ni elque nochí iixhuihua Coat catli hueliyaya tlapalehuise ipan nopa yoyon tiopamitl. Huan Moisés huan Aarón quinpojque huan quinijcuilojque senquistoc quen TOTECO quinahuatijtoya Moisés.

<sup>38</sup> Huan nojquiya quinpojque iixhuihua Gersón.

Huan quiniyocatlali ipan ome familias quen quisque tlen sese iome telpocahua Gersón huejcajya. <sup>39</sup> Quinpojque catli quipixque 30 hasta 50 xihuitl, <sup>40</sup> huan quinijcuilojque para quitequipanose TOTECO ipan nopa yoyon tiopamitl huan ajsique 2 mil 630. <sup>41</sup> Huajca ya ni elque nochí iixhuihua Gersón catli hueliyaya tlapalehuise ipan nopa yoyon tiopamitl campa timopantíaj. Huan Moisés huan Aarón quinpojque huan quinijcuilojque senquistoc quen TOTECO quinahuatijtoya Moisés.

<sup>42</sup> Huan nojquiya quinpojque iixhuihua Merari. Huan quiniyocatlali ipan ome familias quen quisque ipan sese iome telpocahua Merari huejcajya. <sup>43</sup> Quinpojque catli quipixque 30 hasta 50 xihuitl huan quinijcuilojque para quitequipanose TOTECO ipan nopa yoyon tiopamitl campa timopantíaj. <sup>44</sup> Huan iixhuihua Merari ajsique 3 mil 200. <sup>45</sup> Huajca ya ni elque nochí iixhuihua Merari catli hueliyaya tlapalehuise ipan nopa yoyon tiopamitl. Huan Moisés huan Aarón quinpojque senquistoc quen TOTECO quinahuatijtoya Moisés.

<sup>46</sup> Huan Moisés huan Aarón quichijque se suma tlen nochí levitame catli itztoyaj ipan nopa tonal. Huan quiijcuilojque catli quisque ipan Coat, Gersón huan Merari catli elque ieyi telpocahua Leví catli huejcajya. Huan quiijcuilojque catli quisque tlen sese ininchicueyi telpocahua. <sup>47</sup> Huan nopa tlacame catli quipixque 30 hasta 50 xihuitl huan huelque tlapalehuise ipan tiopamitl huan tlamamase, <sup>48</sup> ajsique 8 mil 580. <sup>49</sup> Huajca ya ni elque nochí iteipan ixhuihua Leví catli

huelque tlapalehuise ipan tiopamitl. Huan senquistoc quen TOTECO quinahuatijtoya Moisés, quinpojque nochí catli quichihuase tequitl o catli quihiuicase tlamantzitzí.

## 5

### *Tlamantli amo tlapajpactli iixpa TOTECO*

<sup>1</sup> Teipa TOTECO quicamanalhui Moisés huan quilhui:

<sup>2</sup> “Xiquinnahuati nochí israelitame para ma quinquixtca tlen ininchajchaj nochí catli palani ininnacayo ica lepra, huan nojquiya catli atemoj ipan inintlacayo ihuaya nochí catli amo tlapajpacme pampa quiitzquijque se mijcatzi. Huan xiquitojtocá huejca tlen amoaltepe tlen yoyoncalme. <sup>3</sup> Xiquinquixtca tlacame huan nojquiya sihuame catli mopantíaj ica ni cocolistli, huan ma yaca itztotij huejca tlen amochajchaj para amo quichihuase amo tlapajpactli campa amoyoyoncalhua pampa nopona tlatlajco amojuanti, nimocahua na catli nitlatzejzelotic.”

<sup>4</sup> Huajca nopa israelitame quineltocaque nochí catli TOTECO quinahuatijtoya Moisés huan quinquixtijque nochí catli quen nopa mococohuayayaj.

### *Tlanahuatilme sintla se quichihua catli amo cuali*

<sup>5</sup> Huan TOTECO quinojnotzqui Moisés huan quilhui:

<sup>6</sup> “Xiquinilhui nochí israelitame para quema se tlacatl o se sihuatl quiixpano seyoc masehuali, na niquijtohua para quihiuica tlajtlacoli noixpa.

<sup>7</sup> Huan monequi nopa tlacatl o nopa sihuatl nech-nelhuis noixpa catli quichijtoc huan teipa yas quitlaxtlahuis ne se catli quichihuilitoc fiero. Huan quicuepilis nochí catli quinenpolojtoc huan nojquiya quimiyaqulis 20 por ciento más huan amo quen quicuitoya. <sup>8</sup> Huan sintla nopa tlacatl catli quitlachtequilijtoya o tlen hueli quichihuilitoya ya mictoc huan amo aqui niyon se iteiximatca para quicuepilis, huajca nopa tomi catli quitlahuiquilia elis para Toteco huan para quitequihuis se totajtzi. Huan nojquiya monequi quimacas nopa totajtzi nopa oquich borrego catli monequi. Huan nopa totajtzi nechtencahuilis para nechixtzacuilis nopa tlajtlacoli catli quichijtoc nopa tlacatl.

<sup>9</sup> “Nochi nemactli catli israelitame nechhualiquilíaj na, niamoTECO, elis iaxca nopa totajtzi. <sup>10</sup> Nochi tlamantli tlacualistli huan tlapalehuili tlen ininmil catli quimacase TOTECO, mocahuas iaxca nopa totajtzi.”

### *Tlanahuatilme para catli mosihuatlasomatij*

<sup>11</sup> Huan TOTECO quinojnotzqui Moisés huan quihilui ma quinmaca israelitame ni tlanahuatilme:

<sup>12</sup> “Sintla isihua se tlacatl quiixpanos ihuehue huan mocahuas ica seyoc tlacatl, <sup>13</sup> pero amo aqui quiitas para huelis quitelhuis ica itlajtlacol, ya ni catli quichihuas. <sup>14</sup> Sintla ihuehue, quena, quitlasomati isihua huan moilhuía para tlajtlacolchijtoc, o huelis ihuehue quitlasomati isihua huan amo tleno quichijtoc, quen ni anquisencahuase. <sup>15</sup> Nopa tlacatl monequi quihuicas isihua iixpa

totajtzi ica se tlacajcahualistli tlen ome kilos harina tlen cebada, huan nechtencahuilis para na, niamotECO. Pero amo quimanelos nopa harina ica aceite, niyon amo quitequilis nopa copali tlaajhuiyacayotl, pampa ya nopa elis se tlacajcahualistli para quimatis catli temachtli sintla moilhuía huelis tlajtlacolchijtoc isihua.

<sup>16</sup> “Huan nopa totajtzi quihualicas nopa sihuatl para ma monechcahui huan moquetzas noixpa, niamotECO. <sup>17</sup> Huan nopa totajtzi quicuis se achi atl catli tlaiyocatlalili para na huan quitlalis ipan se xarro tlen soquitl, huan quimanelos ica se achi tlaltejpoctli tlen tlalchi tlen nopa yoyon tiopamitl campa nimocahua. <sup>18</sup> Huan teipa nopa totajtzi quichihuas para nopa sihuatl ma moquetza noixpa, niamotECO, huan quitojtomas itzoncal. Huan nopa totajtzi quitlalis imaco nopa sihuatl ne tlacajcahualistli tlen harina pampa ihuehue moilhuía tlajtlacolchijtoc. Huan nopa totajtzi moquetzas iixpa nopa sihuatl huan quipixtos imaco nopa xarro ica nopa atl catli chichic huan catli quimaca se tlatelchihuali, o se tlatzacuiltylistli catli tlajtlacolchijtoc. <sup>19</sup> Huajca nopa totajtzi quichihuas para nopa sihuatl ma nechtestigoquetzas, niamotECO, sintla amo tlajtlacolchijtoc. Huan teipa nopa totajtzi quiilhuis: ‘Sintla amo timocajtoc ica seyoc tlacatl quema ya tijpixqui mohuehue, niyon amo tleno catli amo cuali tijchijtoc ica seyoc tlacatl, huajca amo tleno ma mitzpanti quema tiquijis ni atl catli chichic catli quihualica tlatelchihualistli ipan catli tlajtlacolchijtoc. <sup>20</sup> Pero sintla timochijtoc amo titlapajpactli huan titlaixpanotoc quema ya tijpixqui mohuehue huan timocajtoc

ica seyoc tlacatl, <sup>21</sup> huajca TOTECO ma mitztelchi-huas huan ma mitztlatzacuiltis para nochí ma qui-itaca. <sup>22</sup> Huan quema tiquijis ni atl catli chichic, quichihuas ma palanis mometztomahuiya huan ma samahuiya moihti huan amo huelis tiquin-piyas coneme.' Huan nopa sihuatl quiijtos: 'Quej nopa ma eli.'

<sup>23</sup> "Huajca nopa totajtzi quiijcuilos ni tlatelchi-hualistli ipan se cuetlax amatl ica tinta huan teipa quiixpolos nopa tinta huan nopa camanali ica nopa atl catli chichic. <sup>24</sup> Teipa quichihuas para nopa sihuatl ma quiiji nopa atl catli temaca se tlatelchihualistli ipan catli tlajtlacolchijtoc. Huan nopa atl calaquis iijtico huan quichihuas chichic iijtic sintla quipiya tlajtlacoli. <sup>25</sup> Huan teipa nopa totajtzi quiselis tlen imaco nopa sihuatl nopa tlacajcahualistli tlen harina, huan quihuisos iixpa TOTECO huan quihuicas campa tlaixpamitl. <sup>26</sup> Huan quicuis se tlamojtzoli tlen nopa tlacajcahualistli tlen cebada huan quitlatis ipan nopa tlaixpamitl quen eliyaya nochí nopa tlacajcahualistli.

"Huan teipa quema nopa totajtzi quichijtos nochí ni tlamantli, quimacas nopa atl ma quiiji. <sup>27</sup> Huan sintla mochijtoc amo tlapajpactli huan quiixpanotoc ihuehue, nopa atl catli quihualica tlatelchihualistli calaquis iijtico huan quichihuas para isihuayo ma temi huan imetztomahuiya ma palani. Huan nochí imasehualhua quiitase nopa sihuatl para tlatelchihuali. <sup>28</sup> Pero sintla nopa sihuatl amo quipiya tlajtlacoli, amo tleno oncas huan cuali huelis coneipyas.

<sup>29</sup> "Huajca ya ni eli nopa tlanahuatili quema

se quitlasomati isihua pampa mochijtoc amo tlapajpactli huan quiixpanotoc ihuehue quema ya monamictijtoya ihuaya. <sup>30</sup> O ya ni nojquiya para quema se tlacatl moilhuía para quiixpanotoc huan quitlasomati, huan quinequi quimatis catli temachtli. Ihuehue quiixpantis isihua noixpa, niamotECO, huan nopa totajtzi quichihuolis senquistoc quen quiijtohua ni tlanaahuatili. <sup>31</sup> Huan amo elis itlajtlacol ihuehue sintla quiajsis ni tlatelchihualistli, pampa eli ya itlajtlacol. Huan monequi quiijiyohuis nochí tlatzacuítlistli.”

## 6

### *Tlanahuatilme para nazareos*

<sup>1</sup> Huan sempa TOTECO quiilhui Moisés:

<sup>2</sup> “Xiquinilhui nochí israelitame para quema se sihuatl o se tlacatl catli quinequi noca mocahuas, na niamotECO, para elis se nazareo huan moiycatlalis para senquistoc elis noaxca, huan amo quen sequinoc sihuame o tlacame, <sup>3</sup> huajca nopa masehuali amo hueli quiijis xocomeca atl o niyon se tlaili nelcococ. Niyon amo hueli quiijis catli quixocoltijtoque, niyon vinagre catli quichijtoque ica xocomeca atl, o catli cococ. Nojquiya amo huelis quicuas xocomecatl itlajca, niyon itlajca catli ya huactoc. <sup>4</sup> Ipan nochí nopa tonali quema noca mocajtoc para moiycacahuas quen se nazareo, amo tleno quicuas catli huala ipan xocomecatl itlajca, niyon ixinajcho, niyon ipetlayo. <sup>5</sup> Ipan nochí nopa tonali quema moiycacajtoc para na, amo hueli moximas. Yaya elis tlatzejzelotic huan tlaiyocatlalili para na,

niamoTECO, huan quicahuas ma moscalti huehueyac itzoncal hasta ma quitlamiltis nochí nopa tonali huan nopa tlamatli catli nechilhuijtoc. <sup>6</sup> Huan ipan nochí nopa tonali quema moiycatlalijtoc para na, amo hueli monechcahuis campa se mijcatzi, pampa mochihuas amo tlapajpactli noixpa. <sup>7</sup> Masque miquis itata, inana, o se isihuaicni, o se itlacaicni, ma amo monechcahuis para mochihuas amo tlapajpactli pampa moiycatlali para na, niamoTeco Dios, huan quipiyas itzoncal huehueyac catli quiixnextía catli noca mocajtoc. <sup>8</sup> Huan nochí tonali catli huejcahuas catli noca mocajtoc, monequi mocahuas tlatzeloltic noixpa.

<sup>9</sup> “Huan sintla nimantzi san huetzis mictoc se acajya catli moquetza ihuaya, huajca, quena, quichihuilis amo tlapajpactli noixpa, masque amo quinequiyaya mochihuas amo tlapajpactli. Huajca quema ajsis chicome tonali para mochijtoc amo tlapajpactli, quipiya para quitequis nochí itzoncal pampa itzoncal huehueyac quinextiyaya para tlaiyocatlali para na. <sup>10</sup> Huan ipan ne chicueyi tonali, quinhualicas ome pilpichontzitz, o ome pilpalomajtzitz, huan quimacas nopa totajtzi campa ipuerta nopa yoyon tiopamitl campa timopantíaj. <sup>11</sup> Huan nopa totajtzi nechtencahuilis nopa piltototzi quen se tlacajcahualistli por tlajtlacoli, huan ne seyoc nechtencahuilis quen se tlacajcahualistli tlatlatili. Huan ica ya ni nechixtzacuilis tlajtlacol pampa itztoya nechca se mijcatzi. Huan nojquia ipan nopa tonal sempa moiycatlalis noca na, niamoTECO, huan sempa pehuas quicahuas ma moscalti itzoncal. <sup>12</sup> Nopa tonali

catli ya panotoc quema achtihui moiycatlalijtoya noca na, quiixpolo. Sempa monequi motemacas noca na para elis nazareo nochí tonali quen quichijqui achtihui. Huan monequi quihualicas se piloquich borregojtzi catli san quipiya se xihuitl para nechtencahuilis quen se tlacajcahualistli pampa quihuica tlajtlacoli.

**13** “Huan quema ya tlamis nochí nopa tonali catli motemacac para elis nazareo, ya ni nopa tlanahuatili catli sesen monequi quitoquilis. Monequi hualas huan nechhualiquilis se tlacajcahualistli campa ipuerta nopa yoyon tiopamitl.

**14** Nechtencahuilis se piloquich borregojtzi catli san quipiya se xihuitl huan catli amo tleno quipiya huan elis se tlacajcahualistli tlatlatili. Huan nojquiya nechmacas se pilsihua borregojtzi catli san quipiya se xihuitl huan amo tleno quipiya huan nopa elis se tlacajcahualistli por tlajtlacoli. Nojquiya nechtencahuilis se oquich borrego catli amo tleno quipiya huan elis para se tlacajcahualistli para nimoyoltlalis ihuaya.

**15** Nojquiya ihuaya, techmacaca nopa tlacajcahualistli tlen harina huan catli tlatoyahuali catli monequi nechmacase ihuaya. Huan monequi nopa tlacajcahualistli tlen harina elis se chiquihuitl temitoc ica pantzi catli amo quipiya tlasonejcayotl. Quipiyas tortas catli quichijtoque ica cuali harina maneltic ica aceite, huan nojquiya quipiyas pantzi catli cacatztic catli quixacualojoque ica aceite.

**16** “Huan nopa totajtzi quitencahuas nochí ya ni noixpa ihuaya nopa tlacajcahualistli por tlajtlacoli huan nopa tlacajcahualistli tlatlatili catli ne

nazareo quihualicac. <sup>17</sup> Huan nechmacas nopa oquich borrego huan nopa chiquihuitl ica pantzi catli amo quipiya tlasonejcayotl, huan elis se tlacajcahualistli para tlayoltlalili nohuaya. Huan nopa totajtzi nojquiya nechmacas nopa tlacajcahualistli tlen harina huan catli tlatoyahuali catli ihuaya yohui.

<sup>18</sup> “Huan nopona campa ipuerta nopa yoyon tiopamitl campa timopantíaj, nopa nazareo mon-equi quiximas nochi itzoncal catli quinextiyaya catli noca mocajtoya, huan quicuis nochi nopa tzoncali huan quitlalis ipan nopa tlitl catli eltoc itzala nopa tlacajcahualistli para tlayoltlalili nohuaya.

<sup>19</sup> “Huan teipa quema cuali motzoncaltectos ne nazareo, nopa totajtzi quicuis iajcol nopa oquich borrego catli molontoya hasta cuali icsitoc, huan quitlalis imaco ne nazareo ihuaya se pantzi ica tlatzopelcayotl huan se pantzi catli cacatztic catli eltoc ipan nopa chiquihuitl huan catli amo quipiya tlasonejcayotl. <sup>20</sup> Huan teipa nopa totajtzi quicuis huan quihuisos nopa tlacajcahualistli noixpa, niamoTECO, para ma eli se tlacajcahualistli tlahuisoli. Huan nochi nopa tlacajcahualistli mochihuas tlatzejzelotic huan elis iaxca nopa totajtzi, ica nopa pantzi ihuaya ielchiqui huan iajcol nacayo nopa borrego catli tlahuisoli. Huan teipa quema nopa totajtzi tlamic nechtencahuilía nochi noixpa, ya catli eliyaya nazareo huelis quiijis xocomeca atl pampa ya tlanqui catli noca mocajqui, niamoTECO.

<sup>21</sup> “Huajca ya ni elqui nopa tlanahuatili para se nazareo, huan anmechilhuía tlaque

tlacajcahualistli monequi antechtentcahuilise quema se quitlamichihuas catli noca mocajtoc para quichihuas. Nojquiya monequi quihualicas nochí sequinoc tlacajcahualistli catli nechilhui nechmactilis quema moiycatlali huan mochijqui nazareo.”

*Camanali catli ica totajtzitzi tetiochihuase*

<sup>22</sup> Teipa TOTECO quiilhui Moisés:

<sup>23</sup> “Xiquilhui Aarón inihuaya iconehua para ma quintiochihuaca israelitame ica ni camanali. Ma quiijtoca:

<sup>24</sup> ‘Ma TOTECO mitztiochihuua huan ma mitz-mocuitlahui.

<sup>25</sup> Ma cahuani ixayac TOTECO ica paquelistli quema moihuía tlen ta.

Ma quiipyá hueyi iyolo mohuaya.

<sup>26</sup> Ma TOTECO mitznextili itlaicnelijcayo huan ma mitzmaca itlasehuilis ipan moyolo.’

<sup>27</sup> “Ica ni camanali, Aarón huan iconehua nech-notzase ma niquntiochihuua israelitame huan, quena, na niquntiochihuas para nochí quimatise injuanti noaxcahua.”

## 7

*Quitlatzejzelchihuase tlaixpamitl*

<sup>1</sup> Huan ipan nopa tonali quema Moisés quitlamisencajtoya nopa yoyon tiopamitl campa TOTECO mocahuasquía inihuaya, quiatzejzelhui ica aceite sesen tlamatli catli mocajqui calijtic, huan quiyocatlali para TOTECO. Nojquiya quiatzejzelhui ica aceite nopa tlaixpamitl huan nochí catli motequihuía nopona.

<sup>2</sup> Teipa yajque nopa tlayacanca israelitame ipan

sesen hueyi familia catli tlapalehuijtoyaj para quitlananque nopa censo. <sup>3</sup> Huan quitlalitoj iixpa TOTECO nochí catli quinequiyayaj quimactilise. Huan sesen nopa tlayacanani quihualicac se hueyi toro. Huan sese ome tlayacanani quihualicaque se cuacarro. Huajca ica nochí nopa nemactli catli quihualicaque elqui chicuase cuacarros catli tzactoque, huan 12 huejhueyi torojme catli quimatij tlatilanase huan quimacaque TOTECO iteno ipuerta nopa yoyon tiopamitl campa mocahua TOTECO.

<sup>4</sup> Huan TOTECO quiilhui Moisés: <sup>5</sup> “Xiquinselili nopa cuacarros huan nopa huejhueyi torojme catli quimatij tlatilanaj, huan xiquinmaca nopa levitame para ma quintequihuica ipan nochí nopa tequitl catli monequi para quihuicase catli eltoc ipan nopa yoyon tiopamitl campa timopantíaj. Xijmaca sesen levita nopa tlamantzitzí catli monequi quitequihuise ipan itequi catli quitarohua quichihuas.”

<sup>6</sup> Huajca Moisés quinseli nopa cuacarros huan nopa huejhueyi torojme huan quinmajamacac nopa levitame. <sup>7</sup> Iixhuihua Gersón quinmacac ome cuacarros huan nahui huejhueyi torojme para quitequihuise ipan inintequi. <sup>8</sup> Huan iixhuihua Merari quinmacac nahui cuacarros huan chicueyi huejhueyi torojme para quitequihuise ipan inintequi ica imaco Itamar, icone nopa totajtzi Aarón. <sup>9</sup> Pero iixhuihua Coat amo quinmacac niyon se cuacarro huan niyon se toro, pampa monejqui quihuicase iniajcolpa nopa tlamtli tlatzejtzeloltique catli mocajqui ininmaco para quimocuitlahuise.

**10** Huan nojquiya quema ajsic tonal para quiyocatlalise nopa tlaixpamitl para TOTECO huan quitlatzejtzelolchihuase, sesen nopa tlayacanani tlen nochí huejhueyi familias quihuicaque se nemactli huan quitlalijque iixpa nopa tlaixpamitl. **11** Huan TOTECO quiilhui Moisés: “Mojmostla ipan sesen tonal quema anquitlatzejtzelolchihuaj nopa tlaixpamitl, xijcahua san se tlayacanquetl ma nechtemactili catli quihualicac.”

**12** Huajca ipan nopa achtihui tonali, quitemactili inemac Naasón, icone Aminadab, ipan nopa hueyi familia Judá. **13** Huan inemac eliyaya se hueyi plato ixpelentic tlen plata huan ietica eliyaya se kilo huan tlajco, ihuaya se hueyi taza tlen plata ica ietica quen tlajco kilo ipan itlata-machihual nopa yoyon tiopamitl. Huan nopa plato huan nopa hueyi taza quihualicac temitoc ica harina catli achi más cuali maneltic ica aceite para se tlacajcahualistli tlen harina. **14** Nojquiya quihualicac se cuchara catli senquistoc oro ica 110 gramos ietica, huan temitoya ica copali. **15** Huan quihualicac se becerro, se oquich borrego huan se piloquich borregojtzi catli san quipiya se xihuitl para elise se tlacajcahualistli tlatlatili. **16** Nojquiya quihualicac se oquich chivo para se tlacajcahualistli por tlajtlacoli. **17** Huan para se tlacajcahualistli para ma onca tlayoltlalili ihuaya TOTECO, quinhualicac ome huejhueyi torojme catli quimatiij tlatilanaj, macuili oquich borrego-jme, macuili oquich chivojme huan macuili pilo-quich borregojtzitzi catli san quipiyaj se xihuitl. Nochi ya ni elqui nopa nemactli catli Naasón, icone Aminadab, quihualicac.

<sup>18</sup> Ipan ome tonali quihuicac inemac Natanael, iconе Zuar, catli eliyaya tlayacanquetl ipan nopa hueyi familia Isacar. <sup>19-23</sup> Huan inemac catli quitemactili elqui senquistoc san se quen catli temacac Naasón.

<sup>24</sup> Ipan eyi tonali quihuicac se nemactli Eliab, iconе Helón, catli eliyaya tlayacanquetl ipan nopa hueyi familia Zabulón. <sup>25-29</sup> Huan quitemactili inemac catli elqui senquistoc san se quen ne sequinoc.

<sup>30</sup> Ipan nahui tonali quihuicac se nemactli Elisur, iconе Sedeur, catli eliyaya tlayacanquetl ipan nopa hueyi familia Rubén. <sup>31-35</sup> Huan quitemactili nojquiya san se inemac quen ne sequinoc.

<sup>36</sup> Ipan macuili tonali quihuicac se nemactli Selumiel, iconе Zurisadai, catli eliyaya tlayacanquetl ipan nopa hueyi familia Simeón. <sup>37-41</sup> Huan quitemactili nojquiya san se inemac quen ne sequinoc.

<sup>42</sup> Ipan chicuasen tonali quihuicac se nemactli Eliasaf, iconе Reuel, catli eliyaya tlayacanquetl ipan nopa hueyi familia Gad. <sup>43-47</sup> Huan quitemactili nojquiya san se inemac quen ne sequinoc.

<sup>48</sup> Ipan chicome tonali quihuicac se nemactli Elisama, iconе Amiud, catli eliyaya tlayacanquetl ipan nopa hueyi familia Efraín. <sup>49-53</sup> Huan quitemactili nojquiya san se inemac quen ne sequinoc.

<sup>54</sup> Ipan chicueyi tonali quihuicac se nemactli Gamaliel, iconе Pedasur, catli eliyaya tlayacanquetl ipan nopa hueyi familia Manasés. <sup>55-59</sup> Huan

quitemactili nojquiya san se inemac quen ne sequinoc.

<sup>60</sup> Ipan chicnahui tonali quihuicac se nemactli Abidán, icone Gedeoni, catli eliyaya tlayacanquetl ipan nopa hueyi familia Benjamín. <sup>61-65</sup> Huan quitemactili nojquiya san se inemac quen ne sequinoc.

<sup>66</sup> Ipan majtlactli tonali quihuicac se nemactli Ariezer, icone Amisadai, catli eliyaya tlayacanquetl ipan nopa hueyi familia Dan. <sup>67-71</sup> Huan quitemactili nojquiya san se inemac quen ne sequinoc.

<sup>72</sup> Ipan majtlactli huan se tonali quihuicac se nemactli Pagiel, icone Ocrán, catli eliyaya tlayacanquetl ipan nopa hueyi familia Aser. <sup>73-77</sup> Huan quitemactili nojquiya san se inemac quen ne sequinoc.

<sup>78</sup> Ipan majtlactli huan ome tonali quihuicac se nemactli Ahira, icone Enán, catli eliyaya tlayacanquetl ipan nopa hueyi familia Neftalí. <sup>79-83</sup> Huan quitemactili nojquiya san se inemac quen ne sequinoc.

<sup>84</sup> Nochi ya ni elqui nopa nemactli catli nopa tlayacanani tlen israelitame quitemactilijque para quiyyocatlalise nopa tlaixpamitl para TOTECO huan quitlatzejtzelolchihuase. Ica nochi elqui 12 huejhueyi platos catli ixpelentique tlen plata, 12 huajcali tlen plata, huan 12 huejhueyi cucharas tlen oro. <sup>85</sup> Huan sesen plato quipixqui se kilo huan tlajco ietica, huan sesen huajcali tlen plata quipixqui tlajco kilo ietica. Ica nochi nopa tlamantli tlen plata quipixqui nechca 26

kilos ietica ipan itlatamachihual nopa yoyon tiopamitl. <sup>86</sup> Nojquiya oncayaya 12 cucharas tlen oro temitoya ica copali catli quipixqui 110 gramos ietica ipan itlatamachihual nopa yoyon tiopamitl. Nopa oro tlen nochi nopa cucharas quipixqui se kilo huan 320 gramos ietica.

<sup>87</sup> Huan nopa tlapiyalme para tlacajcahualistli tlatlatili elque ica nochi 12 becerros, 12 oquich borregojme, 12 piloquich borregojtzitzi catli san quipiyaj se xihuitl ihuaya nopa 12 tlacajcahualistli tlen harina catli monequiyaya inihuaya, huan 12 oquich chivojme para quinmacase quen tlacajcahualistli por tlajtlacoli. <sup>88</sup> Huan nochi nopa tlapiyalme catli quihualicaque para tlacajcahualistli para tlayoltlalili elqui ica nochi 24 becerros, 60 oquich borregojme, 60 oquich chivojme huan 60 piloquich borregojtzitzi catli san quipixque se xihuitl. Nochi ya ni elqui catli quimac tilijque TOTECO quema quiyyocacahuayayaj huan quitlatzejtzelolchihuayayaj nopa tlaixpamitl para TOTECO.

<sup>89</sup> Huan quema Moisés calajqui ipan nopa yoyon tiopamitl campa mopantiyaya ihuaya Toteco Dios para quicamanalhuis, quicajqui itoscac. Huan caquistic itoscac quisayaya tlen tlatlajco nopa ome tequihuajme catli inintoca querubines catli moquetztoyaj iixco itzajca icaxa. Huajca nopona Toteco Dios quicamanalhui Moisés.

## 8

### *Tlanahuatilme para nochí tlahuilme*

<sup>1</sup> Huan TOTECO quicamanalhui Moisés huan quuilhui:

<sup>2</sup> “Xiquilhui Aarón quema quintlalis nochitlahuilme, ma quichihua para ma tlahui ica iixmelac tlen nopa tlahuil quetzali.”

<sup>3</sup> Huan quichijqui Aarón nochit catli TOTECO quinahuatijtoya Moisés, huan quinsencajqui nochit tlahuilme para ma tlahui ica iixmelac.

<sup>4</sup> Huan nopa tlahuil quetzali quichijchijtoyaj ica senquistoc oro catli quitejtejtzontoyaj san ica martillo. Iicxi hasta iyecapa campa quichihuilijtoyaj ixochiyo, nochit quichijque san ica martillo. Nochi iyejyejca nopa tlahuil quetzali elqui senquistoc quen TOTECO quinextilijtoya Moisés ma quichihua.

*Quiniyocacajqui nochit levitame para TOTECO itequi*

<sup>5</sup> Huan TOTECO quicamanalhui Moisés huan quilhui:

<sup>6</sup> “Xiquinquixti nochit iteipan ixhuihua Leví tlen ne sequinoc israelitame huan xiquintlapajpacchihua noixpa para nechtequipanose. <sup>7</sup> Ya ni catli tijchihuas: xiquinatzelhuis ica atl catli tetlapajpacchihua noixpa. Teipa moximase huan mohutanihaste hasta moquixtilise nochit tzoncali ipan inintlacayo. Teipa maltise, huan cuali quichicuenise ininyoyo, huan quej nopa elise tlapajpacme para nechtequipanose. <sup>8</sup> Teipa ma quihualicaca se becerro huan nopa tlacajcahualistli tlen harina catli ihuaya yohui. Ya nopa elis cuali harina maneltic ica aceite. Huan nojquiya quihuicase seyoc becerro para se tlacajcahualistli por tlajtlacoli. <sup>9</sup> Ta tijchihuas para nopa levitame ma monechcahuica ipuertajteno ni yoyon tiopamitl

campa timopantíaj huan nochi israelitame nojquiya nopona ma mosentilica. <sup>10</sup> Teipa xijchihua para nopa levitame ma moixnextica noixpa huan nopa sequinoc israelitame ma quintlalilica ininmax ipan inintzonteco. <sup>11</sup> Huan Aarón qui-huisos imax noixpa, ni amoTECO, quen nechmaca se tlacajcahualistli tlahuisoli, huan quej nopa nechtemactilis nochi levitame quen se hueyi tlacajcahualistli catli nochi israelitame nechmacajna, ni amoTECO. Huan ica ya nopa quiniyocatlalis nochi levitame para nechtequipanose.

<sup>12</sup> “Teipa nochi levitame quitlalise ininmax ipan inintzonteco nopa becerros. Teipa nechtencahuilise se becerro quen se tlacajcahualistli por tlajtlacoli huan seyoc becerro nechmactilise quen se tlacajcahualistli tlatlatili para na, ni amoTECO, para nechixtzacuilise inintlajtlacolhua nochi levitame. <sup>13</sup> Huan teipa xiquintlali nochi nopa levitame para ma moquetzaca iniixpa Aarón huan itelpocahua, huan nochi techmacas quen se tlacajcahualistli tlahuisoli para na, ni amoTECO. <sup>14</sup> Huan quej ni tiquiniyocatlalis nopa levitame tlen nochi sequinoc israelitame, huan nochi levitame elise noaxcahua. <sup>15</sup> Huan quema ya anquintlapajpacchijtoque nopa levitame huan anquinnextijtoque noixpa quen se tlacajcahualistli tlahuisoli, inijuanti hueli calaquise para nechtequipanose ipan ni yoyon tiopamitl campa timopantíaj.

<sup>16</sup> “Pampa nochi levitame senquistoc noaxcahua huan amo quen sequinoc israelitame, pampa nimocuili nochi levitame ininpatlaca nochi ininconehua israelitame catli achtihiui

ehuani catli monequiyaya nechmactilisquíaj.  
**17** Pampa nelía noaxcahua nochí catli achtihui tlacatij tlen israelitame, masque ininconeuhua o inintlapiyalhua, nochí catli achtihui tlacatij noaxcahua. Pampa huejcajya quema niquinmijmicti nochí coneme catli achtihui ejque ipan tlali Egipto, niquininyocatlali para noaxcahua nochí coneme catli achtihui ehuani tlen israelitame. **18** Pero ama quen ininpatlaca nopa achtihui ehuani tlen nochí israelita coneme, nimoaxcatijtoc nochí levitame para noaxcahua. **19** Huan ama niquinmaca nochí levitame tlen nochí sequinoc israelitame para ma elica se nemactli para Aarón huan itelpocahua para quinpalehuise quichihuase nopa tequitl tlatzejtzelotic ipan ni yoyon tiopamitl campa timopantíaj. Huan nopa levitame tequitise ininpatlaca sequinoc israelitame. Huan nechtencahuilise inintlacajcahuialis nopa sequinoc israelitame para quiixtzacuase inintlajtlacolhua noixpa na, niamotECO. Huan quej ni, catli hueli israelita amo calaquis ipan ni yoyon tiopamitl para tlapalehuis para amo quinajsis israelitame se hueyi cocolistli catli ica miquise.”

**20** Huajca Moisés, Aarón huan nochí israelitame quichijque ica nopa levitame nochí catli TOTECO quinahuatijtoya Moisés ma quichihuaca. **21** Huan nochí levitame motlapajpacchijque huan quichicuenijque ininyoyo, huan Aarón quinpannexti iixpa TOTECO quen se tlacajcahualistli tlahuisoli. Huan Aarón nojquiya quitencajqui iixpa se tlacajcahualistli para

quinixtzacuilis inintlajtlacolhua para ma elica tlapajpacme iixpa. <sup>22</sup> Huajca quema tlanqui nochí ni tlamanatl catli mochijqui, nopa levitame pejque calaquiij para quichihuase nochí inintequi ipan nopa yoyon tiopamitl campa timopantíaj ihuaya TOTECO, huan tequitique inintempa Aarón huan itelpocahua. Huan nochí quichijque senquistoc quen TOTECO quinahuatijtoya Moisés ma quinchihuili nopa levitame.

*Quesqui xihuitl ma tequiti se levita*

<sup>23</sup> TOTECO nojquiya quicamanalhui Moisés huan quiilhui:

<sup>24</sup> “Nochi levitame quema quiaxitijtose 25 xihuitl, monequi quipehualtise para nechtequipanose ipan ni yoyon tiopamitl campa timopantíaj. <sup>25</sup> Huan quisase ipan nopa tequitl quema quiaxitise 50 xihuitl. <sup>26</sup> Teipa quema ya quiaxitijtose nopa xihuitl para mosiyajquetzase, huelis quinpalehuise ininhuampoyohua ica tequitl catli amo ohui, pero nopa tequitl catli ohui ayacmo ma quichihuaca. Quej nopa anquintequimacase levitame.”

## 9

*Quenicatza ma quinextica nopa Pascua Ilhuitl*

<sup>1</sup> Quema TOTECO quicamanalhui Moisés huan quiilhui nochí ni camanali ya tlantoya se xihuitl para quistejque tlen tlali Egipto huan calaquiayaya ipan nopa achtihui metztli ipan xihuitl ome. Huan ipan nopa tonali nopa israelitame itztoyaj ipan nopa huactoc tlali Sinaí huan nojquiya TOTECO quiilhui ni camanali:

<sup>2</sup> “Sesen xihuitl monequi nochí israelitame quinextise nopa ilhuitl catli itoca Pascua ipan nopa tonal catli nimechnahuatijtoc. <sup>3</sup> Quema ya tiotlaquixtos ipan 14 itequi ni metztli catli achtihui ipan toxihui, anquitoquilise nopa tlanahuatili quen ijcuilijtoc. Senquistoc quen nimechnextilijtoc para anquichihuase, ya nopa anquichihuase.”

<sup>4</sup> Huajca Moisés quinnahuati nopa israelitame ma quinextica nopa Pascua Ilhuitl. <sup>5</sup> Huan npona ipan nopa huactoc tlali catli itoca Sinaí quema tiotlaquixtoya ipan 14 itequi nopa achtihui metztli ipan nopa xihuitl, inijuanti ilhuichijque senquistoc quen TOTECO quinahuatijtoya Moisés.

<sup>6</sup> Pero itztoyaj sequin tlacame catli mochijtoyaj amo tlapajpacme iixpa TOTECO pampa quiitzquitoj se mijcatzi, huan yeca amo huelque quichihuase nopa Pascua Ilhuitl ipan nopa tonali. Huajca yajque quiitatoj Moisés ihuaya Aarón ipan nopa tonali, <sup>7</sup> huan quinilhuijque:

—Masque tiquitzquitoque se mijcatzi, huan timochijtoque amo titlapajpactique iixpa TOTECO, ¿quenque amo huelis tijtencahuilise se nemactli iixpa TOTECO ipan ni tonali quema nochí israelitame quichihuaj ni Pascua Ilhuitl?

<sup>8</sup> Huan Moisés quinnanquili:

—Ximochiyaca hasta TOTECO nechilhuis tlaque cuali para mochihuas quema quen ni pano.

<sup>9</sup> Huan TOTECO quicamanalhui Moisés huan quilhui:

<sup>10</sup> “Xiquinilhui nopa israelitame quema inijuanti o se inincone amo hueli quinextise nopa ilhuitl Pascua ica nochí sequinoc, huelis quichihuase teipa. Sintla se amo hueli quichihuas

quema monequi pampa monejqui quiitzquis se mijcatzi huan yeca amo tlapajpactli o huelis se mopantía huejca tlen ichaj quema sequinoc il-huichihuaj, yaya hueli quinextise nopa ilhuitl teipa. <sup>11</sup> Pero quichihuase quema tiotlaquixtos ipan 14 itequi nopa ome metztlí ipan ne xihuitl. Monequi quicuase nopa pilborregojtzi ica xihuitl catli chichic huan pantzi catli amo quiipyia tlassenejcayotl. <sup>12</sup> Huan amo tleno quicahuase para seyoc tonali, niyon amo quipostequilise niyon se iomiyo nopa pilborregojtzi. Ma quinextica nopa Pascua senquistoc quen nimechnextilijtoc an-quichihuase. <sup>13</sup> Pero sintla se acajya masque tlapajpactli huan amo cana yajtoc, san moilhuis para amo quichihuas nopa Pascua Ilhuitl, monequi an-quiquixtise para ayacmo huelis itztos amohuaya anisraelitame. Quej nopa anquichihuase, pampa amo nechtencahuili nopa tlacajcahualistli noixpa ipan nopa tonal quema, niamotECO, nijtlali, huan huajca monequi quiselis nopa tlatzacuiltylistli por itlajtlacol.

<sup>14</sup> “Nochi seyoc tlali ehuani catli itztoque amo-huaya nojquiya monequi quinextise nopa Pascua para na quen nimechnextilijtoc. Onca san se tlanahuatili para israelitame huan seyoc tlali ehuani para quenicatza quichihuase, huan nochí san se monequi quitoquilise.”

*Nopa mixtli catli motlali itzonatipa itiopa  
TOTEĆO*

<sup>15</sup> Ipan nopa tonal quema tlanque quiquetzaj nopa yoyon tiopamitl catli quipixqui nopa camanali catli quichijtoya inihuaya, se hueyi

mixtli hualajqui quitzacuaco. Huan quema pejqui tiotlaquiya, nopa mixtli mopatlac para nesis quen se ttilelemeclti itzonatipa nopa tiopamitl huan quej nopa eltoya hasta tlanesiyaya. <sup>16</sup> Huan quej ni eliyaya nochipa. Ica tonaya se mixtli quitzacuayaya nopa yoyon tiopamitl huan ica tlayohua nesiyaya quen se hueyi tlitl. <sup>17</sup> Quema nopa mixtli mijcuiniyaya tlen nopa yoyon tiopamitl, nopa israelitame quistehuayayaj huan quitoquiliyohuiyayaj. Huan quema nopa mixtli moquetzayaya huan ayacmo nejnemiyaya, nopona nopa israelitame quiquetzayaya ininyoyoncalhua. <sup>18</sup> Quej ni nopa israelitame mijcuiniyayaj quema TOTECO quinnahuatiyaya, huan moquetzayayaj san campa quinilhuiyaya. Nochi tonali quema nopa mixtli mocahuayaya itzonatipa nopa tiopamitl, amo quistehuayayaj. <sup>19</sup> Huan masque nopa mixtli mocahuasquia ipan tiopamitl miyac tonali huan amo mijcuiniyaya, nochi israelitame quineltoquiliyayaj itlanahuatil TOTECO huan amo nejnemiyayaj. <sup>20</sup> Huan quema nopa mixtli amo mocajqui miyac tonali, nopa israelitame amo mocajque miyac tonali, pampa quen nopa TOTECO quinnextiljtoya. <sup>21</sup> Huan quema nopa mixtli moquetzayaya tlen se tiotlac hasta ijnaloc, huajca nopa israelitame moquetzayayaj. Huan quema ica ijnaloc nopa mixtli motlananayaya, inijuanti nojquiya motlananayayaj huan quitoquiliyayaj. Pero masque tonaya o tlayohua mijcuiniyaya nopa mixtli, inijuanti quistehuayayaj para quitoquilise senquistoc quen TOTECO tlanahuatijtoya. <sup>22</sup> Masque nopa mixtli moquetzayaya ipan

nopa yoyon tiopamitl campa TOTECO itztoya se ome tonali, o se metztl, o se xihuitl, npona nochí nopa israelitame mocahuayayaj huan ayacmo nejnemiyayaj. Pero quema nopa mixtli motlananayaya, inijuanti quistehuayayaj huan quitoquiliyayaj. <sup>23</sup> Huajca quema TOTECO quinnahuatiyaya, ma quiquetzaca ininyoyoncalhua, inijuanti quinquetzayayaj. Huan quema TOTECO quinnahuati ma nejnemica para quitoquilise nopa mixtli, quistejque. Quineltoquilijque nochí catli TOTECO quinahuati Moisés ma quichihuaca.

## 10

### *Nopa ome tlapitzali tlen plata*

<sup>1</sup> Huan TOTECO quicamanalhui Moisés huan quilhui:

<sup>2</sup> “Xijchihua ome tlapitzali ica plata catli tlatejzonali ica martillo. Huan anquipitzase para anquinnotzase israelitame ma mosentilica o para ma quimatica quema monequi ma motecpanaca para quisase. <sup>3</sup> Quema anquinpitzae nochí ome tlapitzalme ica sempa, nochí israelitame quimatise ma mosentilica imelac ipuerta ni yoyon tiopamitl campa timopantíaj. <sup>4</sup> Pero quema anquipitzase san se tlapitzali, san mosentilise catli tlayacanaj ipan sesen hueyi familia. <sup>5</sup> Huan quema anhuejcahuase anquipitzase, elis para anquistejhuase, huan inijuanti catli quiquetztoque ininchajchaj ica campa hualquisa tonati tlen ni yoyon tiopamitl achtihui quistehuase para nejnemise. <sup>6</sup> Huan quema anquipitzase ica ompa,

motecpanase para nejnemise catli quiquetztoque ininchajchaj ica sur huan nochí sequinoc quintoquilise. <sup>7</sup> Pero quema san anquinnotzase masehualme ma mosentilica, amo xihuejcahuaca xijpitzaca. <sup>8</sup> San totajtzitzi, inijuanti catli itelpocahua Aarón, huelise quipitzase nopa tlapitzali. Ya ni elis se tlanahuatili para anquitoquilise amojuanti huan amoixhuihua para nochipa.

<sup>9</sup> “Quema anajsise ipan amotlal huan monequi anquinhuilanase amocualancaitacahua, xijpitzaca chicahuac nopa tlapitzali, huan na, niamoTECO Dios, nimechelnamiquis, huan nimechmanahuis ininmaco amocualancaitacahua. <sup>10</sup> Nojquiya xijpitzaca nopa tlapitzali quema onca tonali tlen paquillistli. Xijpitzaca quema anilhuichihuaj, o quema eli selic metztli, o quema anquitencahuaj tlacajcahualistli tlatlatili o tlacajcahualistli para ma onca tlayoltlalili nohuaya. Huan quej nopa na catli niamoTECO huan niamoDIOS nimechelnamiquis.”

### *Nopa israelitame quistehuaj ipan Sinai*

<sup>11</sup> Huan ipan 20 itequi nopa ompa metztli quema yohuiyaya para ome xihuitl quistoyaj tlen tlali Egipto, nopa mixtli motlananqui tlen nopa yoyon tiopamitl campa TOTECO mocajqui. <sup>12</sup> Huajca nopa israelitame quistejque ipan nopa huactoc tlali itoca Sinaí huan quitoquilijque. Huan teipa nopa mixtli moquetzato ipan nopa huactoc tlali catli itoca Parán. <sup>13</sup> Ya ni nopa achihiu huelta quema quistejque huan quitoquilijque nopa mixtli quen TOTECO quinahuatijtoya Moisés ma quichihuaca.

<sup>14</sup> Huan achtihui motecpanque para nejnemise catli quihuicayayaj ibandera nopa tlahuilanca pamitl Judá. Huan Naasón, icone Aminadab, quinyacanayaya nopa hueyi familia Judá. <sup>15</sup> Huan teipa quitoquilijque nopa hueyi familia Isacar ica inintlayacanca, Natanael, icone Zuar. <sup>16</sup> Huan teipa yohuiyaya nopa hueyi familia Zabulón ica inintlayacanca, Eliab, icone Helón.

<sup>17</sup> Huan quema tlanque quicocopitzaj nopa yoyon tiopamitl campa TOTECO ininhuaya mocajqui, nopa levitame catli iniixhuihua Gersón huan Merari motecpanque huan pejque quihuicatiyohuij nopa yoyon tiopamitl.

<sup>18</sup> Huan iniica motecpanque catli quihuicayayaj ibandera nopa tlahuilanca pamitl Rubén. Huan Elisur, icone Sedeur, quinyacanayaya nopa hueyi familia Rubén. <sup>19</sup> Teipa quintoquilijque nopa hueyi familia Simeón ica inintlayacanca catli itoca Selumiel, icone Zurisadai. <sup>20</sup> Huan iniica yohuiyaya nopa hueyi familia Gad ica inintlayacanca Eliasaf, icone Deuel.

<sup>21</sup> Huan iniica motecpanque iixhuihua Coat catli elqui seyoc itelpoca Leví huejcajya. Huan nopa coatitame quihuicayayaj nochí cuamesas, tlaixpamitl huan tlamatli tlatzejzeloltic tlen nopa yoyon tiopamitl. Huan catli tlayacantiyajque nimantzi quiquetzatoj nopa yoyon tiopamitl nopona campa yohuij para ya eltos tlasencahuali quema ajse ni tlacame ica ni tlamatli.

<sup>22</sup> Teipa iniica coatitame motecpanque catli quihuicayayaj ibandera nopa tlahuilanca pamitl Efraín. Huan Elisama, icone Amiud, quiyacanayaya nopa hueyi familia Efraín. <sup>23</sup> Huan ini-

ica yohuiyaya Gamaliel, icone Pedasur, catli quiyacanayaya nopa hueyi familia Manasés. <sup>24</sup> Huan iniica motecpanque Abidán, icone Gedeoni, catli quiyacanayaya nopa hueyi familia Benjamín.

<sup>25</sup> Huan tlaica motecpanque catli quihuicayaya ibandera nopa tlahuilanca pamitl Dan. Huan Aheizer, icone Amisadai, quiyacanayaya nopa hueyi familia Dan. <sup>26</sup> Huan iniica Dan yohuiyaj nopa hueyi familia Aser ica intlayacanca catli itoca Pagiel catli eliyaya icone Ocrán. <sup>27</sup> Huan iniica yohuiyaya nopa hueyi familia Neftalí ica intlayacanca Ahira catli eliyaya icone Enán.

<sup>28</sup> Quej ni motecpanque nopa huejhueyi familias tlen israelitame quema quistehuayabaj para yase seyoc lugar.

### *Moisés quiilhui itex ma yohui inihuaya*

<sup>29</sup> Se tonal Moisés quiilhui itex, Hobab, catli eliyaya icone Ragüel catli ejqui tlali Madián:

—Tojuanti tiyohuij ipan nopa tlali catli TOTECO quiijtojtoc para techmacas. Xihuala tohuaya huan tiitztose cuali mohuaya, pampa TOTECO techtencahuilijtoc catli cuali techchihuilis tiisraelitame.

<sup>30</sup> Pero Hobab quinanquili:

—Amo, amo nijnequi niyas. Nijnequi nimocuepas notlal campa itztoque noteiximatzahua.

<sup>31</sup> Pero Moisés quiilhui:

—Amo techcajtehua. Ta cuali tiquiximati nochí ojtlí ipan nopa huactoc tlali huan canque cuali timocahuase. Xihuala tohuaya huan techyacana.

<sup>32</sup> Sintla tihualas tohuaya, nochí catli cuali catli

TOTECO techmacas tojuanti, timitzmacase nojquiya.

<sup>33</sup> Huajca yaya yajqui huan nochí inijuanti quistejque tlen itepe TOTECO huan nejnenque eyi tonali. Huan icaxa TOTECO catli quipixqui catli quintencahuiliyoya tlayacantiyohuiyaya huan quintemolijtinemiyaya campa mosiyajquetzase.

<sup>34</sup> Huan tonaya quema quistejque, nopa mixtli catli TOTECO quinmacac yohuiyaya intintzonatipa. <sup>35</sup> Huan quema quitlananayayaj nopa caxa para quistehuase, Moisés quitzajtziliyaya:

“¡Ximotlanana TOTECO!

¡Xijchihua nochí mocualancaitacahua ma mosemanaca!

¡Xijchihua para nochí catli amo quinequij mitzitase ma cholojtehuaca!”

<sup>36</sup> Huan quema quisehuiyayaj nopa caxa para mosiyajquetzase, Moisés sempa quitzajtziliyaya: “¡Ximocuepa, TOTECO, nica campa momasehualhua!

¡Tiitztoque tlahuél onpano miyac miles tlen masehualme hasta amo aquí huelis techpohuas!

¡Nica ximocahua tohuaya!”

## 11

### *TOTECO quiyolaxitijke nopa israelitame*

<sup>1</sup> Se tonal nopa israelitame pejque camanaltij catli amo monequi huan quitlaijilhuiyayaj TOTECO pampa moilhuijque quipanoyayaj tlaohuijcayotl. Huan TOTECO quincajqui huan tlahuél cuanqui. Huan quintitlanili se tlilt catli pejqui quintlatia catli quiquetztoyaj ininchajchaj

itejteno ne sequinoc israelitame. <sup>2</sup> Huajca nochí israelitame cuatzajtzique chicahuac huan quitlajtlanijque Moisés ma quinpalehui. Huan Moisés quitlajtlani TOTECO tlapalehuili huan nopa tlitl sejqui. <sup>3</sup> Huajca quitocaxtijque itejteno inialtepe Tabera. (Tabera quinequi quijitos “campa tlalemenqui”.) Pampa hasta nopona nopa tlitl tlen TOTECO quintlati.

<sup>4</sup> Nopa masehualme catli amo israelitame catli nejnemiyayaj inihuaya israelitame huan hualajtoyaj ipan tlen hueli xinachtli masehualme, sanmoilhuiyayaj para quicuase nacatl. Huan nopa israelitame nojquiya quintoquilijque huan pejque mochoquilíaj huan quijtohuayayaj: “¡Nelía cual Elisquúa sintla oncasquúa nacatl para tijcuase! <sup>5</sup> Tiquelnamiquij nopa michime catli tijcuayayaj san tlapic nepa ipan tlali Egipto. Huan nojquiya tijcuayayaj pepinos, melones, xonacatl, seboyas huan axox. <sup>6</sup> Pero ama nochí tiyamaníaj huan ayacmo timayanaj, pampa san ni maná onca para tijcuase.”

<sup>7</sup> Huan nopa maná catli huetziyaya eliyaya quen iyolo nopa colanto huan nesiyaya achi costic quen cuaeestli. <sup>8</sup> Huan iajhuiyaca eliyaya quen tlaxcali tlen harina tlaxacualoli ica aceite. Huan mojmostla nopa israelitame quisayayaj calteno huan quisentiliyayaj. Teipa quitisiyayaj ipan ininmetl, o quitejzonayayaj, o quimanayayaj huan ica quichihuayayaj se pantzi. <sup>9</sup> Ica tlayohua, quema huetziyaya ajhuachtli calteno, huetziyaya nojquiya nopa maná.

<sup>10</sup> Huan Moisés quicajqui para masehualme ipan sese israelita familia mosehuijtoyaj

inincalixpa chocayabaj, huan yeca TOTECO tlahuel cualanqui, huan Moisés amo quicualitac.  
**11** Huajca Moisés quiilhui TOTECO:

—¿Quenque quej ni techchihuilitoc, na nimotequipanojca? ¿Tlaque amo cuali nijchijtoc moixpa para techmamaltijtoc nochí ni masehualme? **12** Amo na niinintata o niininnana. Inijuanti amo noconehua. ¿Para tlen techilhuía ma niquinmamajtinemi hasta tiajsise campa nopa tlali catli tiquinilhuijtoc para tiquinmacas tohuejcapan tatahua? Na niquinhuica san quen se quihuica icona catli noja chichi. **13** ¿Canque hueli nijcuis nacatl para ma quicuaca nochí ni miyaqui israelitame? Nochi san nechchoquiliáj huan nechilhuíaj: ‘Techmaca nacatl para tijcuase.’ **14** Na amo nihueli niquinhuicas nochí ni miyaqui masehualme noseltzi. Niquinita para se tlamamali catli tlahuel etic para na. **15** Sintla quej ni techchihuilis nochipa, achi más cuali techmictis ama sintla nelía techicnelía. Quej nopa amo monequi niquitas catli ni masehualme nechchihuilise.

**16** Pero TOTECO quinanquili:

—Techsentilhuili 70 huehue tlacame catli tijmati cuali tlayacanaj huan quihuicaj tequiticayotl ica ni miyaqui israelitame. Huan xiquinhualica campa nopa yoyon tiopamitl campa timopantíaj huan nopona techchiya ininhuaya. **17** Huan na nitemos huan nopona nimitzcamanalhuis. Huan nijcuis Notonaltzi catli itztoc mohuaya huan nojquiya niquinmacas para inijuanti ma mitzpalehuica para anquinhuicase nochí ni miyaqui masehualme. Huan quej nopa amo monequi titequitis

moseltzi. <sup>18</sup> Huan nojquiya nimantzi xiquin-nahuati nochí israelitame ma moyolpajpacaca noixpa, pampa mostla ica ijnaloc quicuase nacatl. Xiquinilhui ya niquincactoc para chocaj huan qui-ijtohuaj para elisquía cuali sintla oncasquía nacatl para quicuase. Moilhuíaj achi más cuali itztoyaj nepa ipan tlali Egipto. Yeca ama na niquinmacas nacatl para quicuase. <sup>19</sup> Huan amo quicuase se tonal, niyon ome tonali, niyon macuili tonali, niyon majtlactli tonali, niyon 20 tonali. <sup>20</sup> Pero quicuase nochí se metztli hasta quisas ipan ininy-acatzol huan quijiyase, pampa inijuanti nech-huejcamajcajtoque na, catli niamoTECO; na catli niitztoc tlatlajco inijuanti. Chocatoque noixpa huan quijtojtoque: ‘¿Para tlen tiquisque nepa ipan tlali Egipto?’

<sup>21</sup> Huajca Moisés quijito:

—San tlacame catli nejnemij nohuaya itztoque 600 mil huan iyoca sihuame huan coneme. ¿Quenicitza tiquijtohua techmacas nacatl para tijcuase nochí se metztli? <sup>22</sup> Masque tiquinmictisquíaj nochí toborregojhua huan tohuacaxhua, amo quinaxilisquía para nochime. Masque tiquinmacasquía nochí michime catli itztoque ipan hueyi atl, amo quinaxilisquíaj.

<sup>23</sup> Pero TOTECO quinanquili:

—¿Ta timoilhuía tlahuel pilquentzi nochicahualis? Ama tiquitas sintla mochihuas o amo mochihuas catli niquijtohua.

*Nopa huehue tlacame camanaltij quen tlajtol  
pannextiani*

<sup>24</sup> Huajca Moisés quisqui huan quinpo huili nochí israelitame catli TOTECO Dios quiilhuijtoya. Huan quinsentili nopa 70 huehue tlacame tlen nopa israelitame huan quintlali yahualtic tlen nopa yoyon tiopamitl. <sup>25</sup> Huan TOTECO temoc ipan nopa mixtli huan quicamanalhui Moisés. Huan teipa quicuic Itonaltzi catli itztoya ipan Moisés para quipalehuis, huan nojquiya quinmacac nopa 70 huehue tlacame. Huan quema Itonaltzi motlali ipan nopa huehue tlacame, pejque camanaltij quen tlajtol pannextiani. Pero san se huelta panoc huan ayacmo mochijqui sempa.

<sup>26</sup> Huan itztoyaj ome tlen nopa 70 huehue tlacame catli TOTECO quintlapejpenijtoya catli mocajtoyaj ipan ininchajchaj, se itoca Eldad huan ne se itoca Medad. Pero nojquiya Itonaltzi TOTECO motlali ipan inijuanti huan pejque camanaltij quen tlajtol pannextiani nopona campa itztoyaj ipan ininchajchaj. <sup>27</sup> Huajca sequin telpocame motlalojtiyajque huan quiilhuitoj Moisés para Eldad huan Medad camanaltitoyaj quen tlajtol pannextiani nepa campa ininchajchaj.

<sup>28</sup> Huajca Josué, icone Nun, catli quipalehuijtoya Moisés hasta itelpocatiya quijito:

—Noteco Moisés, xiquintlacahualli.

<sup>29</sup> Pero Moisés quinanquili:

—¿Ta techtlasomati? Nelcuali elisquía sintla TOTECO quinmacasquía Itonaltzi nochí israelitame huan nochí elise tlajtol pannextiani.

<sup>30</sup> Huan Moisés huan nochí nopa huehue tlacame mocuepque campa ininchajchaj.

*TOTECO quintitlanili miyac solime*

<sup>31</sup> Huan TOTECO quichijqui ma huala se ajacatl chicahuac tlen campa hueyi atl huan quinhualicac tlahuel miyac solime. Huan patlantine-miyayaj campa hueli tlatlajco huan yahualtic nopa altepetl tlen ininyoyoncalhua nopa israelitame. Huan nopa solime patlantinemiyayaj echcapantzi san quen se metro ihuejcapanca. Huan nojquiya san se eliyaya temitoc ica solime huejca tlen ininchajchaj hasta campa se huelis ajsis sintla nejnemis para se tonal ihuejcaca. <sup>32</sup> Huajca nochí nopa achtihi tonali huan yohuali huan ipan ne seyoc tonali, nochí israelitame quinitzqui-jtinemiyayaj huan quinmictijtinemiyayaj solime. Huan inijuanti catli tlahuel pilquentzi quisentilijque, quisentilijque quen 60 hueyi lalax chiquihuitl tlen senquistoc solime. Huan pejque quinhuatzaj campa hueli ipan inialtepe tlen yoyon calme. <sup>33</sup> Pero quema pejque quicuaj nacatl nopa israelitame, TOTECO cualanqui ininhuaya huan quintitlanili se hueyi cocolistli huan quichijqui ma miquica miyaqui tlacame. <sup>34</sup> Huan yeca quitocaxtijque nopa lugar Quibrot Hataava (Quibrot Hataava quijtosnequi “Campa Quintlaltojque Catli Itzcuime”), pampa nopona quintlaltojque miyaqui catli tlahuel quinequiyayaj nacatl.

<sup>35</sup> Huan nopa israelitame motlanantejque tlen Quibrot Hataava huan nejnentiyajque hasta Hazerot huan nopona mocajque se quesqui tonali.

## 12

*Mariá huan Aarón ica camanaltique Moisés*

<sup>1</sup> Teipa María ihuaya Aarón pejque quiejel-namiquij Moisés, pampa Moisés mosihuajtijtoya ica se sihuatl catli ehua ipan tlali Etiopía. <sup>2</sup> Huan nojquiya quijitoque: “¿Ajqueya quijitohua para TOTECO san quicamanalhuía Moisés? Nojquiya techcamanalhuijtoc tojuanti.” Huan TOTECO quicajqui.

<sup>3</sup> Melahuac Moisés eliyaya se tlacatl catli achi más moicnonequiyaya huan amo quen nochí sequinoc masehualme ipan tlaltipactli. <sup>4</sup> Huajca nimantzi TOTECO quiilhui Moisés, Aarón huan María: “Xiyaca amojuanti aneyi campa nopa yoyon tiopamitl campa timopantíaj.”

Huan nochí eyi yajque campa nopa yoyon tiopamitl. <sup>5</sup> Huajca TOTECO temoc ipan nopa mixtli huan moquetzqui campa puerta catli calaqui ipan nopa yoyon tiopamitl. Huan quinnotzqui Aarón ihuaya María huan quema monechcahuijque, <sup>6</sup> TOTECO quinilhui: “Xijtlacaquilica ni tlamtli catli nimechilhuis: Quema nimechtitlanilía se tlajtol pannextijquetl para itztos amohuaya, na niamotECO, nimonextía ica ya ipan se temictli o nimocamanalhuía ihuaya ipan se tlanextili.

<sup>7</sup> Pero amo quej nopa nijcamanalhuía ni notequipanojca Moisés.

Yaya catli achi más temachtli nechneltoquilía que nochí sequinoc notequipanojcahua.

<sup>8</sup> Huan quema ihuaya Moisés nicamanalti, timoixtlachilijtoque huan nicamanalti ica se camanali catli amo ohui huan catli nimantzi quimachilía.

Huan yaya quiita noixayac huan quen na niitztoc.  
 Huajca ¿quenque anmotlalijtoque anquiejel-namiquij notequipanojca Moisés?"

<sup>9</sup> Huan TOTECO nelía cualanqui miyac inihuaya huan quisqui. <sup>10</sup> Huan quema nopa mixtli mijcuini ipan nopa yoyon tiopamitl, María pejqui palani itlacayo huan mocajqui chipahuac. Huan quema Aarón moicancuepqui para quiitas María, quiitac quipixqui nopa fiero tlacayo palanca cocolistli catli itoca lepra. <sup>11</sup> Huajca nimantzi Aarón quilihui Moisés: "Xíjpiya hueyi moyolo tohuaya, noteco. Amo techtlatzaculti por ni totlajtlacol. Nelía tihuihuitique huan yeca quen nopa ticanaltique. <sup>12</sup> Pero amo xijcahua María ma mocabhua quen se conetl catli tlacati mictoc catli quisa iijtico inana ica icuetlaxo ya san papalaca."

<sup>13</sup> Huajca Moisés quitzajtzili TOTECO: "¡Toteco Dios, nimitztlajtlanía xijchihua hueyi moyolo, huan xijchicahua!"

<sup>14</sup> Huan TOTECO quinanquili: "Sintla itata san quiixchijchatosquía, monequi mopinahuasquía hasta chicome tonali, huajca xijquixtica huan ma itzto huejca tlen amoaltepe tlen amoyoyoncalhua para chicome tonali. Huan quema tlamis chicome tonali, sempa hueli mocuepas campa ichaj."

<sup>15</sup> Huan quej nopa María quiquitijque huejca tlen inialtepe huan nopona mocajqui chicome tonali. Huan nopa israelitame amo mijcuini-jque hasta sempa quiselijque María ipan inialtepe tlen yoyon calme. <sup>16</sup> Teipa motlanantejque tlen campa itztoyaj campa itoca Hazerot huan yajque

quietzatoj ininchajchaj ipan nopa huactoc tlali catli itoca Parán.

## 13

*Moisés quintitlanqui tlapijpiyani ipan Canaán*

<sup>1</sup> Huan npona TOTECO quicamanalhui Moisés huan quiilhui:

<sup>2</sup> “Xiquintitlani tlacame para ma tlachiyatij quenicatza eltoc ipan nopa tlali Canaán catli na nimechmacas anisraelitame. Xijtitlani se tlayacanca tlacatl tlen sesen hueyi familia.”

<sup>3</sup> Huajca senquistoc quen TOTECO quinahuati ma quichihua, Moisés quichijqui. Quintitlanqui tlayacanca israelitame ma quistehuaca ipan nopa huactoc tlali Parán huan yase ipan nopa cuali tlali.

<sup>4-15</sup> Huan ya ni intoca sesen tlayacanquetl tlen sesen hueyi familia catli yajque:

Familia, Tlayacanquetl  
 Rubén, Samúa, icone Zacur  
 Simeón, Safat, icone Horí  
 Judá, Caleb, icone Jefone  
 Isacar, Igal, icone José  
 Efraín, Oseas, icone Nun  
 Benjamín, Palti, icone Rafú  
 Zabulón, Gadiel, icone Sodi  
 Manasés, icone José, Gadi, icone Susi  
 Dan, Amiel, icone Gemali  
 Aser, Setur, icone Micael  
 Neftalí, Nahbi, icone Vapsi  
 Gad, Geuel, icone Maqui

**16** Huajca ya ni elqui inintoca nopa tlacame catli Moisés quintitlanqui ma tlachiyatij ipan nopa tlali. Pero Moisés quitocaxpatlac Oseas, icono Nun, huan quitocaxti Josué.

**17** Huan quema Moisés quintitlanqui ma tlajt-lachiyatij nochí ipan nopa tlali Canaán, quinilhui:

—Xiyaca huan xipanoca ica norte ipan tlali Neguev huan xitlejcoca ipan nopa tepeme.

**18** Huan xijtlachilica quenicatzá eltoc ipan nopa tlali huan xijtlachilica sintla nopa tlacame catli itztoque nopona tejtetique o amo; sintla miyaqui inijuanti o amo miyaqui. **19** Xijtlachilica quenicatzá eltoc nopa tlali, sintla cuali temaca itlajca, o amo. Xijtlachilica sintla nopa altepeme ipan catli itztoque moyahualojoque ica tepamitl, o san tlapojtoc altepeme campa quiquetztoque ininchaj para se tlatoctzi. **20** Xijtlachilica sintla cuali nopa tlali huan miyac tlamantli moscaltía nopona, o amo. Xiquitaca sintla onca miyac cuame, o amo. Nojquiya xijcuica quentzi itlajca nopa tlali para antechhualiquilise. (Elqui ipohual nopa achtilhui tlatequistli tlen itlajca xocomecatl.)

**21** Huajca nopa tlacame yajque ichtacatzi tlachiyatoj ipan nochí nopa tlali tlen nopa huactoc tlali Zin hasta campa itoca Rehob ica norte, inechca campa itoca Hamat. **22** Quema quisque, yajque ica norte huan quipanoque nopa huactoc tlali campa itoca Neguev huan yajque hasta altepetl Hebrón. Nopona itztoyaj iteiximatcahua Ahimán, Sesai huan Talmai. Nochí inijuanti eliyayaj iteipan ixhuihua Anac. (Nopa altepetl Hebrón nelía quipixtoya miyac xihuitl. Ya quichijchijtoyaj huan quiquetztoyaj

chicome xihuitl achтиhui que quema pejqui altepetl Zoán ipan tlali Egipto catli nojquiya huejcajya tlasencahuali.)<sup>23</sup> Huan ajisitoj hasta ipan nopa tlamaya catli itoca Escol, huan nopona quitejque san se quechtli tlen itlajca xocomecatl, huan elqui hueyi hasta monejqui quicuapilojque nopa quechtli uvas ipan se cuahuitl huan ome tlacame quiquechpanojtihualajque. Huan nojquiya quihualicaque sequin granadas huan higos catli nopona moscaltiyaya.<sup>24</sup> Huan nopa israelitame quitocaxtijque nopa tlamayamitl Escol (Escol quinequi quiijtos “quechtli”), pampa nopona quitejque nopa hueyi quechtli tlen itlajca xocomecatl.

<sup>25</sup> Huan quema ya tlantoyaj quitlachilijtinemij nopa tlali para 40 tonali,<sup>26</sup> mocuepque Cades ipan nopa huactoc tlali Parán campa itztoyaj Moisés, Aarón huan nochí ne sequinoc israelitame. Huan quinpoohilijque nochí catli quipantijtoyaj huan quinnextilijque nopa cuatlajcayotl catli oncayaya ipan nopa tlali.<sup>27</sup> Huan quen ni quiilhuijque Moisés:

—Tiyajque ipan nopa tlali catli techtitlanqui ma tijtlachilitij. Melahuac nochí temaca hasta mocahua itlajca, huan ya ni quentzi catli temaca nopa tlali.<sup>28</sup> Pero nopa tlacame catli nopona itztoque nelía tejtetique, huan nopa altepeme nelía huejhueyi, huan cuali moyahualojoque ica tepamitl. Huan nojquiya tiquinitaque nopa iteipan ixhuihua Anac catli nelía huejcapantique.<sup>29</sup> Campa itoca Neguev itztoque nopa amalecitame, huan nopona campa tlahuejcapanco itztoque nopa heteos, jebuseos huan nopa

amorreos. Huan iixmelac hueyi atl hasta campa hueyatl Jordán itztoque nopa cananeos.

<sup>30</sup> Huajca Caleb quichijqui para ma ayacmo tlahuejchihuaca nochí nopa israelitame catli itztoyaj iixpa Moisés, huan quiijto:

—¡Ma tiyaca nimantzi huan ma timoaxcatica nopa tlali! ¡Temachtli tojuanti tihuelise tiquintlanise huan timoaxcatise!

<sup>31</sup> Pero ne sequinoc catli yajtoyaj ihuaya quiijtojque:

—¡Amo! Tojuanti amo tihuelise timohuilanase inihuaya nopa tlacame, pampa inijuanti más tetique que tojuanti.

<sup>32</sup> Huan pejque quinilhuíaj nopa israelitame para nopa tlali huan nopa tlacame nopona nelía amo cuali eliyaya. Quiijtojque:

—Nopa tlali catli tijtlachilitoj quinpiyaj tlacame mahuililme. Tlahuel quimatiq tlahuilanaj huan huejcapantique hasta temajmatíaj. <sup>33</sup> Nojquiya tiquinitaque nopona iteipan ixhuihua Anac catli tlahuel huejcapantique huan tejtetique. Inijuanti seyoc xinachtli masehualme catli amo quen tojuanti. Huan iniixpa timomajmatiyayaj san quen tipilchapoltzitzti. Huan tlen huejcapa inijuanti techtlachiliyayaj quen tiquinitaj pilchapoltzitzti.

## 14

*Israelitame      motzontochontilijque      iixpa  
TOTECHO*

<sup>1</sup> Huajca nochí nopa israelitame pejque cuatzatzij huan seyohual chocayayaj huan tlahuejchihuayayaj. <sup>2</sup> Huan nochí pejque quiejelnamiquij Moisés huan Aarón. Quijtohuayayaj: “¡Achi más

cuali timictosquíaj nepa ipan tlali Egipto! ¡O cuali timiquisquíaj nica ipan ni huactoc tlali,<sup>3</sup> para amo techhuicas TOTECO ipan nopa tlali, huan nopona techmictise ica machete! Huan quema techmic-tise, tosihuajhua huan tocone-hua mocahuase in-imaco tocualancaitacahua para mochihuase in-tequipanojcahua. ¡Achi más cuali elisquía timo-cuepasquíaj sempa ipan tlali Egipto!”

<sup>4</sup> Huajca nimantzi pejque moilhuíaj se ica seyoc: “¡Ma tijtlalica se totlayacanca para ma techhuica para timocuepase tlali Egipto!”

<sup>5</sup> Huajca Moisés ihuaya Aarón motlancuaquet-zque iniixpa nochí nopa israelitame huan hasta moixtlaltenamijque. <sup>6</sup> Huan Josué ihuaya Caleb catli quitlachilitoj nopa tlali, quitzayanque ininy-oyo para quinextise tlahuel motequipachoyabaj,<sup>7</sup> huan inijuanti quinilhuijque nochí nopa israelitame:

—¡Techtlacaquilica! Nopa tlali catli tijtlachilitoj nelía nel cuali. <sup>8</sup> Sintla TOTECO paqui ica tojuanti, ya techhuicas ipan nopa cuali tlali catli nochí temaca hasta mocahua huan ya techmactilis. <sup>9</sup> Pero amo xiquixpanoca TOTECO, niyon amo xiquinimacasica nopa tlacame nopona, pampa ni-mantzi tiquintlanise. Amo aqui catli huelis quin-manahuis pampa TOTECO itztoc tohuaya. Huajca amo ximajmahuica.

<sup>10</sup> Pero nochí nopa israelitame quinequiyayaj quintzontepachose. Huan iniixpa nochí nopa israelitame monexti itlatlanex TOTECO ipan nopa yoyon tiopamitl campa mopantíaj. <sup>11</sup> Huan TOTECO quiilhui Moisés:

—¿Hasta quema nechcuatotonise ni israelitame? ¿Amo quema nechneiltocase masque nijchijtoc tlahuel miyac tlanextilijcayotl iniixpa?  
**12** Na niquincocos ica se miquilistli huan niquinpolihuiltis. Huan ica ta nijchihuas seyoc tlamantli masehualme catli achi más hueyi huan más tejtetique huan amo quen injuanti.

**13** Pero Moisés quinanquili TOTECO huan quiilhui:

—Sintla quej nopa tijchihuas, nimantzi quicaquise nopa Egipto ehuani catli quiitaque quen tiquinquixti ni masehualme ipan inintial ica mohueyi chicahualis. **14** Huan nopa Egipto ehuani quicaquise huan quinpohuilise masehualme nica. Pampa masehualme ipan ni tlali quicactoque tlen ta mohueyi chicahualis huan quenicatza nochipa tiitztoc tlajco tojuanti. Quicactoque quenicatza techixtlachilía para techcamanalhuis quema nopa mixtli catli moaxca moquetza totzonixco. Huan quenicatza techyacana ica se mixtli tonaya huan ica se tlifelementli tlayohua.  
**15** Sintla tiquinmictis nochí ni israelitame san ica sempa, nochí masehualme ipan sequinoc tlalme catli quicactoque tlen mohueyilis quijtose, **16** ta tiquinmicti ipan ni huactoc tlali pampa amo tihuelqui tiquinmocuitlahui para itztose hasta tiquinhuicas ipan ne cuali tlali catli tiquintencahuili para tiquinmacas.  
**17** Huajca yeca ama nimitztlajtlanía, xijnexti mohueyi chicahualis huan xiquintlapojpolhui. Xijchihua quen techilhuijtoc para tijchihuas. Toteco, ta tiquijtojtoc, **18** amo nimantzi

ticualanis, huan tlahuel hueyi motlaicnelilis. Titetlapojpolhuía tlaixpanolme, pero amo tiquixpolos inintlajtlacol quen san amo tleno quichijtoque. Pampa tiquijtohua ica ta, sesen tlajtlacoli quihuica itlatzacuiltylis. Huan quema se tetaj tlajtlacolchihua, tijtlatzacuiltyá huan tiquintlatzacuiltyá iconehua huan iteipan ixhuihua huan hasta iteipan ixhuihua quipiyase ininconehua por catli quichijqui ne tetaj. Quej nopa tiquijtojtoc TOTECO. <sup>19</sup> Huajca ama ica nopa mohueyi teicnelijcayo, xiquintlapojpolhui inintlajtlacol nochí ni masehualme san quen miyac huelta tiquintlapojpolhuijtoc tlen quema tiquistejque ipan tlali Egipto.

*TOTECO quintlatzacuilty nopa israelitame*

<sup>20</sup> Huan TOTECO quijito:

—Cualtitoc, niquintlapojpolhuis quen techtlajtlanijtoc. <sup>21</sup> Pero melahuac nimitzilhuía quen temachtli na niitztoc huan temachtli notlatlanex nesis campa hueli ipan nochí tlaltipactli, <sup>22</sup> nojquiya temachtli niyon se tlen ni masehualme catli quiitztoque nohueyitilis amo quiitas nopa cuali tlali. Pampa masque quiitztoque nochí nopa tlanextilijcayotl catli nijchijqui ipan tlali Egipto huan ipan huactoc tlali, nechyejyecojtoque huan amo quineltocatoque notlanahuatil ya majtlactli hueltas. <sup>23</sup> Huajca niyon se tlen ni masehualme amo quiitase nopa cuali tlali catli niquinilhui niquinmacas intatahua. Amo aqui catli nechhuejcamajcajtoc quiitas. <sup>24</sup> Pero notequipanojca Caleb, quena. Pampa ya quipixtoc seyoc tlamantli iyolo huan

senquistoc nechneltocatoc, ya, quena, nijcahuilis ma calaqui ipan nopa tlali catli quitlachilito, huan ya ihuaya iconehua quiselise catli iniaxca nopona. <sup>25</sup> Huan pampa anquinimacasij nopa amalecitame huan cananeos catli itztoque ipan nopa tlamayamitl, mostla monequi anmocuepase ipan huactoc tlali ipan nopa ojtli catli yohui Hueyi Atl Chichiltic.

<sup>26</sup> Huan nojquiya TOTECO quiilhui Moisés ihuaya Aarón:

<sup>27</sup> —Ayacmo niquinijiyo huis ni masehualme catli nechejelnamictinemij. Niquincactoc nochí catli nochí camanaltij. <sup>28</sup> Huajca xiquinyolmelahua: ‘Nimotestigojquetza ica noseltzi, niamoTECO, para nimechchihuilis catli nijcajqui anquijtohuaj. Anquijtoque achi cuali anmiquisquíaj ipan ne huactoc tlali, <sup>29</sup> huan yeca nochí catli anquiaxitijoque 20 xihuitl huan anmoijcuilojtoque ipan nopa censo, monequi anmiquise ipan ni huactoc tlali pampa antechejelnamijque. <sup>30</sup> Niyon se tlen amojuanti amo ancalaquise ipan nopa tlali catli nimomatlananqui hasta ilhuicac huan niquijto para melahuac nimechmacasquía. San calaquise Caleb, icone Jefone, huan Josué, icone Nun. <sup>31</sup> Huan amocone hua catli anquijtoque huetzisquíaj ininmaco amocualancaitacahua, na niquinhuicas ipan nopa cuali tlali catli anquihuejcamajcrajque. <sup>32</sup> Pero amotlacayohua mocahuas ipan ni huactoc tlali. <sup>33</sup> Huan amocone hua nejnentinemise ipan ni huactoc tlali para 40 xihuitl. Quej nopa inijuanti quiixtlahuase por amotlajtlacolhua hasta

nochi amojuanti anmiquise ipan ni huactoc tlali. <sup>34</sup> Anquitlachilijtinenque 40 tonali nopa cuali tlali, huan yeca nojquiya anquiselise amotlatzacuiltyl 40 xihuitl para antlaxtlahuase nopa amotlajtlacolhua, se xihuitl para sesen tonal. Quej nopa anquimatise quenicatza ipanti se catli nechhuejcamajcahua.' Quej nopa xiquinilhuica. <sup>35</sup> Na niamoTECO nimechyolmelajtoc, huan quej nopa nimechchihuilis nochí antzontojtochon tlacame catli anmosansejcotlalijtoque para amo anquichihuase catli cuali nohuaya. Nochi anmiquise ipan ni huactoc tlali.

*Mijke catli quitlachilitoj nopa tlali*

<sup>36</sup> TOTECO quinmicti nopa tlacame catli Moisés quintitlanqui para ma quitlachilitij nopa cuali tlali huan teipa inijuanti mocuepque huan camanaltique fiero tlen catli quiitztoyaj <sup>37</sup> Inijuanti mijque ica se cocolistli nopona iixpa TOTECO. <sup>38</sup> San Josué, icone Nun, ihuaya Caleb, icone Je-fone, mocajque yoltoque, huan nochí nopa sequinoc tlacame catli quitlachilitoj nopa cuali tlali huetzque mictoque.

*Inincualancaitacahua quintlanque nopa israelitame*

<sup>39</sup> Huan quema Moisés quinilhui nopa israelitame nochí catli TOTECO quinilhuijtoya, nochí tlahuels motequipachojque. <sup>40</sup> Huan hualmostla cualca mejque huan pejque tlejcoj campa nopa tepeme catli eltoya nechca, huan quijtohuayayaj:

—Melahuac titlajtlacolchijtoque, pero ama nica tiitztoque. Ma tiyaca nimantzi timoaxcatise nopa tlali catli TOTECO techilhuijtoc para techmacas.

**41** Pero Moisés quinilhui:

—¡Amo xiquixpanoca catli TOTECO quiijtojtoc! ¡Nopa tlamantli catli anquichihuaj amo quisas cuali! **42** Amo xiyaca, pampa TOTECO amo itztoc amohuaya, huan temachtli anmechtlanise amocualancaitacahua. **43** Nopa amalecitame huan nopa cananeos amohuaya motlalise, huan anhuetzise ininmaco, huan anmechmictise. Amo anquitlacaqilijtoque TOTECO, huan TOTECO amo itztos amohuaya.

**44** Pero inijuanti amo quichihuilijque cuenta huan tlejcotiyajque ipan nopa tepetl masque niyon Moisés, niyon nopa caxa catli quipix-toya catli quintencahuilijtoya TOTECO amo ya-jqui ininhuaya. **45** Huajca motlananque nopa amalecitame ihuaya nopa cananeos catli itztoyaj ipan nopa tlali huan temoque, huan quinmictijti-hualajque nopa israelitame hasta Horma.

## 15

### *Tlanahuatilme para tlacajcahualistli*

**1** Huan TOTECO quicamanalhui Moisés huan quilhui:

**2** “Xiquincamanalhui nopa israelitame huan xiquinilhui quema calactiyase ipan nopa cuali tlali catli niquinmacas para ipan itztotij, **3** huan quinequise nechpaquilismacase ica se tlacajcahualistli tlatlatili, o se tlacajcahualistli catli nechmacase ipan tlitl, quej ni monequi quichihuase. Masque nechmacase nopa tlacajcahualistli pampa quitlamichijtoque se tlenijqui catli nechtencahuilijtoque quichihuase,

o pampa huelis san ica ininpaquilis quinequij nechmacase se tlenijqui, o pampa ajsis se ilhuitl quema monequi se tlacajcahualistli, o quinequij nechyolpactise ica catli mijyotis ajhuiyac noixpa, huajca monequi nechmacase se borrego, se chivo, o se becerro. <sup>4</sup> Ihuaya sesen tlacajcahualistli monequi nojquiya nechmacase nopa tlacajcahualistli tlen harina catli ihuaya yohui. Sintla se pilborregojtzi nechmacase, monequi ihuaya nechmacase ome kilo catli cuali harina tlamaneloli ica se litro aceite. <sup>5</sup> Huan sintla nechmacase se pilborregojtzi quen se tlacajcahualistli tlatoyahuali, nechmacase se litro xocomeca atl quen se tlacajcahualistli tlatoyahuali huan mijyotis cuali noixpa. <sup>6</sup> Huan sintla nechmacase se oquich borrego, ihuaya nechmacase nojquiya nahui kilos catli cuali harina tlamaneloli ica se litro huan se achi tlen aceite. <sup>7</sup> Huan nojquiya ihuaya nechmacase se litro huan se achi tlen xocomeca atl quen se tlacajcahualistli tlatoyahuali noixpa. <sup>8</sup> Huan sintla nechtencahuilise se becerro para se tlacajcahualistli tlatlatili, o pampa quitlamiltijtoque catli nechtencahuilijtoque quichihuase, o sintla nechmacase pampa quinequij quipiyase tlayoltlalili nohuaya, <sup>9</sup> monequi ihuaya nopa becerro nechmacase se tlacajcahualistli tlen chicuase kilos catli cuali harina tlamaneloli ica ome litros tlen aceite. <sup>10</sup> Huan ihuaya nojquiya nechmacase ome litros tlen xocomeca atl quen se tlacajcahualistli tlatoyahuali noixpa. Huan nochí san sejco quitlatise huan mijyotis ajhuiyac noixpa huan

nechpactis. <sup>11-12</sup> Huajca quej ni sese israelita monequi quisencahuas sesen becerro, sese oquich borrego, sesen pilborregojtzí, o sesen chivo catli nechmacase. <sup>13</sup> Nochi israelitame quichihuase nochí ya ni quema nechmacase se tlacajcahualistli catli quitlatíaj para ajhuiyac niquijnecuis.

<sup>14</sup> “Huan san se quichihuas se catli seyoc tlali ejquetl catli itztos amohuaya, huan quinequis nojquiya nechtencahuilis se tlacajcahualistli catli quitlatis. Nochi san se tlanahuatili quitoquilise para quenicatza cuali quisencahuase inintlacajcahuialis para na. <sup>15</sup> Israeltame huan seyoc tlali ehuani catli mocahuaj ininhuaya san se tlanahuatili quitoquilise para nochipa. <sup>16</sup> Quej nopa anisraelitame huan seyoc tlali ehuani san se anitztose noixpa.”

<sup>17</sup> Huan TOTECO quicamanalhui Moisés huan quilhui:

<sup>18</sup> “Xiquinilhui nochí israelitame quema calactose ipan nopa cuali tlali campa na niquinhuicas, <sup>19</sup> huan pehuase quicuasse nopa trigo catli temaca nopa tlali, monequi quiyyocatlalise se achi para nechtencahuilise. <sup>20</sup> Quema achtihui quisentilise trigo sesen xihuitl huan quichihuase nopa achtihui tixtli, ma nechsencahuilica se pantzi huan quihuisose noixpa quen se tlacajcahualistli tlen pantzi tlen nopa trigo pixquistli. <sup>21</sup> Huan quitencahuase ni tlacajcahualistli tlen nopa achtihui trigo ipan sesen xihuitl hasta iniixhuihua quinpiyase iniixhuihua huan para nochipa.

<sup>22-23</sup> “Huan masque nelía quinequise quichihuase nochí senquistoc cuali, sintla inijuanti

o iniixhuihua teipa ehuani, amo quichihuase nochi ni tlanahuatilme catli nimechmacatoc ica Moisés hasta quema nipejqui nijmaca tlanahuatilme, huajca ya ni catli monequi quichihuase. <sup>24</sup> Quema san sejco inijuanti momacase cuenta para amo nochi tlamtli catli quichihuayayaj eltoya senquistoc cuali noixpa, monequi nechtencahuilise se becerro quen se tlacajcahualistli tlatlatili catli tlahuel ajhuiyac mijyotis para na. Huan ihuaya nechmacase itlacajcahualis tlen harina huan tlen xocomeca atl quen quiijtohua nopa tlanahuatili catli nimechihuijtoc. Huan nojquia nechtencahuilise se chivo quen se tlacajcahualistli por nopa tlajtlacoli catli quichijque. <sup>25</sup> Huajca nopa totajtzi nechmacas nopa tlacajcahualistli para nechixtzacuilis inintlajtlacolhua nochi israelitame huan niquintlapojpolhuis, pampa ya nechtencahuili nopa tlacajcahualistli por nopa tlajtlacoli catli quichijque masque amo quimatiyayaj. <sup>26</sup> Huan na niquintlapojpolhuis nochi israelitame huan nochi seyoc tlali ehuani catli itztose ininhuaya por nopa tlajtlacoli catli nochi inijuanti sentic quichijque masque amo quimatiyayaj.

<sup>27</sup> “Sintla tlajtlacolchihuas se masehuali san pampa amo quimati, quema momacas cuenta catli quichijqui, quitencahuas se sihua chivo catli san quipiya se xihuitl quen se tlacajcahualistli por tlajtlacoli. <sup>28</sup> Huan nopa totajtzi nechmacas nopa tlacajcahualistli para nechixtzacuilis itlajtlacol noixpa pampa amo quimatiyaya sintla quichihuayaya se tlajtlacoli, huan na nijtlapo-jpolhuis. <sup>29</sup> Huan ni tlanahuatili monequi san

se quitoquilise israelitame huan catli seyoc tlali ehuani catli itztose amohuaya quema quichihuaj tlajtlacoli pero amo quimatiyaya.

<sup>30</sup> “Pero sintla tlajtlacolchihua se tlacatl ica ipaquilis, masque se israelita o amo, yaya tlahuel nechhuejcamajcahua na, niamoTECO, huan monequi miquis para ayacmo itztos amohuaya. <sup>31</sup> Anquimictise pampa amo quinejqui quicaquis nocamanal huan amo quineltocac notlanahuatil, huan nochí itlajtlacol huetzis ipan ya.”

*Tlatzacuiltonistli por catli tequiti ipan sábado*

<sup>32</sup> Quema nopa israelitame itztoyaj ipan nopa huactoc tlali, quipantijque se tlacatl quisentiliyaya cuahuitl ipan se tonal para mosiyajquetzase. <sup>33</sup> Huan inijuanti catli quipantijque quihiuicaque iixpa Moisés ihuaya Aarón huan iniixpa nochí israelita tlayacanani, <sup>34</sup> huan quitlalijque ipan tlatzactli pampa ayamo quimatiyaya tlaque ipaquilis TOTECO para quichihuile. <sup>35</sup> Pero teipa TOTECO quiilhui Moisés: “Nopa tlacatl monequi miquis. Nochi anisraelitame monequi anquiquixtise huejca tlen amoaltepe campa anquinquetztoque amoyoyoncalhua huan anquitepachose hasta miquis.”

<sup>36</sup> Huajca nopa israelitame quiquixtijque nopa tlacatl tlen inaltepe huan quihiuicaque huejca. Huan quitzontepachojque hasta quimictijque senquistoc quen TOTECO quinahuatijtoya Moisés.

*Itenhuaxo ipan itencuelpachol ininyoyo*

<sup>37</sup> Huan TOTECO quicamanalhui Moisés, huan quiilhui:

<sup>38</sup> “Xiquincamanalhui nochí israelitame, huan xiquinilhui ma mochihuilica inintenhuaxo para quiilpise ipan itencuelpachol nochí ininyoyo. Monequi quitlalise itenhuaxo ica icpatl catli azultic. <sup>39</sup> Huan quema anquitlachilise itenhuaxo amoyoyo, anquielnamiquise itlanahuatil TOTECO huan anquitoquilise. Huan amo antechcajte-huase quen se tlacanenca sihuatl quicahua ihuehue. Niyon amo anquichihuase san catli anquinequij anquichihuase, o catli anmoilhuiáj para cuali. <sup>40</sup> Quej nopa anquielnamiquise nochí notlanahuatil huan anquineltocase, huan aneltose antlatzejtzelotlique san para na, niamoTeco Dios. <sup>41</sup> Na niDIOS amoTeco, huan na catli nimechquixti ipan tlali Egipto para antechiximatise para niamoTECO. Quena, na niamoTECO Dios.”

## 16

### *Itlajtlacol Coré huan itlatzacuíttil*

<sup>1</sup> Se tonal pejque motlananaj Coré ihuaya Datán, Abiram huan On. (Coré eliyaya iconé Izhar, catli eliyaya iconé Coat, catli eliyaya iconé Leví huejcajya. Huan Datán huan Abiram eliyayaj iconehua Eliab huan On eliyaya iconé Pelet. Huan nochí ni eyi itztoyaj iteipan ixhuihua Rubén catli itztoya huejcajya.) <sup>2</sup> Huan Coré, Datán, Abiram huan On mohueyimatque huan motlananque ininhuaya 250 israelita tlayacanani. Nopa 250 tlacame qui-huicayayaj tequiticayotl huan tetlalnamictiyayaj huan nochí israelitame quiniximatiyayaj. <sup>3</sup> Huan nochí inijuanti mosentilijque huan motlalijque iixpa Moisés ihuaya Aarón, huan quinilhuijque:

—Ayacmo timechijiyohuise más. Amojuanti amo más ancuajcualme que sequinoc tiisraelitame. Nochi tiisraelitame techtlapejpenijtoc TOTECO, huan yaya itztoc tohuaya nochi tojuanti. Huajca ¿quenque amojuanti tlahuēl anmohueyichihuaj huan anquinequij antechnahuatise nochi sequinoc tiisraelitame?

<sup>4</sup> Huan quema Moisés quicajqui nopa tlamantli, motlancuaquetzqui huan motlancuaixtlapacho iixpa TOTECO. <sup>5</sup> Teipa quiilhui Coré inihuaya catli quitoquiliyayaj:

—Mostla ica ijnaloc TOTECO quinextis ajqueya iaxcahua huan ajqueya quinita para tlatzejzeloltique huan ajqueya ya quitlapejpenijtoc para quinechcahuis ica tlacajcahualistli, pampa san catli TOTECO quitlapejpenis huelis quimactilis tlacajcahualistli. <sup>6</sup> Huajca xijchihuaca ya ni para tijmatise: Coré, ta huan nochi catli itztoque mohuaya, mostla xijcuica popochcomitl, <sup>7</sup> huan ipan xijtlalica tlicoli. Huan xijtemilica copali huan xijtlalica iixpa TOTECO. Huan nopa tlacatl catli TOTECO quitlapejpenis, ya nopa catli tiquitase para tlatzejzeloltic. Amojuanti, anlevitame, tlahuēl anmohueyimajtoque.

<sup>8</sup> Nojquiya Moisés quiilhui Coré:

—¡Techtlacaquilica, anlevitame! <sup>9</sup> ¿Amo anquiitaj para hueyi ipati catli Toteco Dios anmechchihuilijtoc? ¿Para tlen anquiitaj para tlahuēl pilquentzi para TOTECO catli tiisraelitame tijhueyichihuaj anmechtlapejpenijtoc san amojuanti para aniaxcahua? Anmechiyocatlalijtoc tlen nochi sequinoc israelitame para anquinechcahuise huan antequitise ipan ni iyoyon tiopa campa yaya mocahua

tohuaya. Nica eltoc campa anquintequipanose nochi israelitame. <sup>10</sup> Quena, TOTECO mitztlape-jpenijtoc ta, tiCoré, huan nochi moicnihua catli levitame para antequitise inechca. Amo cuali para anquiitaj ya nopa quen amo tleno. ¿Para tlen ama anquinequij animochihuase antotajtzitzi nojquiya? <sup>11</sup> Amo anmotochonchijtoque ica Aarón huan anquitlaijilhuíaj. Yaya amo tleno quichij-toc. Anmotochonchijtoque huan anquitlaijilhuíaj TOTECO.

<sup>12</sup> Teipa Moisés tlanahuati ma quinotzatij Datán huan Abiram catli eliyayaj iconehua Eliab, pero san tlananquilijque:

—Amo tiyase. <sup>13</sup> Ta timoilhuía tlahuel pilquentzi para techquixtijtoc ipan tlali Egipto catli temacayaya itlajca hasta mocahua para ma timiquiquij nica ipan ni huactoc tlali, huan ¿ama tijnequi tielis titotlanahuatijca nojquiya? <sup>14</sup> Amo techhuicatoc ipan se tlali catli nochi temaca hasta mocahua, niyon amo techmacatoc se tomil, niyon se toxocomecamil. Tijnequi nochi ma timitztoquilica quen san tipopoyotzitzi. ¡Amo, amo timitzitatij!

<sup>15</sup> Huajca Moisés tlahuel cualanqui huan quiilhui TOTECO:

—Amo xi quisnelili inintlacajcahualis. Na amo tleno ni quincuilijtoc, niyon se pilburrojtzi. Amo tleno catli amo cuali njchihuilijtoc niyon se tlen injuanti.

<sup>16</sup> Teipa Moisés quiilhui Coré:

—Mostla ximonextica iixpa TOTECO, huan Aarón nojquiya nopona itztos. <sup>17</sup> Sesen amo juanti xihuicaca amopopochco huan ipan ma quitlali

copali. Ta ihuaya Aarón huan ne sequinoc 250 tlacame anquihuicase amopopochco huan anquitlalise san sejco iixpa TOTECO.

<sup>18</sup> Huajca sesen tlen injuanti quicuic ipopochco, huan ipan quitlali tlicoli huan copali huan moquetzqui ihuaya Moisés huan Aarón iixpa nopa yoyon tiopamitl campa timopantíaj ihuaya TOTECO. <sup>19</sup> Huan Coré quichijtoya ma mosentilica nopona nochi nopa israelitame para ma quitlachilica tlaque panos. Huan itlatlanex TOTECO monexti iniixpa nochi nopa israelitame.

<sup>20</sup> Huan TOTECO quicamanalhui Moisés ihuaya Aarón huan quinilhui:

<sup>21</sup> —Ximoiyocatlalica tlen nochi ni tzontotojochon tlacame, huan na niquintzontlamiltis ipan se tlatoctzi.

<sup>22</sup> Huan Moisés huan Aarón motlancuaquetzque iixpa TOTECO hasta tlaltenamijque, huan quijtojque:

—¡Ay Toteco Dios! Ta catli tiquinmaca nemilstli nochi masehualme, amo xicualani inihuaya nochi ni israelitame por itlajtlacol san se tlacatl.

<sup>23</sup> Huajca TOTECO quiilhui Moisés:

<sup>24</sup> —Xiquincamanalhui nochi nopa israelitame huan xiquinnahuati ma mijcuinicla tlen ininchaj Coré, Datán huan Abiram.

<sup>25</sup> Huajca Moisés motlanantejqui huan yajqui campa itztoya Coré, Datán huan Abiram, huan quitoquilijque nochi nopa 250 thayacanca israelitame. <sup>26</sup> Huan nopona Moisés quinilhui nopa masehualme:

—Ximoiyocatlalica tlen ininyoyoncalhua ni tlacame catli fierojtique, huan amo xijcuica tleno catli iniaxca para amo ancalaquise ipan inintlajtlacol nojquiya.

<sup>27</sup> Huan nopa israelitame mijcuinijque tlen inchajchaj. Huan Coré, Datán huan Abiram inihuaya ininsihuajhua, huan ininconehua moquetztoyaj calixpa nechca sese ininpuerta. <sup>28</sup> Huan Moisés quiijo:

—Ica ya ni anquimatise para TOTECO nechtilantoc para ma nijchihua nochí catli nijchijtoc, huan amo nijchihua san pampa na nijnejqui. <sup>29</sup> Sintla ni tlacame miquise quen sequinoc tlacame miquij, huajca TOTECO amo nechtilantoc ma nimechyacanas. <sup>30</sup> Pero sintla TOTECO quiichi-huas se tlamantli catli amo quema anquiitztoque huan ni tlali tlapohuis huan quintolos ica nochí catli inijuanti quipiyaj, huan nochí huetzise yoltoque tlalijtic, huajca anquimatise para ni tlacame quiixpanotoque TOTECO.

<sup>31</sup> Huan quema tlanqui camanalti Moisés, nopa tlali motlapo campa inijuanti itztoyaj, <sup>32</sup> huan quintolo nochí nopa tlacame catli mosentilijtoyaj ihuaya Coré inihuaya ininsihuajhua huan ininconehua catli inihuaya itztoyaj huan nochí catli quipiyayayaj. <sup>33</sup> Huan nochí inijuanti huetzque yoltoque tlalijtic ica nochí catli eliyaya iniaxca, huan nopa tlali sempa motzajqui. Quej nopa nochí catli tlajtlacolchijque polijke huan ayacmo itztoyaj ica nopa israelitame. <sup>34</sup> Huan quema nopa israelitame catli itztoyaj ininnechca quicajque cuatzajtzique catli huetziyayaj, motlalojet-

jque huan quijtojtiyajque: “Huelis techtolos nojquiya.” <sup>35</sup> Huan nojquiya TOTECO quititlanqui tlilt huan quintlamitlati nochi nopa 250 tlacame catli quitlatijtoyaj nopa copali.

<sup>36</sup> Huajca TOTECO quiilhui Moisés:

<sup>37</sup> “Xijnahuati Eleazar itelpoca Aarón para ma quiqxiti nochi nopa popochcomitl catli mopantía ipan nopa tlilt campa mijcatzitzí pampa tlatzejzeloltic. Ma quisemana huan ma quisehui nopa tlicoli <sup>38</sup> catli eltoc ipan sesen ininpopochco nopa tlacame catli tlajtlacolchijque huan yeca mijque, pampa mochijque tlatzejzeloltique nopa popochcome quema quitequihuijque noixpa. Xiquincuica huan xiquintejtejzonaca para ica nopa tepestli anquichihuile se itzajca nopa tlaixpamitl. Huan nopa israelitame quiitase huan quielnamisque para san itelpocahua Aarón hueli quitlatise copali noixpa.”

<sup>39</sup> Huajca nopa totajtzi Eleazar quisentili nochi nopa popochcome tlen bronce catli quihuicatoyaj nopa tlacame catli mijque huan tlanahuati ma quichihuilica se itzajca nopa tlaixpamitl. <sup>40</sup> Huan ya nopa elis se nemachiltli para nochi israelitame, para niyon se catli amo itelpoca Aarón amo hueli monechcahuis campa tlaixpamitl para quitlatis copali iixpa TOTECO para amo quipantis catli quiajsic Coré huan nochi catli quitoquiliyayaj. Huan nochi mochijqui san quen TOTECO quinahuatijtoya Eleazar ica Moisés.

<sup>41</sup> Huan ne seyoc tonal ica ijnaloc, nochi nopa israelitame pejque quinejelnamiquij Moisés ihuaya Aarón. Huan quijtohuayayaj:

—¡Amojuanti anquinmijmictijtoque nochí imasehualhua TOTECO!

<sup>42</sup> Huajca nochí nopa tlacame catli mosansejctolalijtoyaj para quinhuilanase Moisés huan Aarón tlachixque campa nopa yoyon tiopamitl, huan quiitaque nopa mixtli quitlapachojtoya, huan monextiyaya itlatlanex TOTECO. <sup>43</sup> Huajca quinechcahuijque Moisés ihuaya Aarón nopa yoyon tiopamitl campa mopantíaj ihuaya TOTECO. <sup>44</sup> Huan TOTECO quiilhui Moisés:

<sup>45</sup> —Ximoiyocatlalica tlen ni fiero tlacame, huan niquintzontlamiltis ipan san se tlatoctzi.

Huan Moisés huan Aarón motlancuaquetzque huan motlancuaixtlapachojque iixpa TOTECO.

<sup>46</sup> Huan teipa Moisés quiilhui Aarón:

—Xijcui nopa popochcomitl huan ipan xijtlali tlicoli catli eltoc ipan tlaixpamitl, huan xijtlali copali, huan nimantzi xiya campa itztoque nopa israelitame. Huan ica ya nopa tiquixtzacuas inintla-jtlacolhua, pampa icualancayo TOTECO tlejcotoc huan ya pejqui se hueyi cocolistli catli quinmictía.

<sup>47</sup> Huajca Aarón quichijqui catli Moisés quinahuatijtoya, huan motlalojtiyajqui campa mosentilijtoyaj nopa israelitame. Huan nopa cocolistli catli TOTECO quintitlanilijtoya ya pejtoya huan campa hueli israelitame miquiyayaj. Huajca Aarón quitlati nopa copali huan quiixtzajqui inintlajtlacolhua nopa israelitame. <sup>48</sup> Huan moquetzqui tlatlajco inijuanti catli ya mictoyaj huan inijuanti catli noja yoltoyaj, huan nopa miquilistli huan nopa cocolistli moquetzqui. <sup>49</sup> Huan ica nochí, inijuanti

catli mijque ipan nopa cocolistli elque 14 mil 700 huan ni iyoca eliyaya tlen inijuanti catli mijque ihuaya Coré. <sup>50</sup> Teipa mocuepqui Aarón campa itztoya Moisés ipan ipuerta nopa yoyon tiopamitl campa mopantíaj ihuaya TOTECO pampa ya tlantoya nopa miquilistli.

## 17

### *Icuatopil Aarón catli chamanqui*

<sup>1</sup> Teipa TOTECO quicamanalhui Moisés huan quihilhui:

<sup>2-3</sup> “Xiquinnahuati nopa tlayacanani ipan sesen hueyi familia ma nechhualiquilica se cuatopili. Ica nochí, mochihuase 12 cuatopilme catli nechhualiquilise. Huan ipan sesen tiquijcuilos itoca catli quihualicac, pampa sesen tlayacanquetl tlen se hueyi familia quipiya se cuatopili. Huan tiquijcuilos itoca Aarón ipan nopa cuatopili catli huala ipan nopa hueyi familia Leví. <sup>4</sup> Huan nochí xijtlalica calijtic ipan nopa yoyon tiopamitl campa timopantíaj. Xijtlalica iixpa nopa caxa catli quipiya nopa camanali catli nijchijqui amohuaya. <sup>5</sup> Huan na nijchihuas para ma chamani icuatopil catli na nijtlapecjenijtoc. Huan ica ya ni nopa israelitame ayacmo nechcualancamacase pampa anmechejelnamiquij.”

<sup>6</sup> Huan Moisés quinlhui nopa israelitame, huan sesen catli tlayacanayaya ipan se hueyi familia quimacac icuatopil, huan quej nopa quisentili nopa 12 cuatopilme. Huan ihuaya nopa cuatopilme nojquiya eltoya icuatopil Aarón. <sup>7</sup> Huan Moisés quitlali nopa cuatopilme iixpa TOTECO

campa más calijitic ipan nopa yoyon tiopamitl campa mocahua nopa caxa.

<sup>8</sup> Huan hualmostla quema Moisés sempa yajqui ipan nopa yoyon tiopamitl, quiitac ya chamantoya icuatopil Aarón catli quitocaro nopa hueyi familia tlen Leví. Huan icuatopil Aarón quipixtoya ichamanca, ixochiyo, huan hasta nojquiya temacatoya almendras icsitoc. <sup>9</sup> Huajca Moisés quinquixti nochí nopa cuatopilme catli eltoya iixpa TOTECO huan quinnextili nochí nopa israelitame. Huan nopa israelita tlayacanani san quisentlachili que catli panotoya huan sesen quicuic icuatopil.

<sup>10</sup> Huajca TOTECO quiilhui Moisés: “Sempa xijtlali icuatopil Aarón iixmelac nopa caxa huan nopona mocahuas quen se tlanextilijcayotl catli quinelnamiquiltis nochí israelitame catli panoc ica nopa masehualme catli motochonchijque huan pejque nechcualancaitaj. Huan sintla sequinoc sempa nechejelnamiquise, tiquinnextilis ni tlanextili para ma quiquetzaca inintzontochonyo huan amo niquinmictis.”

<sup>11</sup> Huan Moisés quichijqui nochí quen TOTECO quinahuati. <sup>12</sup> Pero nopa israelitame noja quiejelnamiquiyayaj Moisés huan quijtihuayayaj: “¡Timopolojtoque! ¡Nochi timiquise!” <sup>13</sup> Pampa nochí miquij catli monechcahuíaj campa nopa yoyon tiopamitl tlen TOTECO. Huajca senquistoc nochí tojuanti timiquise, ¿amo que?”

*Inintequi nopa totajtzitzi huan levitame*

<sup>1</sup> Teipa TOTECO quiilhui Aarón: “Ta ihuaya motelpocahua huan moixhuihua catli hualahuij ipan mofamilia anquihuicase tlajtlacoli sintla acajya quichihuas amo tlapajpactli nopa yoyon tiopamitl. Nojquiya anquihuicase tlajtlacoli sintla amo mochijtoc senquistoc nochí catli monequi ipan amotequi quen antotajtzitzi.

<sup>2</sup> Xiquinhualicaca amoteiximatcahua catli nojquiya hualahuij ipan nopa hueyi familia Leví, huan ma anmechpalehuica, ta ihuaya motelpocahua, ipan nopa tequitl catli monequi anquichihuase ipan noyoyon tiopa. <sup>3</sup> Quena, moteiximatcahua anmechpalehuise ipan sequin tlamantli tequitl. Pero san ta, Aarón, ihuaya motelpocahua hueli anmonechcahuise campa cuamesas o tlaixpamitl pampa antlatzejtzelotlique. Huan sintla sequinoc monechcahuise, miquise, huan ta nojquiya timquis. <sup>4</sup> Inijuanti anmechpalehuise ipan nochí tequitl catli monequis ipan ni yoyon tiopamitl campa timopantíaj, pero niyon se tlacatl catli amo levita amo huelis monechcahuis campa amojuanti. <sup>5</sup> San ta huan motelpocahua hueli antequitise campa cuamesas huan campa nopa tlaixpamitl. Huan sintla quej nopa mochihuas, huajca ayacmo nicualanis ica amojuanti anisraelitame. <sup>6</sup> Pampa na niquinquitoc moicnihua, nopa levitame, huan niquinquixtijtoc ipan nochí ne sequinoc israelitame para nimechmacas quen totajtzitzi para ma anmechpalehuica ipan nopa tequitl catli monequi calijtic ipan nopa yoyon tiopamitl.

<sup>7</sup> Pero san ta, Aarón, ininhuaya motelpocahua huelis antlatlatise huan anquichihuase nochi nopa tequitl tlatzejzelotic catli mochijtoc campa tlaixpamitl, huan nochi catli mochijtoc más tiopan calijtic Campa Más Tlatzejzelotic iica nopa cortina pampa na nimechtalijtoc antotajtzitzi. Huan nopa hueyi tequitl catli anquichihuase, na nimechmacatoc quen se nemactli. Huan san amojuanti huelis antechchihuilise nopa tequitl tlen totajtzitzi quen nimechnahuatijtoc. Huan sintla seyoc catli amo totajtzi quichihuas itequi se totajtzi, monequi anquimictise.”

*Quenicatza mopanoltise totajtzitzi huan levitame*

<sup>8</sup> Nojquiya TOTECO quiilhui Aarón:

“Na nimechmacatoc nochi tlacajcahualistli catli israelitame quihuijhuisose noixpa. Quena, nochi tlacajcahualistli tlatzejzelotic elis amoaxca pampa nimechmacatoc, ta huan motelpocahua. Ni elis se tlanaahuatili para nochipa. <sup>9</sup> Elis amoaxca nochi nopa partes tlen nopa tlatzejzelotic tlacajcahualistli catli amo quiajsi tlitl. Amoaxca nochi nopa tlacajcahualistli tlen harina, huan nochi tlacajcahualistli por tlajtlacoli, huan nochi tlacajcahualistli catli nechmacaj pampa quihuicaj tlajtlacoli noixpa. Nochi ya ni niquiyocatlalijtoc para anquitequihuise. <sup>10</sup> San nopa quentzi catli nimechnahuatijtoc anquitlatise ipan tlaixpamitl tlen sesen tlacajcahualistli elis para na. Nochi antotajtzitzi ininhuaya amotlaca conehua huelis anquicuase ni tlacajcahualistli catli tlatzejzelotic, pero san hueli anquicuase campa tlatzejzelotic.

<sup>11</sup> “Nojquiya nimechmaca nochí tlacajcahualistli tlahuisolí, huan nojquiya huelis quicuase amoconeuhua masque oquichpilme o sihuapilme. Nochi ya ni anmechtocaros para elis amoaxcahua para nochipa. Aquí hueli tlen amoteiximatahúa catli tlapajpactli noixpa, huelis quicuas ni tlacajcahualistli. <sup>12</sup> Nojquiya nimechmaca, antotajtzitzi, nochí iniachtíhui tlajca ininmil nopa israelitame catli inijuanti nechhualiquilíaj sesen xihuitl. Elis catli achi más cuali tlen nochí aceite, nochí xocomeca atl, huan nochí trigo. <sup>13</sup> Nopa catli achtíhui pixcase israelitame ipan inintlatohui huan nechmacase, nochí elis para antotajtzitzi huan amoteiximatahúa catli tlapajpacme noixpa. <sup>14</sup> Nochi catli tlaiyocatlalili para na ipan inintlá israelitame, elis para amojuanti.

<sup>15</sup> “Nojquiya elise amoaxcahua iniachtíhui coneuhua israelitame, huan iachtihui cone sese inintapiyal. Nochi ya ni nechmacase huan elis para amojuanti. Pero inijuanti sempa nechcohuilise iniachtíhui coneuhua. Nojquiya nochí iniachtíhui conetapiyalhua catli amo tlapajpactli nechcohuilise ica ininpati catli ta tiquitas para cuali. <sup>16</sup> Quema iniachtíhui coneuhua quipiyase se metztlí, nechcohuilise ica macuili tomi tlen plata catli sesen quipiya 11 gramos ietica ipan nopa tlatamachihuali tlen tiopamitl. Huan ya nopa tijselis para ininpati sese iniachtíhui cone.

<sup>17</sup> “Pero amo xiquincahua ma tlaxtlahuaca para nechcohuilise catli achtíhui tlacatis tlen ininhuacaxhua o ininborregojhua o ininchivojhua. Nopa tlapiyalme iniachtíhui coneuhua elise san para na.

Huan monequi tiquinmictis, huan inieso xijtzejtzelos ipan nopa tlaixpamitl. Huan ininchiyajca xijtlati quen se tlacajcahualistli tlatlatili catli ajhuiyac mijyotía para na. <sup>18</sup> Pero quema israelitame nechmactilise huacaxme, borregojme huan chivojme, nopa nacatl catli quihuisose noixpa para nechmacase quen ininyolix huan ininmetztomahuiya nopa tlapiyalme, elis para anquitequi-huisse. <sup>19</sup> Huajca nochí catli nopa israelitame quiyocatlalíaj para quihuisose noixpa, nimechmaca ta ininhuaya motelpocahua para ma quicuaca amoconehua, masque oquichpilme o sihuapilme. Ni elis se tlanahuatili para nochipa. Ni se camanali catli nimechtencahuilía, ni amo TECO. Nochi ya ni nimechmacas. Huan quen istatl amo quema quipolos ipoyeca, nojquiya nocamanal amo quema tlamis ica ta, Aarón, huan ica moixhuihua.”

<sup>20</sup> Nojquiya TOTECO quiilhui Aarón:

“Antotajtzitzí huan anlevitame, amo anquiselise tlali para amoaxca quema anajsise ipan nopa cualí tlali campa anyase, huan quema momajmacase catli quitlanise ipan tlahuilancayotl, amo tleno anmechtocaros. Pampa ipatlaca nopa tlali catli ne sequinoc israelitame quinaxcatise, annechpiyase na. Huan na nielis niamoaxca huan na catli anmechtocaros, huan san ya nopa monequi.

<sup>21</sup> “Huan amoicnihua catli iteipan ixhuihua Leví catli amo totajtzitzí, niquinmacas nopa diezmos catli nechmacaj nochí israelitame. Ica ya ni niquintlaxtlahuis tlen inintequi catli quichihuaj ipan nopa yoyon tiopamitl campa timopantíaj.

**22** Ayacmo huelis monechcahuis campa yoyon tiopamitl campa timopantíaj niyon se israelita catli amo totajtzi, o amo se levita; pampa sintla quinechcahuis, quihiucas itlajtlacol, huan nopona miquis. **23** San levitame tlapalehuise ipan ni yoyon tiopamitl campa timopantíaj. Huan inijuanti quihiucose tlajtlacoli sintla catli amo cuali mochijtoc nopona. Huajca ni elis se tlanahuatili para nochipa catli panos tlen tetajme hasta inincone hua iniixpa nochi israelitame: niyon se levita amo hueli quiselis catli ya itlal. **24** Pero niquinmacatoc levitame nochi diezmos [18:24 Diezmos quinequi quiijtos 10 por ciento. Ya nopa quinequi quiijtos tlen sesen majtlactli tlapiyalme catli quintlacatiltise itlapiyalhua se masehuali, quimacas TOTECO se tlapiyali. O quimacas TOTECO se cuartillo tlen sesen majtlactli cuartillos catli itlajca imil.] catli israelitame nechmacaj na, niamoTECO. Huan yeca niquijtojtoc tlen inijuanti: Anlevitame amo anquiselise tlali para amoaxca quema ne sequinoc amoisraelita icnihua quiselise.”

**25** Huajca TOTECO quicamanalhui Moisés huan quihilhui:

**26** “Xiquinilhui nochi ne sequinoc levitame quema quiselise nopa diezmos catli israelitame nechmacase huan catli niquinmacatoc para iniaxca, inijuanti quipiyaj para quiqxistise se diezmo huan nechmacase na, niamoTECO. Elis se diezmo tlen nochi diezmos san sejco. **27** Huan na, niamoTECO, niquitas ya ni quen elisquía inindiezmo tlen trigo o tlen xocomeca atl catli nechmacase sintla quipixtosquíaj inintlatl.

<sup>28</sup> Huajca quej nopa levitame catli quiselise nopa diezmos catli nechmacase israelitame, nojquiya quiyyocatlalise se diezmo para na, niininTECO, huan quimacase nopa totajtzi Aarón. <sup>29</sup> Huan quema levitame nechmacase nopa diezmo tlen nochi nopa diezmos catli quiseliitoque, monequi quitlapejpenise catli achi más cuali huan achi más tlatzejzeloltic tlen nochi para nechmacase.

<sup>30</sup> “Xiquinilhui nopa levitame nojquiya quema quiyyocatlalijtoque catli achi más cuali para na, catli mocahua huelis quiitase quen inintrigo huan ininxocomeca atl. <sup>31</sup> Huan hueli quicuase campa quinequise inihuaya ininteiximatcahua. Ya nopa elis inintlaxtlahuil pampa tequipanohuaj ipan ni yoyon tiopamitl campa timopantíaj. <sup>32</sup> Quema ya quiyyocatlalijtoque nochi catli achi más cuali para na, huelis quicuase nochi catli mocajtoc, huan amo se tlajtlacoli, pampa ya nechmacatoque catli achi más cuali. Pero xiquinilhui nopa levitame ma momocuitlahuica para amo san quen hueli quiitase nochi nopa tlacajcahualistli catli tlatzejzeloltic catli nechmacaque israelitame para amo miquise.”

## 19

### *Quenicatza ma tetlapajpacchihuaca*

<sup>1</sup> TOTECO nojquiya quinilhui Moisés huan Aarón:

<sup>2</sup> “Ni se tlanahuatili catli ama na, niamoTECO, nimechmaca: Xiquinilhui nochi israelitame san sejco ma nechhualiquilica se huacax catli quipyia iihuiyo achi chichiltic. Monequi elis se huacax catli amo quipyia tleno catli amo cuali, huan

catli amo aqui quitequihuijtoc para tlapoxonis. <sup>3</sup> Huan ma quimactilica nopa totajtzi Eleazar, huan ya quiqxitis huejca tlen amoaltepe huan tlanahuatis para se ma quimicti iixpa. <sup>4</sup> Huan nopona nopa totajtzi Eleazar quicuis se achi ieso ica imacpil huan quiixmelac itas nopa yoyon tiopamitl ica huejca, huan tlaatzejtzelos iixmelac chicome hueltas ica nopa estli. <sup>5</sup> Teipa se quitlatis nochis nopa huacax iixpa Eleazar. Quitlatis icuetlaxo, inacayo, ieso huan icuitl. <sup>6</sup> Huan quema tlatlas, nopa totajtzi quicuis se cuahuitl tlen tiocuahuitl, se imacuayo nopa xihuitl itoca hisopo, se quentzi borrego ichcatl tlen chichiltic, huan quimajcahuas nochis ipan tlilt campa tlatla nopa huacax.

<sup>7</sup> “Teipa nopona nopa totajtzi monequi quichicuenis iyoyo, huan maltis cuali ica atl. Huan teipa huelis mocuepas sempa campa amoaltepe catli amoyoyoncalhua, pero nopa totajtzi mocahuas amo tlapajpactli noixpa hasta tlayohua huan huajca, quena, elis tlapajpactli. <sup>8</sup> Huan nopa tlacatl catli quitlatis nopa huacax, nojquiya monequi quichicuenis iyoyo nopona huan maltis ica atl; huan mocahuas amo tlapajpactli noixpa hasta tlayohua. Huan teipa ya nojquiya elis tlapajpactli. <sup>9</sup> Huan teipa seyoc tlacatl catli tlapajpactli noixpa, quisentilis nopa cuanextli tlen nopa huacax huan quiajocuis huejca tlen amoaltepe ipan se lugar catli quitlapajpacchijtoque noixpa. Huan nopona mocahuas nopa cuanextli para anisraelitame anquitequihuise para ica anquichihuase se atl para ica motlapajpacchihuase catli ayamo

tlapajpacme noixpa huan nopa atl quinquixtilis intintlajtlacol. <sup>10</sup> Huan nopa tlacatl catli eliyaya tlapajpactli, pero quisentili nopa cuanextli, mochijtoc amo tlapajpactli noixpa, huan monequi quichicuenis iyoyo. Huan mocahuas amo tlapajpactli noixpa hasta tlayohua. Huajca quej nopa anquisencahuase nopa atl, huan anquitequihuise para anmotlapajpacchihuase noixpa. Huan amo san anisraelitame anquitequihuise, pero nojquiya quitequihuise seyoc tlali ehuani catli itztose amohuaya, huan para nochipa huejcahuas ni tlanahuatili.

<sup>11</sup> “Quema se acajya quiitzquis se mijcatzi, mochihuas amo tlapajpactli noixpa para chicome tonali. <sup>12</sup> Huan ipan eyi tonali huan ipan chicome tonali, monequi motlapajpacchihuas ica nopa atl catli tetlapajpacchihua noixpa, huan elis tlapajpactli. Pero sintla se amo motlapajpacchihuas ipan nopa eyi huan nopa chicome tonali, elis amo tlapajpactli noixpa. <sup>13</sup> Pampa sintla acajya quiitzquia itlacayo se mijcatzi, huan amo motlapajpacchihuas quen ijcuilijtoc, quichihuas amo tlapajpactli nopa yoyon tiopamitl campa na nimocahua amohuaya, huan nopa tlacatl monequi anquimictise para ayacmo itztos amohuaya anisraelitame. Miquis san pampa amo quiatzejzelhuique ica nopa atl catli tetlapajpacchihua huan yeca elis amo tlapajpactli noixpa.

<sup>14</sup> “Ya ni se tlanahuatili para quema se acajya miquis ipan se yoyoncali. Nochi catli mopantíaj calijtic ihuaya huan nochi catli calaquise noppa mocahuase amo tlapajpacme noixpa para chicome tonali. <sup>15</sup> Nochi tazajme huan nochi tla-

mantli catli eltoya calijtic catli amo tlahuatl tzactoc  
elis amo tlapajpactli.

<sup>16</sup> “Sintla se itztoc campa mili huan quiitzquis se mijcatzi catli quimictijtoque ipan tlahuilancayotl o ica tlen hueli tlamatli, mochihuas amo tlapajpactli. O sintla se san quiitzquis se iomiyo se mijcatzi, o quiitzquis tlali campa quitlaltojque se mijcatzi elis amo tlapajpactli noixpa para chicome tonali.

<sup>17</sup> “Huajca quema acajya quitocaros mochihuas amo tlapajpactli quej nopa, para huelis motlapajpacchihuas, monequi xijcuica achi icuanexo nopa huacax catli quitlatijque quen se tlacajcahualistli por tlajtlacoli, huan xijtlalica ipan se comitl huan xijtequilica atl tlen se ameli. <sup>18</sup> Huan se tlacatl catli tlapajpactli noixpa quicuis se imacuayo nopa xihuitl itoca hisopo, huan quixolonis ipan nopa atl huan quiatzejzelhuis catli mochijtoc amo tlapajpactli. Huan sintla nopa mijcatzi mijqui calijtic, monequi quiatzejzelhuis nopa yoyoncali, huan nochitlamantli catli tlapojtoya calijtic, huan nochitlamantli itztoyaj nopona. Huan sintla mochijtoc amo tlapajpactli pampa quiitzqui itlacayo se catli mijqui huejca ipan tlahuilancayotl o ica tlen hueli tlamatli, o sintla quiajsic se iomiyo se mijcatzi o quiitzqui campa quitoctoyaj se mijcatzi nojquiya quiatzejzelhuis. <sup>19</sup> Se catli tlapajpactli noixpa monequi quiatzejzelhuis ya catli mochijtoc amo tlapajpactli ipan eyi tonali huan ipan chicome tonali. Huan ipan nopa chicome tonali nojquiya monequi ya catli mochijtoya amo tlapajpactli maltis ica atl huan quichicuenis iyoyo huan quema ajsis tlayohua elis tlapajpactli.

**20** “Pero sintla se mochijtoc amo tlapajpactli noixpa huan amo motlapajpacchihuas, san mocahuas amo tlapajpactli, monequi anquimictise para ayacmo itztos amohuaya. Miquis pampa quichihuas amo tlapajpactli noyoyon tiopa catli eltoc amohuaya, pampa amo moatzejzelhuijtoc ica nopa atl catli quitlapajpacchihuasquia. **21** Ni elis se tlanahuatili para nochipa. Huan ya catli quiatzejzelhuia seyoc ica nopa atl catli tetlapajpacchihuas nojquiya monequi quichicuenis iyoyo, pampa aqui hueli quiajsis nopa atl catli tetlapajpacchihuas, mocahuas amo tlapajpactli hasta tlayohua. **22** Nojquiya nochi tlamantli catli se tlacatl catli amo tlapajpactic noixpa quiajsis o quiitzquis, mochihuas amo tlapajpactic. Nojquiya nochi catli quiitzquia nopa tlamantli catli amo tlapajpactic, mocahuas amo tlapajpactic hasta tlayohua.”

## 20

### *Quisqui atl ipan nopa hueyi tepexitl*

**1** Huan nopa israelitame sempa aj sitoip ipan nopa huactoc tlali catli itoca Zin ipan abril, nopa achtihui metztlip ipan ininyancuic xihui, huan mocajque campa itoca Cades. Huan nopona mijqui María, huan quitlaltojque.

**2** Huan amo oncayaya atl nopona para quijise nopa israelitame. Huan sempa mosentilijque huan mosisinijque ica Moisés huan Aarón, **3** huan quiixcoihuijque Moisés:

—Achi más cuali timictosquíaj inihuaya nopa sequinoc israelitame catli TÓTECO quinmicti iixpa. **4** ¿Quenque techhualicac, tiimasehualhua

TOTECO, ipan ni huactoc tlali para tojuanti huan totlapiyalhua ma timiquica nica? <sup>5</sup> ¿Para tlen techquixtijque nepa ipan tlali Egipto huan antechhualicaque nica campa nelía tlahuel fiero? Amo quipiya tlatoctli, niyon higos, niyon xocomeca mili, niyon granada. ¡Niyon amo onca atl para tiquijise!

<sup>6</sup> Huan Moisés ihuaya Aarón quincajtejque nopa miyaqui israelitame puertajteno huan calajque ipan nopa yoyon tiopamitl campa mopantíaj ihuaya TOTÉCO, huan nopona motlancuaquetzque huan mohujitzonque tlalchi, huan itlatlanex TOTECO monexti iniixpa. <sup>7</sup> Huan TOTECO quiilhui Moisés:

<sup>8</sup> —Xicuitehua icuatopil Aarón, huan xiya ihuaya ya huan xiquinsentiliti nochí israelitame. Teipa iniixpa nochí israelitame xijnojnotza nopa hueyi tetl, huan xiquilhui ma anmechmaca atl. Huan quej nopa anquiquixtise atl ipan nopa tepexitl para nochí ma atlica ininhuaya inintlapiyalhua.

<sup>9</sup> Huajca Moisés quicuic nopa cuatopili catli el-toya iixpa TOTECO, senquistoc quen quinahuati-toya. <sup>10</sup> Huan Moisés ihuaya Aarón quinsentili-jque nochí nopa israelitame iixpa nopa tepexitl, huan Moisés quinilhui:

—¡Xitlacaquica anmosisinijsca masehualme! ¿Huelis monequi tojuanti ma timechquixtilica atl ipan ni hueyi tepexitl para timechamacase?

<sup>11</sup> Huan quema Moisés quijto ya ni, quitlananqui imax huan ome huelta quitzohuitejqui nopa hueyi tepexitl ica nopa cuatopili. Huan tlahuel

miyac atl quisqui, huan nochí nopa israelitame ininhuaya inintlapiyalhua pejque atlij.

**12** Pero TOTECO quiilhui Moisés ihuaya Aarón:

—Pampa amo anmotemachijque ipan na, huan amo anquinnextilijque nopa israelitame para na nitlatzejzeloltic huan niiyoca tlen nochí sequinoc, amo anquinyacanase ipan nopa tlali catli nimechmacatoc.

**13** Huan quitocaxtijque campa itztoyaj Ameli Tlen Meriba (Meriba quijitosnequi “campa monajnanquilijque”), pampa nopona nopa israelitame monajnanquilijque ica TOTECO huan ya quinnextili para yaya tlatzejzeloltic huan nelía iyoca.

### *Amo huelque pano ipan tlali Edom*

**14** Quema nopa israelitame itztoyaj ipan Cades, Moisés quintitlanqui sequin itlayolmelajcahua ma quiitatij nopa tlanahuatijquetl tlen tlali Edom para ma quiilhuica ni camanalí:

Tojuanti tiiteipan ixhuihua Israel catli huejcahya eliyaya iicni mohuejcapan tata. Ta cuali tijmati nopa tlaohuijcayotl catli topantitoc. **15** Tohuejcapan tatahua yajque ipan tlali Egipto huan nopona huejcajque para itztose, pero nopa Egipto ehuani tlahuel techtlaijiyohuiliyyayaj. **16** Pero quema ti-jtzatzilijque TOTECO ma techpalehui, techt-lacaquili huan techtitlanili se itequihua, huan techquixti ipan nopa tlali Egipto.

Huan ama nica tiitztoque ipan Cades, se altepetl campa monepantía ica motlal. **17** Yeca tim-itztlajtlaníaj techmaca caquihuili tipanose ipan motlal. Amo ticalaquise campa onca

toctli o campa se xocomeca mili, niyon amo tiquijise atl tlen niyon se moamelhua. San tiyase ipan nopa hueyi ojtli huan amo tijcahuase nopa ojtli hasta quema tiquistose ipan motlal.

**18** Pero nopa hueyi tlanahuatijquetl tlen tlali Edom quinnanquili:

Amo timechcahuilise anpanose ipan totlal. Huan sintla anhualase, na ihuaya nosoldados timechnamiquise.

**19** Pero nopa israelitame sempa quijtojque:

San tiyase ipan nopa ojtli catli nochí quitequihiúaj, huan sintla tojuanti o totlapiyahua quijijise amoa, timechtlahtlahuise. San techchihuilica se favor huan techcahuilica tiicxinejne-mise ipan amotlal.

**20** Pero nopa hueyi tlanahuatijquetl tlen tlali Edom quinnanquili:

¡Amo anpanose!

Huan quisqui ica miyaqui isoldados catli qui-huicayabaj inintepos para quinnamiquitij nopa israelitame. **21** Huajca pampa nopa tlanahuatijquetl tlen tlali Edom amo quinejqui ma panoca nopa israelitame ipan itlal, moicancuepque tlen itlal huan quitemojque seyoc ojtli.

### *Mijqui Aarón*

**22** Teipa nochí nopa israelitame quisque ipan altepetl Cades, huan nejnentiyajque hasta itzintla nopa tepetl Hor. **23** Huan nopona itzintla tepetl Hor nechca campa monepantía ihuaya tlali Edom, TOTECO quinilhui Moisés ihuaya Aarón:

**24** “Ya ajsic hora para miquis Aarón. Amo calaquis ipan nopa cuali tlali catli na niquinmacatoc israelitame, pampa nepa campa Améli Meriba amo anquineltocaque catli na nimechnahuati. **25** Huajca ta, Moisés, xihuica Aarón ihuaya icon Eleazar tepeixco ipan tepetl Hor. **26** Huan nopona xijquixtilis Aarón iyoyo tlen totajtzi huan xijtlalili Eleazar, pampa nopona miquis Aarón.”

**27** Huajca Moisés quichijqui senquistoc quen TOTECO quinahuati. Huan nochí inijuanti tlej-coque ipan tepetl Hor iniixpa nochí israelitame. **28** Huan nopona Moisés quiqxtili Aarón iyoyo tlen totajtzi huan quitlalili Eleazar, itelpoca. Huan nopona tepeixco mijqui Aarón, huan Eleazar ihuaya Moisés temoque ipan nopa tepetl. **29** Huan quema momacaque cuenta nopa israelitame para mictoya Aarón, quichoquilijque para 30 tonali.

## 21

### *Nopa israelitame quintlanque nopa cananeos*

**1** Itztoya se hueyi tlanahuatijquetl cananeo catli tlanahuatiyaya ipan altepetl Arad ipan tlali Neguev, huan ya quicajqui para nopa israelitame hualayayaj ipan ojtli tlen Atarim. Huajca mot-lananqui para quinhuilanati huan quinitzquijque sequin israelita tlacame huan quinhuicaque ilpitoque. **2** Huajca nopa israelitame quichijque se camanali ica TOTECO. Quilhuijque sintla quinpale-huisquía para quintlanise nopa cananeos, quint-zontlamiltisquíaj nochí catli itztoyaj nopona ica inialtepehua. **3** Huan TOTECO quintlacaquila nopa israelitame huan quinpalehui ma quintlanica

nopa cananeos. Huan nopa israelitame quintlamimictijque huan quisosolojque nochí nopa altepeme. Huajca npona pejqui motocaxtía Horma. (Horma quiijtosnequi “tlasosololi”.)

*Nopa tepos cohuatl tlen bronce*

<sup>4</sup> Teipa nopa israelitame quisque campa tepetl Hor huan yajque ipan ojtli catli yohui para Chichiltic Hueyi Atl para quiyahualose tlali Edom para amo calaquise. Pero ipan ojtli ayacmo quipixque ininyolo, <sup>5</sup> huan pejque tlen hueli camanaltij ica Toteco Dios huan ica Moisés. Quiijtohuayayaj:

—¿Para tlen antechquixtijque ipan tlali Egipto para ma timiquica ipan ni huactoc tlali? ¡Amo tlenó onca catli huelis tijcuase, niyon atl para tiquijise! ¡Huan techyolajsic ni maná catli techmaca para tlacualistli pampa nelía fiero!

<sup>6</sup> Huajca TOTECO quintitlanili cohuame catli quipixque inintencococa huan quema quintzacañiyayaj, elqui quen quintlatiyayaj huan nimantzi miquiyayaj. Huan ica ya nopa mijque miyaqui israelitame. <sup>7</sup> Huajca yajque nopa israelitame campa itztoya Moisés huan quiilhuijque:

—Titlajtlacolchijtoque pampa ticamanaltitoque catli amo cuali ica TOTECO, huan ica ta. ¡Xijtlajtlani TOTECO ma quinijcuini nopa cohuame!

Huan Moisés quitlajtlani TOTECO por nopa israelitame. <sup>8</sup> Huajca TOTECO quiilhui Moisés:

—Xijchihua se cohuatl tlen bronce catli nesis quen se tlen nopa cohuame. Huan xijtlali huejcapa teposatipa, huan quema se acajya quitzacanis se cohuatl, ma quitlachili nopa cohuatl catli

eltos huejcapa ipan se asta, huan catli quitlachilis, momaquixtis.

<sup>9</sup> Huan Moisés quichijqui se cohuatl ica bronce huan quitlali huejcapa teposatipa huan quema se acajya quitzacaniyaya se cohuatl, san quitlachiliyaya nopa cohuatl tlen bronce huan amo miquiyaya.

*Nopa ojtli campa nejnentiyajque israelitame*

<sup>10</sup> Huan nopa israelitame quitoquilijque iniojhui huan teipa quiquetzque ininyoyoncalhua hasta Obot. <sup>11</sup> Huan quistejque tlen Obot huan quitoquilijque iniojhui huan mochihuatoj ipan Ijeabarim ipan nopa huactoc tlali ica campa hualquisa tonati tlen tlali Moab. <sup>12</sup> Huan teipa sempa quitoquilijque iniojhui huan quiquetzque ininyoyoncalhua ipan nopa Zered tlamayamitl.

<sup>13</sup> Huan teipa quitoquilijque iniojhui huan mochihuatoj ipan neca nali tlen nopa hueyatl Arnón. Nopa hueyatl Arnón mopantía ipan nopa huactoc tlali huan onquisa ipan inintlal nopa amorreos, huan eltoc campa monepantía tlali Moab ihuaya inintlal nopa amorreos. <sup>14</sup> Ya ni nojquiya mopantía ijcuilijtoc ipan nopa amatl catli quipiya itlahuilancayo TOTECO, quiijtohua: “Ximoilhui catli Toteco quichijqui ipan nopa

Hueyi Atl Chichiltic,

huan ipan nopa pilatentzitzti tlen nopa hueyatl Arnón.

<sup>15</sup> Camanalti tlen nopa miyac atentli catli yohují hasta tlali Ar,

huan tlami campa monepantía ica tlali Moab.”

<sup>16</sup> Huan nopa israelitame quistejque nopa hueyatl Arnón huan quitoquilijque iniojhui hasta Beer. (Beer quinequi quiijtos “ameli”.) Nopona TOTECO quilhui Moisés: “Xiquinsentili nochí nopa israelitame huan niquinmacas atl.”

<sup>17</sup> Huajca elqui ipan nopa tonal quema nopa israelitame huicaque ica paquelistli, quiijtojque: “¡Ma tihuicaca tlen ni ameli:  
Ma meya atl nica!

<sup>18</sup> Huan quisqui atl ipan nopa ameli,  
catli totlayacancahua quixajque.  
Quixajque ica ininmax huan ica inintepospala.  
Quena, ica inincuatopil catli ica tlanahuatíaj,  
techtlaxahuilijque ni ameli.”

Huan nopa israelitame quistejque campa nopa huactoc tlali huan quitoquilijque iniojhui huan panoque Matana, <sup>19</sup> Nahaliel huan Bamot. <sup>20</sup> Huan quisque Bamot huan quitoquilijque iniojhui hasta nopa tlamatayamitl catli eltoya ipan nopa tlali Moab catli eltoya itzintla nopa huejcapantic tepetl Pisga. Itzonatipa nopa tepetl hueliyaya moquetzase huan tlachiyase hasta nopa huactoc tlali campa hualajtoyaj.

### *Israelitame quitlanque Tlanahuatijquetl Sehón*

<sup>21</sup> Nopa israelitame quintitlanque inintlayolmelajcahua ma quiitatij nopa hueyi Tlanahuatijquetl Sehón catli quinnahuatiyaya amoreos, huan ma quilhuica:

<sup>22</sup> Tojuanti tijnequij tipanose ipan motlal. Amo ticalaquise campa antlatojtoctoque, o campa se xocomeca mili. Amo tiquijise atl ipan niyon se amoamel. San tipanose

ipan nopa hueyi ojtli hasta tquisase ipan motlal.

<sup>23</sup> Pero Tlanahuatijquetl Sehón amo quincahuili ma panoca. San quinsentili nochí isoldados huan quisque quinnamiquitij nopa israelitame ipan huactoc tlali, huan ajsitoj campa Jahaza huan mo-huilanque inihuaya. <sup>24</sup> Huajca nopa israelitame quinhuilanque ica ininmachete huan tlatlanque. Huan inijuanti moaxcatijque itlá Sehón catli pejqui ica nopa hueyatl Arnón hasta nopa hueyatl Jaboc. Quinequi quiijtos moaxcatijque itlá Sehón hasta campa monepantía ica inintlá nopa amonitame. Nopa amonitame quipixque inintlá achi más cuáli moyahualojtoyaj que amorreos.

<sup>25</sup> Huajca nopa israelitame moaxcatijque nochí nopa altepeme tlen nopa amorreos huan pejque quitequihuíaj nopa hueyi altepetl Hesbón huan nochí iranchos. <sup>26</sup> Hesbón eliyaya ialtepe Tlanahuatijquetl Sehón huan nopona mosehuiyaya para quinnahuatis nopa amorreos. Sehón quiichtequilijtoya nopa altepetl nopa tlanahuatijquetl tlen moabitame. Nojquiya Sehón quincuilihuiyaya nochí inintlá nopa moabitame hasta nopa hueyatl Arnón. <sup>27</sup> Huan yaya quiijcuilojtoya se tlajcuilojquetl quen Tlanahuatijquetl Sehón tlatlantoya. Quej ni quiijto:

“Xihualaca ipan altepetl Hesbón.

Ma tijcualtlalica para elis nopa altepetl campa tlanahuatis nopa hueyi Tlanahuatijquetl Sehón.

<sup>28</sup> Sehón nochí quisosolo ica nopa tlítli catli pejqui ipan altepetl Hesbón.

Quitlamilti nochí hasta altepetl Ar ipan tlali Moab.  
Quinmicti nochí huejhueyi tlacame catli tlanahu-  
atiyayaj campa itoca Arnón.

<sup>29</sup> ¡Titeicnelti ta titlali Moab! ¡Tipolijtoc!

¡Nojquiya nochí anQuemos ehuani!

Motelpocahua nochí cholojque, huan moichpoc-  
ahua huetzque imaco nopa hueyi Tlanahu-  
atijquetl Sehón.

<sup>30</sup> Yaya quitlamitzontlamiltijtoc nochí ipan alte-  
petl Hesbón huan hasta Dibón huan Nofa.

Huan nopa tlitl catli quipehualti yajqui hasta  
Medeba.”

Quej nopa quijjcuilo nopa tlajcuilojquetl.

*Israelitame quitlanque Tlanahuatijquetl Og  
ipan Basán*

<sup>31</sup> Huajca nopa israelitame quitequihuijque  
catli eliyaya inintla nopa amorreos. <sup>32</sup> Huan tlen  
nopona Moisés quintitlanqui tlacame ma quit-  
lachilitij ichtacatzi nopa altepetl Jazer. Teipa  
nopa israelitame yajque huan moaxcatijque Jazer  
ihuaya nochí altepeme inechca, huan quinpan-  
quixtijque nochí amorreos catli nopona itztoyaj.

<sup>33</sup> Teipa sempa yajque para yase altepetl Basán,  
pero nopa hueyi Tlanahuatijquetl Og ipan Basán,  
motlananqui ica nochí isoldados huan hualajqui  
quinhuilanaqui nopa israelitame campa altepetl  
Edrei. <sup>34</sup> Huan TOTECO quiilhui Moisés: “¡Amo  
xiquimacasica Og! Na ya nijtlalijtoc amomaco ica  
nochí isoldados huan nochí itlal. Huan ta tijchi-  
huilis san se quen tijchihuili Sehón, inintlanahu-  
atijca nopa amorreos catli itztoya ipan altepetl  
Hesbón.”

<sup>35</sup> Huajca quej ni nopa israelitame quimictijque Tlanahuatijquetl Og ihuaya itelpocahua huan nochí isoldados. Nyon se amo quicajque itztoc huan moaxcatijque nochí inintlá.

## 22

### *Balac tlatitlanqui ma quinotzatiij Balaam*

<sup>1</sup> Huan nopa israelitame sempa pejque nejnemij ipan iniojhui huan quiquetzque ininyoyoncalhua ipan nopa tlamayamitl ipan tlali Moab iteno hueyatl Jordán imelac altepetl Jericó.

<sup>2</sup> Huan Balac, icone Zipor, catli eliyaya inintlanahuatijca nopa moabitame, quiitztoya nochí catli nopa israelitame quinchihuilitoyaj nopa amorreos. <sup>3</sup> Huan nojquiya momacac cuenta para itztoyaj tlahuel miyaqui nopa israelitame, yeca yaya huan imasehualhua campa hueli ipan tlali Moab tlahuel majmajque ica injuanti. <sup>4</sup> Huajca nopa moabitame quincamanalhuijque nopa huehue tlacame tlen Madián ehuani huan quinilhuijque: “Ne israelitame quitlamiltise catli eltoc ipan totlá quen se huacax quitlamicua sacatl ipan se potrero.”

Huajca Tlanahuatijquetl Balac catli tlanahuatijaya ipan nopa tlali Moab, <sup>5</sup> quintitlanqui tlacame ma quicamanalhuitij Balaam, se tlachixquetl catli eliyaya icone Beor. Balac itztoya ipan ichaj ipan altepetl Petor nechca nopa hueyi hueyatl Eufrates. Huan Balac quinequiyaya Balaam ma quipalehuiqui, huajca quinilhui nopa tlacame ma quiilhuitij ni camanali:

Hualajtoque tlahuel miyaqui masehualme tlen tlali Egipto huan quiquetzaj ininyoyoncalhua campa hueli hasta quitlamitzacuaj nochi tlali, huan ama mochijtoque noixmelac.<sup>6</sup> Xihuala nimantzi huan techtelchihuiliqui ni masehualme, pampa inijuanti más tetique que tojuanti. Huelis quej nopa nihuelis niquintlanis huan niquintojtocas ipan ni tlali. Pampa cuali nijmati quema ta tijtiochihua se acajya, nelía quiselía se tlatiochihuali huan quema ta tijtelchihua se acajya, nelía quiselía se tlatelchihuali.

<sup>7</sup> Huajca nopa huehue tlacame tlen tlalme Moab huan Madián yajque ica tomi ininmaco para quitlaxtlahuise para ma quintelchihuaqui. Huan quema ajsitoj campa Balaam, quiilhuique nochi catli quinilhuijtoya ma quiilhuica.<sup>8</sup> Huan Balaam quinilhui:

—Ximocahuaca nica ni tlayohua, huan nimechilhuis catli DIOS nechilhuis ma nijchihua.

Huan nopa huehue tlacame mocajque nopa tlayohua ihuaya Balaam.<sup>9</sup> Huan Toteco quinonjnotzqui Balaam, huan quitlatzintoquili:

—¿Ajqueya ne tlacame catli itztoque mohuaya?

<sup>10</sup> Huan Balaam quinanquili:

—Balac, icone Zipor, catli tlanahuatía ipan tlali Moab quintitlantoc para ma nechnotzaca.<sup>11</sup> Quiijtohuaj hualajtoque tlahuel miyaqui masehualme tlen tlali Egipto huan quiquetzaj ininyoyoncalhua campa hueli hasta quitlamitzacuaj nochi tlali, huan ama mochanquetztoque iixmelac. Quinequi ma

niyas nimantzi huan ma niquintelchihuili  
nopa masehualme para huelis quintlanis huan  
quintojtocas.

**12** Huajca Toteco quiilhui Balaam:

—Amo xiya inihuaya, niyon amo xiquintelchi-  
hua nopa masehualme, pampa na niquintiochij-  
toc.

**13** Huajca ica ijnaloc Balaam mejqui huan  
quinilhui nopa tlacame catli Balac quintlantoya:

—Ximocuepacá ipan amotlal, pampa TOTECO  
amo nechcahuilía ma niya amohuaya.

**14** Huajca nopa tlayacanani tlen tlali Moab  
mocuepque campa itztoya inintlanahuatijca  
Balac, huan quiilhuijque:

—Balaam amo quinejqui hualas tohuaya.

**15** Pero Balac sempa quintitlanqui más tlacame  
catli achi más quipixque tlatlepanitacayotl que  
nopa catli achthui yajque. **16** Huan yajque quiita-  
toj Balaam huan quiilhuijque:

Balac, icone Zipor, techtitlantoc. Chicahuac mitzt-  
lajtlanía xijchihuili se favor huan xiya xij-  
palehuiti. Amo xijchiya. **17** Quijtohua mitz-  
macas huejhueyi tlatlepanitacayotl huan  
nochi catli tlahuel patiyo catli tijtlajtlanis.  
San xijchihua se favor huan xiya, huan  
xiquintelchihuiliti nopa masehualme.

**18** Pero Balaam quinnanquili:

—Masque Balac nechmacasquía ichaj temitoc  
ica oro huan plata, na amo hueli nijchihuas se  
tlenijqui, niyon catli hueyi, niyon catli piltziqui-  
tetzi, catli TOTECO amo nechcahuilis ma nijchi-  
hua. **19** Pero ximochiyaca. Ximocahuaca nica ni

tlayohua huan niquitas sintla TOTECO nechilhuis seyoc tlamantli.

**20** Huan ica tlayohua Toteco Dios monexti campa itztoya Balaam huan quiilhui:

—Pampa nopa tlacame hualajtoque para mitzcuiquij, ximehua huan xiya inihuaya. Pero san tijchihuas catli na nimitzilhuis.

### *Balaam mopanti ihuaya itequihua TOTECO*

**21** Huajca hualmostla Balaam mejqui cualca, huan quipejpechti iburro huan yajqui inihuaya nopa moabitame.

**22** Pero Toteco Dios cuanqui ihuaya Balaam pampa yohuiyaya inihuaya. Huajca quema Balaam nejnentiyohuiyaya burrojtipa huan ihuaya yohuiyayaj ome itequipanojcahua, hualajqui itequihua TOTECO, huan motlajcoquetzqui ipan iojhui para amo ma pano. **23** Huan quema nopa burro quiitac itequihua TOTECO ica se machete imaco, moicancuepqui huan calajqui ipan se mili. Huan Balaam quihuitejqui iburro hasta sempa pejqui nemí ipan iojhui. **24** Huan teipa itequihua TOTECO motlajcoquetzqui ipan ojtlí campa tlatzocopilco ipan nopa xocomeca mili huan nochí oncac quipiyayaya tepamitl. **25** Huan quema nopa burro quiitac itequihua TOTECO, momajmati huan mocaltecho ipan se tepamitl, huan quimetzcuatitztlac Balaam. Huajca Balaam sempa quihuitejqui nopa burro. **26** Huan teipa itequihua TOTECO sempa quisqui huan quitlayacancuili Balaam, huan moquetzqui campa nelia tlatzocopilco huan amo cana hueliyaya panos nopa

burro. <sup>27</sup> Huan quema nopa burro quiitac itequihua TOTECO, motejqui tlalchi. Huajca Balaam tlahuél cualanqui, huan chicahuac quihuítetjqui ica icuatopil. <sup>28</sup> Huan ipan nopa tlatocztzi TOTECO quichijqui para nopa burro ma camanalti, huan ma quiilhui Balaam:

—¿Tlaque nimitzchihuilitjtoc para eyi huelta techhuitectoc?

<sup>29</sup> Huan Balaam quinanquili:

—Techpinahualtijtoc. Sintla njipiyasquía se machete nomaco, amantzi nimitzmictisquía.

<sup>30</sup> Huajca nopa burro quiilhui:

—¡Ximoilhui! Nimoburro catli nochipa ipan titlejco, ¿huelis quej ni nimitzchihuilitjtoc nochipa?

Huan Balaam quiijto:

—¡Amo, amo quema!

<sup>31</sup> Huajca TOTECO quichijqui para Balaam ma quiita itequihua catli mosehuijtoya tlajco ojli ica se machete imaco. Huan Balaam motlancuaquetzqui hasta tlaltenamijqui. <sup>32</sup> Pero itequihua TOTECO quiilhui:

—¿Para tlen tijhuítetjqui eyi huelta moburro? Na nihualajtoc nimitzotzazuas, pampa campa tiya amo nechpactía. <sup>33</sup> Ni burro nechitac huan yeca moiycatlali eyi hueltas. Sintla amo moquetztosquía moburro, melahuac na nimitzmictitosquía, huan ya nijcajtosquía ma itzto.

<sup>34</sup> Huan nopa tlachixquetl Balaam quiilhui itequihua TOTECO:

—Nitlajtlacolchijtoc. Amo nijmatiyaya sintla ta techojtzacuayaya. Sintla amo mitzpactía para ma niya, nimocuepas.

<sup>35</sup> Pero itequihua TOTECO quinanquili:

—Hueli tiyas ininhuaya nopa tlacame, pero san huelis tiquijtos catli na nimitzilhuis.

*Balac quiseli Balaam*

**36** Huajca Balaam yajqui ininhuaya nopa tlay-acanani catli Balac quintatlantoya. Huan quema Tlanahuatijquetl Balac quimatqui para hualayaya Balaam, yajqui quiselito ipan se altepetl catli el-toya nechca nopa hueyatl Arnón campa tlali Moab monepantía ica seyoc tlali. **37** Huan Tlanahuatij-quetl Balac quiilhui:

—Na nitlatitlanqui para ma mitzilhuitij xihuala nimantzi. ¿Para tlen amo tijnequiyaya tihualias hasta ama? ¿Timoilhuiyaya para amo nihuelis nimitzmacas catli nimitzilhui?

**38** Huan Balaam quinanquili:

—Ama nimitzitaco. Pero amo hueli niquistos san tlen hueli camanali. San huelis niquistos nopa camanali catli Toteco nechilhuis.

**39** Huan Balaam yajqui ihuaya Tlanahuatijquetl Balac hasta Quiriat Huzot. **40** Huan nopona Tlanahuatijquetl Balac tlanahuati ma quinmic-tica huacaxme huan borregojme huan quintenc-ahuilise quen se tlacajcahualistli. Huan nojquiya quinhuiquilijque nacatl Balaam ihuaya nopa tlay-acanani catli itztoyaj ihuaya.

**41** Huan hualmostla ica ijnaloc, Tlanahuatij-quetl Balac quihiucac Balaam hasta itzonatipa tepetl Ramot Baal para ma quintlachili nochí nopa israelitame catli quiquetztoyaj ininyoyoncalhua campa hueli tlatzintla ipan tlamayamitl.

# 23

*Balaam camanalti camanali tlen Toteco*

<sup>1</sup> Huajca Balaam quiilhui Tlanahuatijquetl Balac:

—Techchihuili nica chicome tlaixpame, huan techcuatlalili chicome becerros huan chicome borregojme.

<sup>2</sup> Huan Tlanahuatijquetl Balac quichijqui senquistoc quen Balaam quinahuatijtoya. Huan san sejco ipan sesen tlaixpamil quitencahuilijque se becerro huan se borrego.

<sup>3</sup> Huan teipa nopa tlachixquetl Balaam quiilhui Balac:

—Ximocahua nica ica motlacajcahualis tlatlatili huan na niyas nepa niquitas sintla TOTECO nechnamiquiqui. Teipa nimitzilhuis catli ya nechilhuis para ma nimitzilhui.

*Balaam quintiochijqui nopa israelitame*

<sup>4</sup> Huajca Balaam yajqui ipan se piltepetzi catli amo tleno quipiya, huan Toteco hualajqui quinamiquico huan quiilhui:

—Na nijcualtlalijtoc chicome tlaixpamil huan ipan sesen tlaixpamil nimitztencahuilijtoc se becerro huan se borrego.

<sup>5</sup> Huajca TOTECO quimacac Balaam nopa camanali catli quinequiyaya ma quijito, huan quiilhui:

—Ximocuepa campa itztoc Tlanahuatijquetl Balac huan xiquijto nochí senquistoc quen nimitzilhuijtoc.

**6** Huan Balaam mocuepqui huan quipantico Tlanahuatijquetl Balac ijcatoc nechca nopa tlaca-cahualistli catli quitlatijtoya. Huan ihuaya itz-toyaj noch i nopa tlayacanani tlen nopa tlali Moab.

**7** Huajca Balaam quiijto ni camanali:

“Nechchijtoc ma nihuala nica nopa hueyi Tlanahuatijquetl Balac ipan ni tlali Moab.

Huan nihualajtoc tlen nopa tepeme ipan tlali Aram ica campa hualquisa tonati.

‘Xihuala’, yaya nechilhui, ‘xiquintelchihuaqui ni israelitame.

Xijcahua mocualancayo ma tlejco ica inijuanti para ma ininpanti catli fiero.’

**8** Pero amo hueli niquintelchihuas sintla Toteco amo quintelchijtoc.

Amo hueli niquincualanis catli TOTECO amo in-inca cualani.

**9** Niquinita tlen nica itzonatipa ni hueyi tepetl.

Nojquiya niquintlachilía tlen piltepetzitzi.

Niquinita para moiycatlalijtoque tlen sequinoc.

Inijuanti seyoc tlamatli masehualme.

Amo quen sequinoc tlaltipac ehuani.

**10** Tlahuel miyaqui inijuanti hasta itztoque quen tlaltejpoctli.

Amo aqui hueli quinpohua.

Niyon se amo hueli quimatis quesqui itztoque.

Nipaquisquía sintla nim quisquía xitlahuac iixpa TOTECO quen inijuanti.

Ma nim quis ica nopa tlatiochihualistli catli se israelita quipiya.”

**11** Huajca nopa Tlanahuatijquetl Balac quiilhui Balaam:

—¿Tlaque tijchijtoc? Na nimitzhualicac para xiquintelchihua nocualancaitacahua, huan ta tiqquintiochijtoc.

*Sempa Balaam camanalti camanali tlen TOTECO*

<sup>12</sup> Huan Balaam quinanquili:

—Monequi san niquijtos catli TOTECO nechilhuis.

<sup>13</sup> Huajca Tlanahuatijquetl Balac quiilhui Balaam:

—Xihuala nohuaya huan ma tiyaca seyoc lugar. Huan tlen nopona hueli tiquitas san se achi tlen nochí nopa miyaqui israelítame. Tlen nopona huelis tiqquintelchihuas san se achi tlen inijuanti.

<sup>14</sup> Huajca Tlanahuatijquetl Balac quihuicac Balaam ipan se mili campa itoca Zofim ipan itzonatipa nopa tepetl Pisga, huan nopona quichijqui chicome tlaixpamitl huan quitencajqui se becerro huan se borrego ipan sesen tlaixpamitl.

<sup>15</sup> Huajca nopona Balaam quiilhui Tlanahuatijquetl Balac:

—Ximocahua nica nechca motlacajcahuialis tlatlatili huan na niquitati Toteco Dios nopona.

<sup>16</sup> Huan TOTECO quinamiquico Balaam huan quimacac nopa camanali catli quinequiyaya ma quijito. Huan nojquiya quiilhui:

—Ximocuepa campa itztoc Tlanahuatijquetl Balac huan xiquilhui catli na nimitzilhujtoc.

<sup>17</sup> Huan Balaam mocuepqui huan quiitac Balac ijcatoc nechca nopa tlacajcahualistli tlatlatili, huan ihuaya itztoyaj nopa tlayacanani tlen tlali Moab. Huan Tlanahuatijquetl Balac quitlatzintoquili:

—¿Tlaque mitzilhuijtoc DIOS?

<sup>18</sup> Huajca Balaam sempa pejqui camanalti huan  
quijito ni camanali:

“¡Tlanahuatijquetl Balac, ta catli tiicone Zipor,  
cuali techtlacaquili!

<sup>19</sup> Toteco amo itztoc quen titlacame. Yaya amo  
istlacati.

Nyon amo moyolpatla quen se tlacatl.

Catli yaya quijtohua para oncas, ya nopa oncas.

Catli yaya quitencahua, ya nopa quichihua.

<sup>20</sup> Nechnahuatijtoc ma niquintiochihua ni mase-  
hualme.

Huan pampa yaya ya quintiochijtoc,  
amo hueli na niquijtos para amo.

<sup>21</sup> TOTECO amo quipantía tlajtlacoli ipan ni israeli-  
tame.

Inijuanti catli iteipan ixhuihua Jacob.

Amo hualas tequipacholi ipan inijuanti pampa  
TOTECO catli intata quihueyichijqui  
huan yaya itztoc ininhuaya.

Yeca inijuanti tzajtzij ica paquillistli,  
pampa tlahuel hueyi inintlanahuatijca catli inin-  
huaya yohui.

<sup>22</sup> Quen se hueyi toro quipiyya icuacua,  
ni masehualme quipiyaj TOTECO quen ininchic-  
ahualis, yaya catli quinquixti ipan tlali  
Egipto.

<sup>23</sup> Amo aqui hueli quintelchihuas ni iteipan ixhui-  
hua Jacob.

Ni israelitame amo tleno huelis quinchihuilis se  
tetlajchihuijquetl.

Nochi quijtohuaj:

'Huejhueyi tlamatli Toteco Dios quinchihuilijtoc.'

<sup>24</sup> Ni masehualme motlananaj huan temajmatíaj quen se tecuani catli amo mosiyajquetza hasta quicuas catli moitzquilijtoc, huan quijis ieso catli momictilijtoc."

<sup>25</sup> Huajca Tlanahuatijquetl Balac quiilhui Balaam:

—Masque amo hueli tiqquintelchihuas, amo xiquestiochihua.

<sup>26</sup> Pero Balaam quinanquili:

—¿Amo nimitzilhui na san hueli niquijtos catli TOTECO nechilhui?

<sup>27</sup> Huajca Tlanahuatijquetl Balac quiilhui:

—Techchihuili se favor, xihuala nohuaya huan nimitzhuicas seyoc lugar. Huelis tlen nopona Toteco mitzcahuilis xiquestiochihua.

<sup>28</sup> Huan Balac quihuicac Balaam hasta itzonatipa nopa hueyi tepetl Peor campa nesiyaya nochí nopa huactoc tlali catli mocajqui tlatzintla.

<sup>29</sup> Huan nopona Balaam quiilhui Tlanahuatijquetl Balac:

—Techchihuili nica chicome tlaixpamitl, huan xiquestsencahua chicome becerros huan chicome borregojme.

<sup>30</sup> Huajca Tlanahuatijquetl Balac quichijqui nochí senquistoc quen quinahuati Balaam. Huan ipan sesen nopa tlaixpamitl quitencajqui se becerro huan se borrego.

## 24

<sup>1</sup> Huajca Balaam ya quiitztoya para san tlapic se masehuali quintelchihuasnequis israelitame pampa TOTECO quinequiyaya quintiochihuas.

Yeca Balaam ayacmo yajqui para quichihuas quen se tetlajchihuijquetl. Yajqui xitlahuac campa huelqui tlachiyas imelac ipan nopa huactoc tlali huan quinitac nopa israelitame. <sup>2</sup> Huan quema Balaam tlachixqui huan quinitac nochí nopa israelitame catli quiquetztoyaj ininyoyoncalhua ica pamitl, sese ica ihueyi familia imasehualhua, nimantzi Itonaltzi Toteco Dios motlali ipan ya, <sup>3</sup> huan pejqui quijtohua ni camanali:

“Ya ni nopa camanali catli ni Balaam, niicone Beor, nijhualica.

Na nise tlacatl catli cuali hueli niquita catli ininpartis ni israelitame.

<sup>4</sup> Nijcactoc icamanal Toteco catli quipiya nochí chicahualistli, huan niquitztoc ya catli quipiya nochí chicahualistli huan catli nechnextilijtoc.

Huan quema nihuetzqui iixpa, nechtlapoli noixteyol huan nochí nijmachili.

Huajca ya ni catli nechilhui para ininpantis:

<sup>5</sup> Nelía paquij iteipan ixhuihua Jacob por nopa tlatiochihualistli catli quinchiya.

Tlayejyectzi elis campa ininchajchaj israelitame huan nopona oncas paquillistli.

<sup>6</sup> Niquinuta para mosemantoc ininchajchaj campa hueli ipan huejhueyi tlamatayamitl campa xoxohuic sacapetlatl.

Nesi quen se hueyi xochimili catli tlahuel yejyectzi huan catli nochí temaca pampa eltoc atentli.

Nesi quen campa miyac áloes catli TOTECO quitotoc.

Itztoque quen miyac tiocuame catli tlatoctli ateno.

<sup>7</sup> Miyac atl quipiyase israelitame hasta mocahuas.  
 Quipiyase atl para quiatequise inintlatochui.  
 Quipiyase inintlanahuatiijca catli más hueyi que  
 nochí totlanahuatiijcahua.  
 Huan tlahuel hueyi elis itlanahuatil.  
<sup>8</sup> Toteco Dios catli quinquixti ipan tlali Egipto itz-  
 toc ininhuaya.  
 Yaya ininchicahualis quen se hueyi toro quipiya  
 huejhueyi icuacua.  
 TOTECO quintzontlamiltis nochí masehualme  
 ipan nochí tlalme catli quincualancaitaj.  
 Quena, quinpostequilis iniomiyó, huan quinmic-  
 tis ica cuatlamintli.  
<sup>9</sup> Nopa israelitame itztoque quen se tecuani catli  
 motectoc para mosiyajquetzas,  
 huan amo aqui motemaca para quiixitis. ¡TOTECO  
 quintiochihuas catli anmechtiochihua,  
 anisraelitame,  
 huan quintelchihuas nochí catli anmechtelchi-  
 huaj!"

### *Más icamanal Balaam*

<sup>10</sup> Huajca quema Tlanahuatiijquetl Balac quica-  
 jqui nopa camanali catli Balaam quijito, tlahuel  
 cuanqui ihuaya, huan momatejejtzonqui huan  
 quillhui:

—Na nimitznotzqui para xiquintelchihua  
 nocualancaitacahua, huan ta hasta eyi huelta  
 tiqquintiochijtoc. <sup>11</sup> ¡Xiquisa nica! Na nijnequiyaya  
 nimitzmacas miyac tlamtli catli tlahuel patiyo,  
 pero Toteco amo quinejqui ma nimitzmaca.

<sup>12</sup> Huan Balaam quillhui Tlanahuatiijquetl  
 Balac:

—Achtihiui niquinilhui nopa tlacame catli techtitlanili <sup>13</sup> para masque Tlanahuatijquetl Balac nechmacasquía ichaj temitoc ica oro huan plata, amo hueli niquixpanos catli nechilhuía TOTECO. Amo tleno catli cuali, niyon catli amo cuali niquijtos san pampa na nijnequi niquijtos. San catli TOTECO nechilhuía, ya nopa niquijtos. ¿Amo quej nopa niquinilhui? <sup>14</sup> Huan ama, quena, nimocuepas notlal, pero achtihiui nimitzilhuis catli ni israelitame quinchihuilise amomasehualhua teipa.

*Itlamiyá camanal Balaam*

<sup>15</sup> Huajca Balaam sempa camanaltic quen se tlachixquetl huan quijito ni camanali:  
“Ya ni nocamanal niBalaam, niicone Beor.  
Ama cuali niquita catli huala.

<sup>16</sup> Nicamanaltis na catli nijcactoc icamanal TOTECO.  
Quena, Toteco catli más hueyi nechmachiltijtoc ni catli ya quimati.

Niquitztoc ya catli quipiya nochí chicahualistli,  
huan ya ni catli nechnextilijtoc.

<sup>17</sup> Niquita se catli amo aqui ama.  
Yaya catli nijtlachilía nopona hasta tlahuel huejca,  
yaya hualas teipa.

Monextis se sitlali catli hualas tlen iteipan ixhuihua Jacob.

Yaya elis se hueyi Tlanahuatijquetl catli motlananas ipan ni israelitame.

Quintzonpechis Moab ehuani.

Quintlamiltis iteipan ixhuihua Set.

**18** Israelitame quitlanise nopa tlali Edom huan Seir.

Quena, moaxcatise inintla inincualancaitacahua. Quichihuase huejhueyi tlamantli catli temajmatisse.

**19** Se tlanaahuatijquetl quisas ipan iteipan ixhuihua Jacob, huan quintzontlamiltis nochí catli mocahuaj ipan altepeme ipan tlali Edom.”

**20** Teipa Balaam quitlachili ininchajchaj iteipan ixhuihua Amalec, huan sempa camanaltic quen se tlachixquetl huan quijto ni camanali: “Imasehualhua Amalec hualahuij tlen huejcajya, pero se tonal mocahuas amo tleno, tlamisosolijtos.”

**21** Huan Balaam nojquiya quintlachili campa ininchajchaj nopa quenitame, huan sempa camanaltic quen se tlachixquetl huan quijto ni camanali:

“Amojuanti anceneos, cuajcuali campa anmomana huiaj.

Anitztoque temachtli quen se tototl ica itepasol huejcapa campa huejhueyi tetl.

**22** Pero anmechsosolose nopa soldados tlen tlali Asiria, huan anmechhuicase anilpitoque.”

**23** Teipa Balaam quitlamilti icamanal huan quijto:

“¡Ay! ¿Ajqueya noja hueli itztos quema ni tlamantli quichihuas Toteco Dios?

**24** Huejhueyi cuaacalme quiixcotonase hueyi atl huan hualase ica tlacame tlen nopa Chipre tlali,

huan quema injuanti mocuepase, quicajtehuase  
tlalme Asiria huan Heber tlami  
tlasosolme.”

<sup>25</sup> Huan quema Balaam tlantoya quijtohua ni  
camanali, quisqui huan mocuepqui ichaj. Huan  
Tlanahuatiqquetl Balac nojquiya quistejqui.

## 25

### *Israelitame quihueyichijke Baal Peor*

<sup>1</sup> Huan quema nopa israelitame noja mocahuayayaj ipan Sitim, sequin israelita tlacame pejque tlen hueli quichihuaj ica moabita sihuame, <sup>2</sup> pampa nopa moabita sihuame quinnotzayayaj ma yaca campa tlacuayayaj huan quintlacajcahuiliyayaj inintlaixcopincayohua. Huan nopa israelitame pejque tlacuaj ipan nopa tlacualistli huan pejque quihueyichihuaj inintlaixcopincayohua. <sup>3</sup> Huajca quej nopa mosansejcotlalijque ica nopa teteyotl Baal Peor. Huan TOTECO tlahuel cuanqui ininhuaya. <sup>4</sup> Huajca TOTECO quiilhui Moisés:

—Xiquinsentili nochí catli tlayacanaj ipan ni tlamatli huan xiquinmijmicti tlamiyacapa. Huan teipa xiquincuapilo ipan cuahuitl catli huejcapantic para nochí quinitase. Quej nopa sehuis nocualancayo ininhuaya ni israelitame.

<sup>5</sup> Huajca Moisés quinnahuati nopa jueces tlen nopa israelitame, huan quinlhui:

—Nochí amojuanti xiquinmijmictitij nochí amoteiximatcahua catli mosansejcotilijtoque ica nopa tlaixcopincayotl Baal Peor.

<sup>6</sup> Huan quema Moisés noja camanaltiyaya, se israelita tlacatl panoc iixpa catli quihualicayaya

se sihuatl madianita hasta ipan ichaj. Huan nojquiya panoque iniixpa nochí nopa israelitame catli mosentilijtoyaj huan chocayayaj iixpa TOTECO nopona nechca ipuerta nopa yoyon tiopamitl campa TOTÉCO mopantiyaya inihuaya.<sup>7</sup> Huan quema quiitac nopa tlamatli Finees, icone Eleazar huan iixhui totajtzi Aarón, moquetzqui huan quistihuetzqui ipan nopa tlasentilistli. Huan quicuic se tepos choso,<sup>8</sup> huan quitoquilijtiyajqui nopa israelita tlacatl ipan ichaj tlen yoyomitl campa quihiucatoya huan quichosojhui nopa israelita huan sentlapalo ipan itlacayo nopa tlacatl huan nopa sihuatl. Huan quej nopa tlanqui nopa cocolistli catli TOTECO quititlantoya para quinmictis israelitame ica inintlajtlacol ica nopa Baal Peor,<sup>9</sup> pero ya mictoyaj 24 mil israelitame.

<sup>10</sup> Huan teipa TOTECO quiilhui Moisés:

<sup>11</sup>—Finees, icone Eleazar huan iixhui nopa mi-jcatzi totajtzi Aarón, quichijqui para ma sehui nocualancayo inihuaya ni israelitame, pampa ya quitlasomatqui notlatlepanitacayo iniixpa israelitame quen na nijtasomati. Huan tlahuel cuanqui inihuaya pampa quielihuishui catli fiero quichihuayayaj inijuanti huan yeca amo quincahuili itztose. Huajca por ya, amo niqint-zontlamiltis nochí israelitame quen nijchihuas-nequiyaya.<sup>12</sup> Huajca xiquilhui Finees para ama na nijchihuas se camanali ihuaya para nochipa tipiyase tlayoltlalili.<sup>13</sup> Huan nitlayolmelahua para yaya ihuaya nochí itelpocahua elise totajtzi para nochipa, pampa ica icualancayo huan catli quichijqui, quitlasomatqui notlatlepanita-

cayo, niiTeco. Huan ica ya nopa nechixtzacuili inintlajtlacolhua ni israelitame.

<sup>14</sup> Huan itoca nopa tlacatl israelita catli quichosojhuijque ihuaya nopa sihuatl madianita eliyaya Zimri, icono Salu. Huan eliyaya se tlayacanquetl tlen se familia ipan nopa hueyi familia Simeón. <sup>15</sup> Huan nopa sihuatl madianita itoca eliyaya Cozbi huan elqui iichpoca Zur, se tlayacanquetl ipan se hueyi familia ipan tlali Madián.

<sup>16</sup> Teipa TOTECO quiilhui Moisés:

<sup>17</sup>—Ama monequi xiquinita nopa madianitame quen amocualancaitacahua huan xiquinmijmictica. <sup>18</sup> Pampa inijuanti anmechitayayaj para inincualancaitacahua quema ica miyac tlamantli anmechcajcajquque para ma xijhueyichihiuaca inintlaixcopincayo Baal Peor. Nesiaya anmechcajcajahuasnequiyayaj quema hualajqui iniicni Cozbi, iichpoca nopa tlayacanquetl tlen Madián. Quimictique Cozbi ica se cuatlamintli catli huehueyac ipan nopa tonali quema njtitlanqui nopa cocolistli ma temicti pampa anquihueyichihtoyaj Baal Peor.

## 26

*Se yancuic censo quema panotoc cuarenta xi-huitl*

<sup>1</sup> Quema ya panotoya nopa hueyi miquilistli, TOTECO quincamanalhui Moisés ihuaya Eleazar catli elqui icono nopa mijcatzi totajtzi Aarón huan quinilhui:

<sup>2</sup> “Xijtlanananaca se censo tlen nochí israelita tla-came catli quiaxitijtoque 20 xihuitl huan hueli yohuj ipan tlahuilancayotl. Xiquijcuiloca itoca

sese itata huan catli ihueyi familia para tijmatis quesquime itztoque.”

<sup>3</sup> Ipan nopa tonali nopa israelitame itztoyaj ipan nopa hueyi tlamayamitl ipan tlali Moab nechca nopa hueyatl Jordán imelac altepetl Jericó. Huan Moisés huan Eleazar, nopa hueyi totajtzi, quinnotzqui nopa tlayacanani tlen israelitame huan quen TOTECO quinilhuijtoya, quinilhui para <sup>4</sup> ma moijsuiloca nochí tlacame catli quiaxitijtoque 20 xihuitl para huejcapa catli hueli yohuij ipan tlahuilancayotl quen TOTECO tlanahuatijtoc.

Huajca quinpojque quesqui tlacame itztoyaj ipan sesen hueyi familia ipan nopa hueyi tlasentilistli tlen nopa masehualme catli achtihui pejque ipan tlali Egipto huan ya ni catli quipanti-jque.

### *Tlahuilanca tlacame ipan hueyi familia Rubén*

<sup>5</sup> Rubén, iachtíhui ejca Israel, huejcajya quinpixqui nahui itelpocahua: Enoc, Falú, Hezrón huan Carmi. Huan ininteipan ixhuihua sesen ni tlacame mochijque familias catli huejhueyi.

Iteipan ixhuihua Enoc mochijque nopa enoquitame.

Iteipan ixhuihua Falú mochijque nopa falutame.

<sup>6</sup> Iteipan ixhuihua Hezrón mochijque nopa hezronitame.

Iteipan ixhuihua Carmi mochijque nopa carmitame.

<sup>7</sup> Huan ipan nopa tonali quema quinpojque catli itztoyaj ipan nochí nopa familias tlen iteipan ixhuihua Rubén, quinpojque 43 mil 730 tlahuilanca tlacame.

<sup>8</sup> Huan Falú quipixqui itelpoca catli itoca Eliab.  
<sup>9</sup> Huan itelpocahua Eliab elque Nemuel, Datán huan Abiram. Huan Datán huan Abiram elque nopa tlacame catli mosansejcotilijtoyaj huejcajya ihmaya Coré huan quichijque catli fiero iixpa TOTECO, huan ica Moisés huan Aarón. <sup>10</sup> Huan motlapo tlali huan quintolo ni ome tlacame ihmaya Coré. Nojquiya ipan san se tonal TOTECO quinmicti ica tliltl 250 masehualme catli quintoquiliyayaj. Nochi ya ni elqui se hueyi tlamachtili para nochi nopa israelitame catli mocajque. <sup>11</sup> Pero ipan nopa tonali itelpocahua Coré amo itztoyaj ihmaya inintata huan amo mijque.

*Tlahuilanca tlacame ipan hueyi familia Simeón*

<sup>12</sup> Simeón, iompa telpoca Israel, huejcajya quinpixqui macuilty itelpocahua: Nemuel, Jamín, Jaquín, Zera huan Saúl. Huan ininteipan ixhuihua sesen ni tlacame mochijque familias huejhueyi. Iteipan ixhuihua Nemuel mochijque nopa nemuelitame.

Iteipan ixhuihua Jamín mochijque nopa jaminitame.

Iteipan ixhuihua Jaquín mochijque nopa jaquinitame.

<sup>13</sup> Iteipan ixhuihua Zera mochijque nopa zeraitame.

Iteipan ixhuihua Saúl mochijque nopa saulitame.

<sup>14</sup> Huan ipan nopa tonali quema quinpojque catli itztoyaj ipan nochi familias tlen iteipan ixhuihua Simeón, quinpojque 22 mil 200 tlahuilanca tlacame.

*Tlahuilanca tlacame ipan hueyi familia Gad*

**15** Gad, itelpoca Israel, huejcajya quinpixqui chicome itelpocahua: Zefón, Hague, Suni, Ozni, Eri, Arod huan Areli. Huan ininteipan ixhuihua sesen ni tlacame mochijque familias huejhueyi.

Iteipan ixhuihua Zefón mochijque nopa zefonitame.

Iteipan ixhuihua Hagui mochijque nopa haguitame.

Iteipan ixhuihua Suni mochijque nopa sunitame.

**16** Iteipan ixhuihua Ozni mochijque nopa oznitame.

Iteipan ixhuihua Eri mochijque nopa eritame.

Iteipan ixhuihua Arod mochijque nopa aroditame.

**17** Iteipan ixhuihua Areli mochijque nopa arelitame.

**18** Huan ipan nopa tonali quema quinpojque catli itztoyaj ipan nopa familias tlen iteipan ixhuihua Gad, quinpojque 40 mil 500 tlahuilanca tlacame.

### *Tlahuilanca tlacame ipan hueyi familia Judá*

**19** Judá, itelpoca Israel, huejcajya quinpixqui ome itelpocahua catli inintoca Er huan Onán. Injuanti mijque nimantzi ipan nopa tlali Canaán.

**20** Pero teipa Judá nojquiya quinpixqui sequinoc eyi itelpocahua: Sela, Fares huan Zera. Huan ininteipan ixhuihua sesen ni tlacame mochijque familias huejhueyi.

Iteipan ixhuihua Sela mochijque nopa selaitame.

**21** Iteipan ixhuihua Fares mochijque nopa faresitame.

Iteipan ixhuihua Zera mochijque nopa zeraitame.

Huan Judá itelpoca catli itoca Fares quinpixqui ome itelpocahua, Hezrón huan Hamul catli

mochijque nopa hezronitame huan nopa hamulitame.

**22** Huan ipan nopa tonali quema quinpojque catli itztoyaj ipan nopa familias tlen iteipan ixhuihua Judá, quinpojque 76 mil 500 tlahuilanca tlacame.

*Tlahuilanca tlacame ipan hueyi familia Isacar*

**23** Isacar, itelpoca Israel, huejcajya quinpixqui nahui itelpocahua: Tola, Fúa, Jasub huan Simrón. Huan ininteipan ixhuihua mochijque familias huejhueyi.

Iteipan ixhuihua Tola mochijque nopa tolaitame.

Iteipan ixhuihua Fúa mochijque nopa fuaitame.

**24** Iteipan ixhuihua Jasub mochijque nopa jasubitame.

Iteipan ixhuihua Simrón mochijque nopa simronitame.

**25** Huan ipan nopa tonali quema quinpojque catli itztoyaj ipan nopa familias tlen iteipan ixhuihua Isacar, quinpojque 64 mil 300 tlahuilanca tlacame.

*Tlahuilanca tlacame ipan hueyi familia Zabulón*

**26** Zabulón, itelpoca Israel, huejcajya quinpixqui eyi itelpocahua: Sered, Elón huan Jahleel. Huan ininteipan ixhuihua sesen ni tlacame mochijque familias huejhueyi.

Iteipan ixhuihua Sered mochijque nopa sereditame.

Iteipan ixhuihua Elón mochijque nopa elonitame.

Iteipan ixhuihua Jahleel mochijque nopa jehleelite.

<sup>27</sup> Huan ipan nopa tonali quema quinpojque catli itztoyaj ipan nopa familias tlen iteipan ixhuihua Zabulón, quinpojque 60 mil 500 tlahuilanca tlacame.

*Tlahuilanca tlacame ipan hueyi familia Manasés*

<sup>28</sup> José, itelpoca Israel, huejcajya quinpixqui ome itelpocahua: Manasés huan Efraín.

<sup>29</sup> Tlen Manasés quisqui ome familias huejhueyi.

Se quisqui tlen itelpoca catli itoca Maquir.

Huan iteipan ixhuihua mochijque nopa maquiritame.

Huan ne se hueyi familia quisqui tlen itelpoca catli itoca Galaad catli elqui itelpoca Maquir. Huan iteipan ixhuihua Galaad mochijque nopa galaaditame.

<sup>30</sup> Huan itelpoca Galaad catli itoca Jezer, iteipan ixhuihua mochijque nopa jezeritame.

Huan itelpoca Galaad catli itoca Helec, iteipan ixhuihua mochijque nopa helequitame.

<sup>31</sup> Huan itelpoca Galaad catli itoca Asriel, iteipan ixhuihua mochijque nopa asrielitame.

Huan itelpoca Galaad catli itoca Siquem, iteipan ixhuihua mochijque nopa siquemitame.

<sup>32</sup> Huan itelpoca Galaad catli itoca Semida, iteipan ixhuihua mochijque nopa semidaitame.

Huan itelpoca Galaad catli itoca Hefer, iteipan ixhuihua mochijque nopa heferitame.

<sup>33</sup> Hefer quipixqui itelpoca catli itoca Zelofehad, pero yaya amo quipixqui niyon se itlaca cone.

Zelofehad san quinpixqui iichpocahua catli inintoca: Maala, Noa, Hogla, Milca huan Tirsa.

<sup>34</sup> Huan ipan nopa tonali quema quinpojque catli itztoyaj ipan nopa familias tlen iteipan ixhuihua Manasés, quinpojque 52 mil 700 tlahuilanca tlacame.

*Tlahuilanca tlacame ipan hueyi familia Efraín*

<sup>35</sup> Por José itelpoca catli itoca Efraín quinpixqui eyi itelpocahua: Sutela, Bequer huan Tahán. Huan ininteipan ixhuihua sesen ni tlacame mochijque familias huejhueyi.

Iteipan ixhuihua Sutela mochijque nopa sute-laitame.

Iteipan ixhuihua Bequer mochijque nopa bequeritame.

Iteipan ixhuihua Tahán mochijque nopa tahani-tame.

<sup>36</sup> Huan Sutela, itelpoca Efraín, quipixqui itelpoca catli itoca Erán huan iteipan ixhuihua mochijque nopa eranitame.

<sup>37</sup> Huan ipan nopa tonali quema quinpojque catli itztoyaj ipan nopa familias tlen iteipan ixhuihua Efraín, quinpojque 32 mil 500 tlahuilanca tlacame.

Huajca ya nimitzilhuitoc tlen iteipan ixhuihua José huan catlique huejhueyi familias quisque ipan ya.

*Tlahuilanca tlacame ipan hueyi familia Benjamín*

<sup>38</sup> Benjamín, itelpoca Israel, huejcajya quinpixqui macuili itelpocahua: Bela, Asbel, Ahiram, Sufam huan Hufam. Huan ininteipan ixhuihua sesen ni tlacame mochijque familias huejhueyi.

Iteipan ixhuihua Bela mochijque nopa belaitame.  
Iteipan ixhuihua Asbel mochijque nopa asbelitame.

Iteipan ixhuihua Ahiram mochijque nopa ahiramitame.

<sup>39</sup> Iteipan ixhuihua Sufam mochijque nopa sufamitame.

Iteipan ixhuihua Hufam mochijque nopa hufamitame.

<sup>40</sup> Huan Bela, itelpoca Benjamín, quinpixqui itelpocahua Ard huan Naamán. Huan ininteipan ixhuihua mochijque nopa arditame huan nopa naamitame.

<sup>41</sup> Huan ipan nopa tonali quema quinpojque catli itztoyaj ipan nopa familias tlen iteipan ixhuihua Benjamín, quinpojque 45 mil 600 tlahuilanca tlacame.

### *Tlahuilanca tlacame ipan hueyi familia Dan*

<sup>42</sup> Dan, itelpoca Israel, huejcajya quipixqui san se itelpoca catli itoca eliyaya Súham.

Huan iteipan ixhuihua Súham mochijque nopa suhamitas.

<sup>43</sup> Huan ipan nopa tonali quema quinpojque catli itztoyaj ipan nopa familias tlen iteipan ixhuihua Dan, quinpojque 64 mil 400 tlahuilanca tlacame.

### *Tlahuilanca tlacame ipan hueyi familia Aser*

<sup>44</sup> Aser, itelpoca Israel, huejcajya quinpixqui eyi itelpocahua: Imna, Isúi huan Bería. Huan ininteipan ixhuihua sesen ni tlacame mochijque familias huejhueyi.

Iteipan ixhuihua Imna mochijque nopa imnitame.

Iteipan ixhuihua Isúi mochijque nopa isuitame.

Iteipan ixhuihua Bería mochijque nopa beriaitame.

<sup>45</sup> Huan Bería, itelpoca Aser, quinpixqui itelpocahua catli inintoca Heber huan Malquiel. Huan iniixhuihua mochijque nopa heberitame huan malquielitame.

<sup>46</sup> (Nojquiya Aser quipixqui se ichpocatl catli itoca Sera.)

<sup>47</sup> Huan ipan nopa tonali quema quinpojque catli itztoyaj ipan nopa familias tlen iteipan ixhuihua Aser quinpojque 53 mil 400 tlahuilanca tlacame.

### *Tlahuilanca tlacame ipan hueyi familia Neftalí*

<sup>48</sup> Neftalí, itelpoca Israel, huecjajya quinpixqui nahui itelpocahua: Jahzeel, Guni, Jezer huan Silem. Huan iniixhuihua sesen ni tlacame mochijque familias huejhueyi.

Iteipan ixhuihua Jahzeel mochijque nopa jahzeelitame.

Iteipan ixhuihua Guni mochijque nopa gunitame.

<sup>49</sup> Iteipan ixhuihua Jezer mochijque nopa jezeritame.

Iteipan ixhuihua Silem mochijque nopa silemitame.

<sup>50</sup> Huan ipan nopa tonali quema quinpojque catli itztoyaj ipan nopa familias tlen iteipan ixhuihua Neftalí, quinpojque 45 mil 400 tlahuilanca tlacame.

<sup>51</sup> Huajca quema tlanque moijsilohuaj nochí nopa israelita tlacame catli huelque yohuij ipan tlahuilancayotl, quinpojque 601 mil 730 tlacame.

<sup>52</sup> Huajca TOTECO quiilhui Moisés: <sup>53</sup> “Quema anmoaxcatise nopa cuali tlali catli nimechmacas,

xiquinmajmaca nopa tlali ica sesen nopa huejhueyi familias quen ininmiyaca tlacame catli moiijcuilojtoque ama ipan ni censo. <sup>54</sup> Nopa huejhueyi familias catli achi más miyaqui tlacame quinpiyaj tiquinmacas achi más hueyi tlali. Huan nopa huejhueyi familias catli amo miyaqui tlacame quinpiyaj, tiquinmacas quentzi tlali. <sup>55</sup> Pero para tijmatis campa quiselis sesen hueyi familia monequi timahuiltis ica piltetzitzi. Quej nopa tijmatis canque sesen hueyi familia moaxcatis it-lal. <sup>56</sup> Huan nopa tlali catli quintocarohua moxel-huilise quen quinextis nopa suerte iixpa TOTECO para elis iniaxca. Huan nopa hueyi familia catli achi hueyi quiselis achi más, huan catli tziquitetzi, amo más miyac tlali quiselis.”

*Nopa tlacame ipan nopa hueyi familia Leví*

<sup>57</sup> Leví, itelpoca Israel, huejcajya quinpixqui eyi itelpocahua: Gersón, Coat huan Merari. Huan ininteipan ixhuihua sesen ni tlacame mochijque familias catli huejhueyi.

Iteipan ixhuihua Gersón mochijque nopa gersonitame.

Iteipan ixhuihua Coat mochijque nopa coatitame.  
Iteipan ixhuihua Merari mochijque nopa meraitame.

<sup>58</sup> Huan nojquiya iteipan ixhuihua Leví mochijque:

nopa familia tlen libnitame,  
nopa familia tlen hebronitame,  
nopa familia tlen mahlitame,  
nopa familia tlen musitame,  
nopa familia tlen coreitame.

Huan Coat, itelpoca Leví, quipixqui se iteipan telpoca catli itoca Amram. <sup>59</sup> Huan Amram mosihuajti ica Jocabed catli nojquiya tlacatqui ipan nopa hueyi familia tlen iteipan ixhuihua Leví quema injuanti itztoyaj ipan tlali Egipto. Huan Amram huan Jocabed quinpixque ininconehua catli inintoca Aarón, Moisés huan María. <sup>60</sup> Huan teipa Aarón quinpixqui iconehua catli inintoca Nadab, Abiú, Eleazar huan Itamar. <sup>61</sup> Pero Nadab ihuaya Abiú mijque iixpa TOTECO quema quitlatijque nopa copali ica tlitl catli amo elqui tlatzeloltic.

<sup>62</sup> Huan quinpojque nochí oquichpilme huan tlacame ipan nopa hueyi familia Leví catli quiaxtitjtoyaj se metztli para huejcapa. Huan nochí nopa tlaca levitame mochijque 23 mil. Pero amo quinpojque nopa levitame ica nopa sequinoc huejhueyi familias tlen israelitame pampa nopa levitame amo quiselise niyon se inintlal.

<sup>63</sup> Ya ni elqui nochí nopa israelitame catli Moisés ihuaya nopa totajtzi Eleazar quinpojque ipan nopa tlamayamitl ipan tlali Moab nechca Jordán atentli, imelac nopa altepetl Jericó quema itztoyaj para calaquise ipan nopa tlali. <sup>64</sup> Huan ipan ni censo amo quipojque niyon se tlacatl catli quipojtoyaj Moisés huan Aarón huecjajya ipan nopa achtilui censo catli quitlananque ipan nopa huactoc tlali Sinaí, pampa nochí nopa tlacame ipan nopa achtilui censo ya mictoyaj. <sup>65</sup> TOTECO quijtojtoya para nochí nopa tlacame miquisquíaj ipan nopa huactoc tlali huan quej nopa panoc. Niyon se amo mocajqui yoltoc, san Caleb, icono Jefone, huan Josué, icono Nun.

## 27

*Catli quiselise tesihuaconehua*

<sup>1</sup> Ipan hueyi familia Manasés itztoyaj maculti sihua icnime catli inintoca Maala, Noa, Hogla, Milca huan Tirsa. Inijuanti iichpocahua Zelofehad, icono Hefer, catli eliyaya icono Galaad, catli eliyaya icono Maquir, catli eliyaya icono Manasés, catli eliyaya icono José. <sup>2</sup> Huan nopa maculti sihua icnime yajque campa ipuerta nopa yoyon tiopamitl campa mopantiyaya ihuaya TOTECO. Nopona quicamanalhuitoj Moisés ihuaya nopa totajtzi Eleazar, huan nopa tlayacanani huan ne sequinoc israelitame catli nopona itztoyaj. Huan quinilhuijque: <sup>3</sup> “Totata mijqui nepa ipan huactoc tlali, pero amo moiyoatlalijtoya ihuaya Coré catli quichijqui catli fiero iixpa TOTECO. Yaya mijqui san quen nochí sequinoc mijque por catli ya it-lajtlacol. Huan amo quicajqui niyon se itelpoca. <sup>4</sup> ¿Amo hueli techmacas tiiichpocahua se tlali quen catli quiselise inintelpocahua totiojhua para ma amo polihui itoca totata ipan ifamilia san pampa amo quipixqui se itelpoca?”

<sup>5</sup> Huajca Moisés quiilhui TOTECO catli inin-pantiyaya ni sihuame huan catli quinequiyayaj. <sup>6</sup> Huan TOTECO quinanquili: <sup>7</sup> “Iichpocahua Zelofehad quipiyaj razón. Xiquinmaca para iniaxca catli quiselisquia inintata ipan ne tlali nechca campa quiselise inintiojhua. <sup>8</sup> Nojquiya xiquinilhui nochí nopa israelitame, sintla se aca-jya miquis huan amo quicajtehuas niyon se itelpoca, nopa tlali catli ya quipiya panos inin-maco iichpocahua. <sup>9</sup> Huan sintla niyon se iichpoca

amo quipiya, huajca itlal quiselise itlaca icnihua. <sup>10</sup> Huan sintla amo quipiya niyon se iicni, huajca quincahuilijtehuas itlaca icnihua itata. <sup>11</sup> Huan sintla itata amo quipixqui se iicni, huajca nopa tlali quiselise iteiximatcahua catli más nechca. Ya ni elis se tlanahuatili para nochipa para nochí israelitame quitoquilise. Ma quichihuaca senquistoc quen nimitznhuatijtoc ama.”

*Josué quiselis itequi Moisés*

<sup>12</sup> Huan TOTECO quiilhui Moisés:

—Xitlejco ipan ni tepetl Abarim huan xijtlachili nopa tlali catli niquinmacatoc ni israelitame. <sup>13</sup> Huan quema ya tiqitztos, huajca timquis huan timosansejcotilis ica mohuejcapan tatahua quen panoc ica moicni Aarón. <sup>14</sup> Timquis noppa pampa ipan nopa huactoc tlali Zin quema nopa israelitame nechejelnamijque, amo antechneltoquilijque catli nimechilhui, niyon amo antechhueyichijque iniixpa quema nechtlatlanijque atl. (Ya ni panoc campa nopa atl Meriba catli mopantía nechca Cades ipan huactoc tlali Zin.)

<sup>15</sup> Huajca Moisés quiilhui TOTECO Dios:

<sup>16</sup> —¡Ay noTECO! Ta catli tiquinmaca nemilistli nochí tlacame. Xijtlapejpeni se acajya catli quinyacanas ni masehualme. <sup>17</sup> Monequi se catli quinyacanas ipan tlahuilancayotl huan quinmocuitlahuis para momasehualhua ma amo nemica quen borregojme catli amo quipiyaj inintlamocuitlahuijca.

<sup>18</sup> Huan TOTECO quinanquili Moisés:

—Xijnnotza Josué, icono Nun. Yaya se tlacatl catli quipiya notonaltzi. Huan xijtlali momax

ipan itzonteco. <sup>19</sup> Huan ma moquetza iixpa nopa totajtzi Eleazar iniixpa nochí israelitame. Huan nopona iniixpa nochí nopa tlacame, xijtequitlali. <sup>20</sup> Huan iniixpa xijmaca se achi nopa tequiticayotl catli ta tijpiya para inijuanti ma quitlepanitaca huan ma quineltoquilica. <sup>21</sup> Nojquiya teipa para Josué quimatis tlaque monequi quichihuas, monequi monextis iixpa nopa totajtzi Eleazar. Huan Eleazar nechtajtlanis por ya ica nopa Urim, nopa dados tlatzejtzeloltic catli nimechmacatoc. Huan ica nopa Urim nijnextilis nopaquilis. Huan quen nopa inijuanti quimatise tlaque monequi quichihuase. Huajca ica catli Eleazar quinilhuis para nopaquilis, Josué huan nopa tlayacanani huan nopa israelitame quimatise tlaque quichihuase.

<sup>22</sup> Huajca Moisés quichijqui senquistoc quen TOTECO quiilhuijtoya. Quihuicac Josué huan quiixnexti ica nopa totajtzi Eleazar huan iniixpa nochí nopa israelitame. <sup>23</sup> Huan Moisés quitlali imax ipan itzonteco Josué, huan quitequimacac quen TOTECO quinahuatijtoya.

## 28

### *Tlacajcahualistli catli monequi mojmostla*

<sup>1</sup> Huan teipa TOTECO quiilhui Moisés:

<sup>2</sup> “Xiquinilhui nopa israelitame para niquita nopa pantzi huan nopa tlacajcahualistli tlatlatili catli mojmostla nechtencahuiláj quen se quiita itlacualis. Huan ajhuiyac mijyotía noixpa na. Ma amo quielcahuaca nechtencahuilise nochí huelta quen nimechilhuijtoc.

### *Tlacajcahualistli catli monequi mojmostla*

<sup>3</sup> “Mojmostla monequi antechmacase ome piloquich borregojtzitzi quen tlacajcahualistli tlatlatili. Techmacaca pilborregojtzitzi catli san quiaxitíaj se xihuitl huan catli amo tleno quipiyaj. <sup>4</sup> Monequi xijmictica se ica ijnaloc huan nopa seyoc ica tiotlac. <sup>5</sup> Huan inihuaya techmacaca se tlacajcahualistli tlen harina catli elis ome kilo catli cuali harina tlamaneloli ica se litro aceite tlen olivo. <sup>6</sup> Ya ni san se ica nopa tlacajcahualistli tlatlatili catli nimechnahuati huejcajya xipehuaca xinechmacaca nopona nechca tepetl Sinaí. Huan mojmostla monequi antechmacatiyase para elis se tlacajcahualistli catli ajhuiyac mijyotis noixpa. <sup>7</sup> Huan ihuaya sesen pilborregojtzti monequi nojquiya antechmacase se litro xocomeca atl catli elis se tlacajcahualistli tlatoyahuali. Huan para antechtencahuilise, monequi anquitoyahuase noixpa tiopan calijtic ipan nopa cuarto tlatzejzelotic. <sup>8</sup> Huan nojquiya quema ya tiotlaquiya, techmaca ne seyoc pilborregojtzti huan ihuaya nojquiya nopa tlacajcahualistli tlen harina huan tlen tlatoyahuali quen ica ijnaloc. Huan anquitlatise nopa tlacajcahualistli para antechtencahuilise huan ajhuiyac mijyotis noixpa na, niamOTECO.

*Tlacajcahualistli catli monequi sesen semana*

<sup>9</sup> “Huan ipan nopa tonali quema monequi ximosiyajquetzaca sesen chicueyi, monequi antechtencahuilise ome piloquich borregojtzitzi catli san quiaxitíaj se xihuitl huan catli amo tleno quipiyaj. Nojquiya ihuaya techmacaca nopa tlacajcahualistli tlen harina catli

ihuaya yohui catli elis nahui kilos tlen cuali harina tlamaneloli ica aceite, huan nojquiya techmacaca nopa tlacajcahualistli catli tlatoyahuali noixpa. <sup>10</sup> Huan ni tlacajcahualistli tlatlatili catli antechtentencahuilise sesen sábado quema anmosiyajquetzase monequi elis iyoca tlen nopa ome tlacajcahualistli tlatlatili huan inintlacajcahualis tlatoyahuali catli antechmacase mojmostla.

*Tlacajcahualistli catli monequi sesen metztli*

<sup>11</sup> “Ipan nopa achtilui tonali ipan sesen metztli antechtentencahuilise se tlacajcahualistli tlatlatili catli elis ome becerros, se oquich borrego, huan chicome piloquich borregojtzitzi catli san quiaxitíaj se xihuitl huan catli amo tlen amo cuali quipiyaj. <sup>12</sup> Huan nojquiya ihuaya sesen becerro antechtentencahuilise sesen tlacajcahualistli tlen harina catli elis chicuase kilos tlen cuali harina tlamaneloli ica aceite. Huan ihuaya ne borrego antechtentencahuilise nahui kilos catli cuali harina tlamaneloli ica aceite. <sup>13</sup> Huan ihuaya sesen pilborregojtzi antechtentencahuilise se tlacajcahualistli tlen harina catli elis ome kilos tlen cuali harina tlamaneloli ica aceite. Nochi elis se tlacajcahualistli tlatlatili catli ajhuiyac mijyotis noixpana, niamoteCO. <sup>14</sup> Nopa tlacajcahualistli catli tlatoyahuali catli antechtentencahuilise ininhuaya, elis ome litros xocomeca atl ica sesen becerro, huan se litro huan tlajco ica nopa borrego, huan se litro para sesen nopa pilborregojtzitzi. Ya ni eli nopa tlacajcahualistli tlatlatili catli monequi antechmacase sesen metztli ipan se xihuitl. <sup>15</sup> Huan iyoca tlen nopa tlacajcahualistli tlatlatili huan

nopa tlacajcahualistli tlatoyahuali catli inihuaya yohuij, nojquiya sesen metztl monequi antechtencahuilise se tlacajcahualistli por tlajtlacoli catli elis se oquich chivo.

### *Tlacajcahualistli para nopa Pascua Ilhuitl*

<sup>16</sup> “Ipan 14 itequi nopa achtihui metztl ipan sesen amoxihui, monequi anquinextise nopa Pascua Ilhuitl para antechhueyichihuase, niamoTECO. <sup>17</sup> Huan ipan ne seyoc tonali, anquipehualtise se ilhuitl tlen elis chicome tonali quema amo anquicuase niyon se pantzi catli quipiya tlasonejcayotl. <sup>18</sup> Huan ipan nopa achtihui tonali tlen nopa chicome, anquichihuase se tlasentilistli tlatzejtzelotic para sempa anmoiyocatlalise para na. Huan ipan nopa tonali amo anquichihuase niyon se tequitl. <sup>19</sup> Huan para tlacajcahualistli tlatlatili, antechtentencahuilise, niamoTECO, ome becerros, se oquich borrego, huan chicome piloquich borrejotzitzi catli san quiaxitíaj sesen xihuitl huan catli amo tleno quipiyaj. <sup>20</sup> Huan para nopa tlacajcahualistli tlen harina catli yohuij inihuaya, antechtentencahuilise cuali harina tlamaneloli ica aceite, chicuase kilos tlen harina para sesen becerro, huan nahui kilos para sesen nopa borregojme, <sup>21</sup> huan ome kilos para sesen pilborrejotzitzi. <sup>22</sup> Nojquiya antechmacase se chivo para se tlacajcahualistli por tlajtlacoli para antechixtzacuilise amotlajtlacolhua. <sup>23</sup> Nochi ya ni antechtentencahuilise iyoca tlen nopa tlacajcahualistli tlatlatili catli monequi mojmostla ipan noch ijaloc. <sup>24</sup> Huajca

nochi ya ni antechmacase sesen tonali ipan nopa chicome tonali tlen nopa ilhuitl. Huan nochis elis tlacajcahualistli catli tlatlatili catli ajhuiyac mijyotis noixpa na, ni amoTECO. Nojquiya monequi antechtentencahuilise nopa tlacajcahualistli catli tlatoyahuali catli monequi ihuaya sese. Huan iyoca, monequi nochis sequinoc tlacajcahualistli catli ya nimechilhuijtihualajtoc.  
<sup>25</sup> Huan ipan nopa chicome tonali, nojquiya anquipiyase se tlasentililistli catli tlatzejzeloltic para ammoiyocatlalise para na. Huan ipan nopa tonali, niyon se tequitl amo anquichihuase.

### *Nopa ofrenda tlen nopa achtihui pixquistli*

<sup>26</sup> “Ipan nopa tonali para nopa ilhuitl ipan ipejya pixquistli, catli nojquiya itoca ilhuitl tlen semanas, antechhualiquilise se quentzi nopa yancuic harina catli achtihui anquipixcaque tlen amotlatochui. Huan nojquiya ipan nopa tonali anquipiyase se tlasentililistli tlatzejzeloltic para ammoiyocatlalise para na, huan niyon se tequitl amo anquichihuase. <sup>27</sup> Huan antechtentencahuilise tlacajcahualistli tlatlatili catli ajhuiyac mijyotis noixpa, huan nopa tlacajcahualistli elis ome becerros, se oquich borrego, huan chicome piloquich borrego jitzitzi catli san quiaxitíaj se xihuítl. <sup>28</sup> Huan nopa tlacajcahualistli tlen harina elis cuali harina tlamaneloli ica aceite. Huan monequis chicuase kilos harina ica sesen becerro, huan nahui kilos ica nopa borrego, <sup>29</sup> huan ome kilos ica sesen nopa pilborrego jitzi. <sup>30</sup> Huan nojquiya antechmacase se chivo quen se tlacajcahualistli

por tlajtlacoli para antechixtzacuilise amotlajtla-colhua. <sup>31</sup> Sesen tlacajcahualistli tlatlatili monequi nojquiya quipiyas nopa tlacajcahualistli tlatoyahuali catli ihuaya yohui. Huan iyoca, techtencahuilica nochi nopa sequinoc tlacajcahualistli tlatlatili huan nopa tlacajcahualistli tlen harina catli monequi. Huan nochi tlapiyalme catli antechmacase monequi amo tleno tlen amo cuali quipiyase.

## 29

### *Nopa ilhuitl tlen tlapitzali*

<sup>1</sup> “Ipan nopa achtihi tonal ipan metztli chicome ipan nopa israelita calendario [29:1 Quemantic ni tonal huetzis ipan septiembre huan quemantic ipan ipejya octubre ipan tocalendario tlen ama.] ipan sesen xihuitl anquichihuase se tlasantilistli tlatzejtzelotic para sempa anmoiyocatlalise para na, huan niyon se tequitl amo anquichihuase ipan nopa tonali. Nopa elis se tonal para anquipitzase tlapitzali. <sup>2</sup> Huan ipan nopa tonali antechtentcahuilise se tlacajcahualistli tlatlatili catli ajhuiyac mijyotis noixpa para antechhueyichihuase. Huan catli antechmacase elis se becerro, se oquich borrego huan chicome piloquich borrego jitzitzi catli san quiaxitíaj se xihuitl huan catli amo tleno quipiyaj. <sup>3</sup> Nojquiya monequi techmacaca nopa tlacajcahualistli tlen harina catli yohui ininhuaya catli elis cuali harina tlamaneloli ica aceite. Monequi antechtentcahuilise chicuase kilos tlen harina para nopa becerro, nahui kilos para nopa oquich borrego, <sup>4</sup> huan ome kilos para sesen

pilborregoxtzi. <sup>5</sup> Huan nojquiya techtencahuilise se chivo para se tlacajcahualistli por tlajtlacoli para antechixtzacuile amotlajtlacolhua. <sup>6</sup> Nochi ni tlacajcahualistli monequi antechmacase iyoca tlen nopa tlacajcahualistli tlatlatili catli antechmacase pampa ajsic ipejya se metztlis, huan iyoca tlen nopa tlacajcahualistli catli antechmacase mojmostla. Huan sesen nopa tlacajcahualistli monequi quipiyas itlacajcahualis tlen harina huan catli tlatoyahuali catli ihuaya yohui quen nimechnahuatijtoc. Huan nochi tlacajcahualistli tlatlatili elis tlacajcahualistli catli antechmacase ica tlitl para ajhuiyac ma mijyoti noixpa na, niamotECO.

*Tlacajcahualistli para nopa tonal quema Qui-ixtzacuas Tetlajtlacolhua*

<sup>7</sup> “Huan quema panos 10 tonali sempa anquichi-huase se tlasentilistli tlatzejzeloltic para sempa anmoiyocatlalise para na. Huan anmoicnonequise huan anmosahuase, huan amo anquichi-huase niyon se tequitl. <sup>8</sup> Huan ipan nopa tonali antechtencahuilise ni tlacajcahualistli tlatlatili catli ajhuiyac mijyotis noixpa para antechhueyichi-huase. Monequi antechmacase se becerro, huan se oquich borrego, huan chicome piloquich borregoxtzitzti catli san quiaxitíaj se xihuitl huan catli amo tleno quipiyaj. <sup>9</sup> Huan inihuaya techmacaca nopa tlacajcahualistli tlen harina catli monequi, catli elis se cuali harina tlamaneloli ica aceite. Monequi chicuase kilos para nopa becerro, nahui kilos para nopa oquich borrego, <sup>10</sup> huan ome kilos

para sesen pilborregoijtzi. <sup>11</sup> Nojquiya antechtencahuilise se oquich chivo quen se tlacajcahualistli por tlajtlacoli. Huan nopa chivo elis iyoca tlen nopa oquich chivo catli antechmacase para antechixtzacuilise amotlajtlacolhua. Huan nojquiya ni chivo elis iyoca tlen nopa tlacajcahualistli tlatlatili, huan tlacajcahualistli tlen harina, huan tlacajcahualistli catli tlatoyahuali catli monequi antechmacase mojmostla.

*Tlacajcahualistli para nopa ilhuitl tlen pilxajcaltzitzi*

<sup>12</sup> “Huan quema panos macuili tonali, anquichihuase seyoc tlasentililistli tlatzejtzelotic para anmoiyocatlalise para na, huan niyon se tequitl amo anquichihuase. Huan ipan nopa tonali anquipehualtise anquichihuase se ilhuitl para antechhueyitlalise, huan nopa ilhuitl huejcahuas seyoc chicome tonali. <sup>13</sup> Huan para antechhueyichihuase ipan nopa achtihui tonali antechmacase se tlacajcahualistli tlatlatili catli ajhuiyac mijyotis noixpa. Huan nopa tlacajcahualistli elis 13 becerros ome oquich borregoijme, huan 14 piloquich borregoijtzitzi catli san quiaxitíaj se xi-huitl huan catli amo tleno quipiyaj. <sup>14</sup> Huan ininhuaya techmaca nopa tlacajcahualistli tlen harina catli quitocarohua sesen catli elis cuali harina tlamaneloli ica aceite. Antechmacase chicuase kilos harina ica sesen nopa 13 becerros, nahui kilos ica sesen nopa oquich borregoijme, <sup>15</sup> huan ome kilos harina ica sesen tlen nopa 14 pilborregoijtzitzi. <sup>16</sup> Nojquiya ipan nopa tonali antechtencahuilise se oquich chivo quen se tlacajcahualistli por tlajtlacoli. Huan iyoca techtencahuilica nopa

tlacajcahualistli tlatlatili catli monequi mojmostla ica nopa tlacajcahualistli tlen harina huan catli tlatoyahuali catli ininhuaya yohuij.

<sup>17</sup> “Huan ipan ome tonali ipan nopa ilhuitl, antechtencahuilise 12 becerros, ome oquich borregojme, huan 14 piloquich borregojtzitzi catli quiaxitijtoque se xihuitl huan catli amo tleno quipiyaj. <sup>18</sup> Huan ininhuaya nopa becerros, borregojme huan pilborregojtzitzi monequi antechmacase nopa tlacajcahualistli tlen harina huan catli tlatoyahuali catli ininhuaya yohuij, sesen ica imiyaca catli ya nimechnahuatijtoc. <sup>19</sup> Nojquiya ipan nopa tonali antechtencahuilise se oquich chivo quen se tlacajcahualistli por tlajtlacoli. Huan iyoca techtencahuilica nopa tlacajcahualistli tlatlatili catli monequi mojmostla ica nopa tlacajcahualistli tlen harina huan catli tlatoyahuali catli ininhuaya yohuij.

<sup>20</sup> “Huan ipan eyi tonali ipan nopa ilhuitl, antechtencahuilise 11 becerros, ome oquich borregojme, huan 14 piloquich borregojtzitzi catli quiaxitijtoque se xihuitl huan catli amo tleno quipiyaj. <sup>21</sup> Huan ininhuaya nopa becerros, borregojme huan pilborregojtzitzi monequi antechmacase nopa tlacajcahualistli tlen harina huan catli tlatoyahuali catli ininhuaya yohuij, sese ica imiyaca catli ya nimechnahuatijtoc. <sup>22</sup> Nojquiya ipan nopa tonali antechtencahuilise se oquich chivo quen se tlacajcahualistli por tlajtlacoli. Huan iyoca techtencahuilica nopa tlacajcahualistli tlatlatili catli monequi mojmostla ica nopa tlacajcahualistli tlen harina huan catli tlatoyahuali catli ininhuaya yohuij.

<sup>23</sup> “Huan ipan nahui tonali ipan nopa ilhuitl, antechtencahuilise 10 becerros, ome oquich borregojme huan 14 piloquich borregojtzitzi catli quiaxitijtoque se xihuitl huan catli amo tleno quiipyaj. <sup>24</sup> Huan inihuaya nopa becerros, borregojme huan pilborregojtzitzi monequi antechmacase nopa tlacajcahualistli tlen harina huan catli tlatoyahuali catli inihuaya yohuij, sese ica imiyaca catli ya nimechnahuatijtoc. <sup>25</sup> Nojquiya ipan nopa tonali, antechtencahuilise se oquich chivo quen se tlacajcahualistli por tlajtlacoli. Huan iyoca techtencahuilica nopa tlacajcahualistli tlatlatili catli monequi mojmostla ica nopa tlacajcahualistli tlen harina huan catli tlatoyahuali catli inihuaya yohuij.

<sup>26</sup> “Huan ipan macuili tonali ipan nopa ilhuitl, antechtencahuilise 9 becerros, ome oquich borregojme, huan 14 piloquich borregojtzitzi catli quiaxitijtoque se xihuitl huan catli amo tleno quiipyaj. <sup>27</sup> Huan inihuaya nopa becerros, borregojme huan pilborregojtzitzi monequi antechmacase nopa tlacajcahualistli tlen harina huan catli tlatoyahuali catli inihuaya yohuij, sese ica imiyaca catli ya nimechnahuatijtoc. <sup>28</sup> Nojquiya ipan nopa tonali, antechtencahuilise se oquich chivo quen se tlacajcahualistli por tlajtlacoli. Huan iyoca techtencahuilica nopa tlacajcahualistli tlatlatili catli monequi mojmostla ica nopa tlacajcahualistli tlen harina huan catli tlatoyahuali catli inihuaya yohuij.

<sup>29</sup> “Huan ipan chicuasen tonali ipan nopa ilhuitl, antechtencahuilise 8 becerros, ome oquich borregojme huan 14 piloquich borregojtzitzi catli

quiaxitijtoque se xihuitl huan catli amo tleno quipiyaj. <sup>30</sup> Huan inihuaya nopa becerros, borregojme huan pilborregojtzitzi monequi antechmacase nopa tlacajcahualistli tlen harina huan catli tlatoyahuali catli inihuaya yohuij, sese ica imiyaca catli ya nimechnahuatijtoc. <sup>31</sup> Nojquiya ipan nopa tonali, antechtencahuilise se oquich chivo quen se tlacajcahualistli por tlajtlacoli. Huan iyoca techtencahuilica nopa tlacajcahualistli tlatlatili catli monequi mojmostla ica nopa tlacajcahualistli tlen harina huan catli tlatoyahuali catli inihuaya yohuij.

<sup>32</sup> “Huan ipan chicome tonali ipan nopa ilhuitl, antechtencahuilise chicome becerros, ome oquich borregojme huan 14 piloquich borregojtzitzi catli quiaxitijtoque se xihuitl huan amo tleno quipiyaj. <sup>33</sup> Huan inihuaya nopa becerros, borregojme huan pilborregojtzitzi monequi antechmacase nopa tlacajcahualistli tlen harina huan catli tlatoyahuali catli inihuaya yohuij, sese ica imiyaca catli ya nimechnahuatijtoc. <sup>34</sup> Nojquiya ipan nopa tonali, antechtencahuilise se oquich chivo quen se tlacajcahualistli por tlajtlacoli. Huan iyoca techtencahuilica nopa tlacajcahualistli tlatlatili catli monequi mojmostla ica nopa tlacajcahualistli tlen harina huan catli tlatoyahuali catli inihuaya yohuij.

<sup>35</sup> “Huan ipan chicueyi tonali tlen nopa ilhuitl, anquichihuase se tlasantilistli tlatzejzelotic para anmoiyocatlalise sempa para na, huan amo anquichihuase niyon se tequitl. <sup>36</sup> Huan ipan nopa tonali, para antechhueyichihuase antechmacase se tlacajcahualistli tlatlatili

catli ajhuiyac mijyotis noixpa. Huan nopa tlacajcahualistli elis se becerro, se oquich borrego, huan chicome piloquich borregojtzitzi catli quiaxitijtoque sesen xihuitl huan amo tleno quipiyaj. <sup>37</sup> Huan inihuaya nopa becerro, borrego huan pilborregojtzitzi monequi antechmacase nopa tlacajcahualistli tlen harina huan catli tlatoyahuali catli inihuaya yohuj, sese ica imiyaca catli ya nimechnahuatijtoc. <sup>38</sup> Nojquiya ipan nopa tonali, antechtentencahuilise se oquich chivo quen se tlacajcahualistli por tlajtlacoli. Huan iyoca techtentencahuilica nopa tlacajcahualistli tlatlatili catli monequi mojomostla ica nopa tlacajcahualistli tlen harina huan catli tlatoyahuali catli inihuaya yohuj.

<sup>39</sup> “Huajca nochí ni tlacajcahualistli antechtentencahuilise na, niamoTECO, ipan sesen tonali catli niquixquetztoc. Huan nochí ya ni elis iyoca tlen se tlacajcahualistli tlatlatili, o tlen harina, o catli tlatoyahuali, o se para tlayoltlalili nohuaya catli anquinequise antechmacase. Huan elis iyoca tlen se tlacajcahualistli catli antechmacase pampa antechtlajtolcahuilíaj se tlenijqui.”

<sup>40</sup> Huajca Moisés quinpohuili nochí nopa israelitame nochí ni tlanahuatili catli TOTECO quimacatoya.

## 30

### *Catli ica mocahua TOTECO tlaque quichihuase*

<sup>1</sup> Huan Moisés quincamanalhui nochí tlayacanani tlen sesen hueyi familia tlen nopa israelitame, huan quinilhui:

“TOTECO tlanahuatijtoc <sup>2</sup> para quema se tlapacatl quitencahuas para quichihuas se tlamatli para TOTECO, o motestigoquetzas para amo quichihuas se tlamatli, monequi quitlamichihuas nochí catli quiijtojtoc.

<sup>3</sup> “Huan quema se ichpocatl catli noja itztoc ihuaya itata, quitencahuilis Toteco para quichihuas se tlamatli, o motestitojquetzas para amo quichihuas se tlamatli, <sup>4</sup> huan itata quimati huan amo tleno quiijtohua, huajca nopa ichpocatl monequi quitlamichihuas catli quiijtojtoc. <sup>5</sup> Pero sintla itata quiijtos nimantzi ipan nopa tonali para amo quicahuilis para quitlamichihuas catli quiijtojtoc, huajca amo monequi quichihuas, pampa itata amo quinejqui. Huan TOTECO quitlapojpolhuis catli quiijtojtoc pampa itata amo quicahuili ma quichihua.

<sup>6</sup> “Huan sintla se ichpocatl quitencahuilijtoc catli quichihuilis TOTECO, masque ohui quichihuas huan teipa monamictis, <sup>7</sup> huan sintla ihuehue amo quitzacuilia nimantzi quema quicaqui, huajca nopa ichpocatl monequi quitlamichihuas catli quiijtojtoc. <sup>8</sup> Pero sintla ihuehue quema quimatis, nimantzi ipan nopa tonali quiijtos para amo quinequi ma quitlamichihuas, huajca amo monequi quichihuas pampa ihuehue quiqxtilijtoc ichicahualis catli quiijtojtoc, masque quiijto catli nelia ohui. Huan TOTECO quitlapojpolhuis catli quiijtojtoc.

<sup>9</sup> “Pero sintla se sihuatl catli cahualtzí pampa mijqui ihuehue, o catli ihuehue quicajqui, o amasosolo ihuaya nechtenahuilis catli nechchihuilis, o motestigoquetzas catli amo quichihuas, huajca

catli quijtojtoc, ya nopa monequi quitlamichihuas.

<sup>10</sup> “Huan sintla se sihuatl catli ya monamictijtoc nechtencahuilis se tlenijqui, o motestigojquetza catli quichihuas, <sup>11</sup> huan ihuehue quimati, huan amo tleno quiilhuía, huajca quena, catli quijtojtoc quipiya chicahualistli huan monequi quitlamichihuas. <sup>12</sup> Pero sintla ihuehue quijtohua ipan nopa tonali quema quimatqui para amo quicahuas quichihuas, huajca ayacmo quipiya chicahualistli catli quijtojtoc pampa ihuehue quiqxintili ichicahualis. Huan TOTECO quitlapojojhuis ica catli quijtojtoc.

<sup>13</sup> “Huajca se tlacatl huelis quimacas chicahualistli, o quiqxtilis ichicahualis catli isihua quitencajtoc ica TOTECO para quichihuas o amo quichihuas, sintla nimantzi quijtos. <sup>14</sup> Pero sintla ya amo molinía huan quen nopa pano se ome tonali, huajca, quena, monequi quitlamichihuas. <sup>15</sup> Huan sintla ya quichiya hasta seyoc tonal huan teipa quijtos para amo quicahuilis ma quichihua, huajca ya quihiicas nopa tlajtlacoli por catli quitencajqui quichihuas isihua huan amo quichijqui.”

<sup>16</sup> Huajca ya ni nopa tlanahuatili catli TOTECO quimacac Moisés para quenicatza elis ica se tlacatl ihuaya isihua, huan se tetaj ica iichpoca quema noja itztoc imaco sintla nopa isihua o iichpoca motestigojquetzas para quichihuas se tlamantli.

## 31

*Israelitame quisosolo huaj tlali Madián*

<sup>1</sup> Huan TOTECO quiilhui Moisés:

<sup>2</sup> “Xiquincuepili nopa madianitame ica catli quinchihuilijtoque nopa israelitame huan teipa timiquis.”

<sup>3</sup> Huajca Moisés quinilhui nopa israelitame:

—Sequin ansoldados monequi ximocualtlalica huan xijcuica amotepos para ica antlahuilanatij. Monequi timomacuepase ica nopa madianitame ica itequiticayo TOTECO. <sup>4</sup> Sesen hueyi familia quipiyas para quintitlanis se mil soldados para tlahuilanatij.

<sup>5</sup> Huajca quej nopa mosentilijque 12 mil soldados, se mil tlen sesen hueyi familia. Huan nochiya mocualtlalijtoque para yase tlahuilanatij ica nopa madianitame. <sup>6</sup> Huan Moisés quintitlanqui nopa 12 mil soldados, huan para quinyacanas quititlanqui Finees, itelpoca nopa totajtzi Eleazar. Huan ya nojquiya quinhuicac sequin tlamantzitzi catli quintequihuía ipan tiapan calijtic, huan nopa tlapitzali para quipitzase para quinyolmelahuase quema pehuase para tlahuilanase.

<sup>7</sup> Huan quinhuilanque nopa madianitame huan quinmictijque nochia quen TOTECO quinahuatijtoya Moisés. <sup>8</sup> Quinmictijque Evi, Requem, Zur, Hur huan Reba catli eliyayaj nopa macuilme tlanahtiani tlen madianitame. Huan nojquiya quimictijque Balaam, icone Beor ica machete. <sup>9</sup> Huan nopa israelitame quinitzquijque huan quinhuicaque ilpitoque nopa sihua madianitame ininhuaya ininconebla catli tziquitetzitz. Huan quincuilijque huan quinhuicaque nochia inintlapiyahua, huan nochia tlamantli catli patiyo catli quipixtoyaj. <sup>10</sup> Huan nojquiya quintlamitlatilijque nochia inialtepehuia

huan campa mochihuayabaj. <sup>11</sup> Huan nopa soldados quihuicaque nochí nopa tlamatli catli quitlantoyaj ininhuaya nopa tlapiyalme, sihuame huan coneme. <sup>12</sup> Huan quinhuiquijque Moisés huan nopa totajtzi Eleazar huan nopa sequinoc israelitame catli mocajtoyaj campa ininchajchaj ipan nopa tlamatyamitl ipan tlali Moab, nechca atentli Jordán, iixmelac altepetl Jericó.

<sup>13</sup> Huan Moisés, Eleazar huan nochí nopa tlayacanani tlen israelitame quisque campa ininchajchaj huan quinnamiquitoj nopa soldados. <sup>14</sup> Huan Moisés cualanqui ica nopa soldados catli quipiyayaya tequiticayotl, inijuanti catli quinya-canayayaj se mil o se cien soldados, <sup>15</sup> huan quinilhui:

—¿Quenque anquincajque yoltoque nochí ni sihuame? <sup>16</sup> Inijuanti catli quitoquilijque ica-manal Balaam, huan quichijque ma tlajtlacolchi-huaca nochí nopa israelitame quema quicajte-jque TOTECO para quihueyichihuase Baal ipan nopa tepetl Peor. Huan elqui inintlajtlacol inijuanti para huetzqui nopa cocolistli topani, ti-imasehualhua TOTECO. <sup>17</sup> Huajca xiquinmictica amantzi nochí oquichpilme huan nochí sihuame catli ya quiiximajtoque se tlacatl. <sup>18</sup> Huan nochí sihuapilme catli nelía ayamo tleno quimati huelis itztose, huan elise amoaxcahua. <sup>19</sup> Huan nochí amojuanti catli anquiimictjitoque se acajya o anquiitzquijtoque se mijcatzi, monequi ximocahuaca huejca tlen amoaltepe. Amo xicalaquica ipan toaltepe tlen yoyon calme. Huan ipan eyi tonali huan chicome tonali, monequi ximopajpacaca ica nopa atl catli tetlapajpacchihua quen

TOTECO quiijtohua. Huan nojquiya xiquinpajpacaca nopa sihuapilme catli amoaxcatijtoque. <sup>20</sup> Nojquiya xijtlapajpacchihuaca nochi tlamantli catli anmocuilijtoque tlen cuahuitl huan tlen yoyomitl para anmotlalilise, huan yoyomitl tlen cuetlaxtli o tlen inijhuiyo chivojme.

<sup>21</sup> Huan nopa totajtzi Eleazar quinilhui nochi nopa soldados catli yajtoyaj tlahuilanatoj:

—Ya ni nopa tlanahuatili catli TOTECO quimacac Moisés: <sup>22</sup> Nochi tlamantli catli amo hueli tlatla quen oro, plata, bronce, hierro, estaño, huan plomo catli anmocuilijtoque, <sup>23</sup> monequi anquicalaquise ipan tlitl para anquipajpacase. Huan teipa xijtzejtzeloca ica nopa atl catli tlapajpaca iixpa TOTECO. Huan nochi tlamantli catli amo quiijiyohuis tlitl, monequi xijpajpacaca san ica nopa atl. <sup>24</sup> Huan ipan chicome tonali monequi anquichicuenise amoyoyo, huan anmocahuase antlapajpactique iixpa TOTECO sempa. Teipa sempa hueli ancalaquise campa toaltepe.

*Momajmacaque                  catli                  quincuilijke  
madianitame*

<sup>25</sup> Huan TOTECO quiilhui Moisés:

<sup>26</sup> “Xiquinpohua quesqui tlapiyalme huan sihuapilme anquincuilijke nopa madianitame. Ma mitzpalehui nopa totajtzi Eleazar ihuaya nopa tlayacanani tlen sesen hueyi familia, huan xiquicuiloca quesqui itztoque. <sup>27</sup> Huan xijtlajcoitaca catli onca. Tlajco elis iniaxcahua inijuanti catli tlahuilanatoj, huan nopa seyoc tlajco elis iniaxca ne sequinoc israelitame. <sup>28</sup> Nojquiya xijcuica se

achi para na catli elis quen se impuesto. Ipan catli iniaxca nopa soldados, elis noaxca se masehuali, se huacax, se burro o se borrego ipan sesen 500. <sup>29</sup> Huan inijuanti catli noaxcahua anquimacase nopa totajtzi Eleazar para nechmactilis na, ni-amotECO. <sup>30</sup> Huan tlen ne seyoc tlajco catli quintocarohua ne sequinoc israelitame, antechiyocatalilise se sihuapil, se huacax, se burro, huan se borrego tlen sesen 50. Huan nochí inijuanti anquimacase nopa levitame catli quimocuitlahuíaj noyoyon tiopa, niamoTECO.”

<sup>31</sup> Huajca Moisés huan Eleazar quichijque senquistoc quen TOTECO quinahuatijtoya Moisés.

<sup>32</sup> Huan catli mocajque yoltoque catli nopa soldados quincuiljtoyaj inincualancaitacahua elque: 675 mil borregojme, <sup>33</sup> 72 mil huacaxme, <sup>34</sup> 61 mil burrojme <sup>35</sup> huan 32 mil ichpocame catli ayamo quiiximatiyayaj se tlacatl.

<sup>36</sup> Huajca nopa tlajco tlen tlapiyalme huan ichpocame catli quintocaro nopa soldados elque: 337 mil 500 borregojme,

<sup>37</sup> huan tlen inijuanti 675 elqui iaxca TOTECO quen se impuesto.

<sup>38</sup> Huan 36 mil huacaxme, huan tlen inijuanti 72 elqui iaxca TOTECO.

<sup>39</sup> Huan 30 mil 500 burrojme, huan tlen inijuanti 61 elqui iaxca TOTECO.

<sup>40</sup> Huan 16 mil ichpocame, huan tlen inijuanti 32 iaxca TOTECO.

<sup>41</sup> Huan Moisés quincuic nopa tlapiyalme huan sihuapilme catli elqui quen se impuesto para

TOTECO huan quimactili nopa totajtzi Eleazar quen TOTECO quinahuatijtoya.

<sup>42</sup> Huan Moisés quiyyocatlali ne tlajco catli quintocarohua nopa israelitame tlen ne tlajco catli eliyaya iniaxca nopa soldados. <sup>43</sup> Huan nopa tlajco catli quintocaro nopa israelitame elque: 337 mil 500 borregojme, <sup>44</sup> 36 mil huacaxme, <sup>45</sup> 30 mil 500 burrojme <sup>46</sup> huan 16 mil sihuapilme.

<sup>47</sup> Huan tlen ya ni catli eliyaya iniaxca nopa israelitame, Moisés quintlapejpeni se ipan sesen 50 ichpocame huan tlapiyalme quen TOTECO quinahuatijtoya, huan quinmactili nopa levitame catli quimocuitlahuiyayaj iyoyon tiopa TOTECO.

<sup>48</sup> Huajca nopa soldados catli quipixque tequiticayotl ica sesen mil soldados huan ica sesen 100 soldados monechcahuijque campa Moisés, <sup>49</sup> huan quiilhuijque: “Timotequipanojcahua tiquinpojtoque nochí soldados catli itztoyaj tomaco quema titlahuilanatoj, huan niyon se amo polijtoc. <sup>50</sup> Huajca tijnequij tijmactilise TOTECO se nemactli para tijtlascamatilise. Huan nochí macostli, maquechcostli, anillos, pijpiloli, huan quechcostli tlen oro catli sesen timopantilijtoaj tijhualicatoque para tijmacase TOTECO. Ma elis se tlaixtzacuili para quiixtzacuas totlajtlacolhua, pampa amo senquistoc tijtoquilijque itlanahuatil achtihui.”

<sup>51</sup> Huajca Moisés ihuaya Eleazar quinselilijque nochí nopa tlamantli tlayejyecayotl tlen oro catli quihualicaque. <sup>52</sup> Huan nochí nopa oro catli san nopa tlayacanani tlen soldados ica ininyolo quimactilijque TOTECO quipanoc 184 kilos ietica huan tlahuel eliyaya patiyo. <sup>53</sup> Huan iyoca miyac

tlayejyecayotl oncac, pampa sesen soldado catli amo tlayacanquetl quitencahuili TOTECO nopa tlamantli tlen oro catli eltoya imaco. <sup>54</sup> Huajca Moisés ihuaya Eleazar nopa totajtzi quiselijque nopa oro catli nopa tlayacanani quihualicatoyaj, huan quitlalijque tiopan calijtic campa mopantiyayaj ica TOTECO para TOTECO ma quinellamiqui nopa israelitame.

## 32

### *Iniixhuihua Rubén huan Gad quiselijque inintlal*

<sup>1</sup> Huan nopa israelitame ipan nopa huejhueyi familias Rubén huan Gad quinpiyayaj tlahuel miyaqui tlapiyalme. Huan quiitaque para nopa tlali Jazer huan tlali Galaad nechca campa itztoyaj elque nelía cuali para tlapiyalme huan huajca ini-juanti quinequiyayaj. <sup>2</sup> Huajca yajque quinitatoj Moisés, nopa totajtzi Eleazar huan nopa tlayacanani tlen nochí israelitame huan quinilhuijque:

<sup>3</sup> —Xiquitaca, TOTECO techcahuilijtoc tiisraelitame ma tijtlanica nochí ni tlalme tlen Atarot, Dibón, Jazer, Nimra, Hesbón, Eleale, Sebam, Nebo huan Beón. <sup>4</sup> Huan nochí ni tlalme nelía cuali para tlapiyalme, huan tojuanti, timotequipanojcahua, tiquinpiyaj miyaqui tlapiyalme. <sup>5</sup> Huajca sintla anquiitaj para cuali, techmacaca ni tlali para elis catli techtocarohua tjselise, huan amo tleno tjselise ipan nopa tlali ipan neca nali atentli Jordán.

<sup>6</sup> Pero Moisés quinnanquili iteipan ixhuihua Rubén huan Gad:

—¿Anquinequij ne sequinoc israelitame yase tlahuilanatij huan amojuanti san ammosehuise

nica? <sup>7</sup> Anquinmajmatise nopa israelitame para ma amo panoca ipan nopa tlali catli TOTECO quinmacatoc. <sup>8</sup> Quej nopa quichijque amotatahua quema niqquintitlanqui tlen Cades Barnea para ma quitlajtlachilitij nopa cuali tlali. <sup>9</sup> Inijuanti ajsitoj hasta ipan nopa tlamayamitl tlen Escol huan cuali quitlajtlachilijque nopa tlali, huan teipa quinmajmaticoij israelitame para ma amo calaquica ipan nopa cuali tlali catli TOTECO quinmacatoya. <sup>10</sup> Huan TOTECO tlahuel cualanqui inihuaya nopa tonali, huan ya motestigojquetzqui, <sup>11</sup> huan quiijto para niyon se tlen ni tlacame catli quisque ipan tlali Egipto huan catli ya quiaxitijque 20 xihuitl, amo calaquise ipan nopa tlali catli ininca mocajqui Abraham, Isaac huan Jacob para quinmacasquia ininteipan ixhuihua. Pampa nopa tlacame amo quitoquilijtoque ica noch iinyolo. <sup>12</sup> San hueli calaquise Caleb, icone Jefone nopa cenezeo, ihuaya Josué, icone Nun, pampa inijuanti quitoquilijque TOTECO ica noch iinyolo. Huajca quej nopa quiijto TOTECO ne tonal. <sup>13</sup> Huan ya tlahuel cualanqui ica israelitame huan quichijqui ma nejnemica ipan nopa huactoc tlali para 40 xihuitl. Monequiyaya nejnentinemisse nopona hasta mijque noch catli quisque ipan tlali Egipto pampa inijuanti san sejco tlacatque ipan Egipto huan ica sempa quiixpanoque TOTECO, huan monejqui miquise iixpa. <sup>14</sup> Huan ama amojuanti, anininconebla ne tlajtlacolchijca tetajme, anquinequij anquitoquilise ininfiero ojhui, huan anquinequij anquiixpanose TOTECO para noja

más cualanis tohuaya tiisraelitame. <sup>15</sup> Sintla amo anquitoquiláj TOTECO, ya quichihuas para nochí israelitame noja más xihuitl ma huejcahuaca ipan ni huactoc tlali hasta nochí miquise, huan amojuanti anquipiyase tlajtlacoli por ininmiquilis.

<sup>16</sup> Huajca ininteipan ixhuihua nopa huejhueyi familias Rubén huan Gad monechcahuijque campa Moisés huan quiilhuijque:

—¡Amo! Amo ya nopa catli tiquijtohuaj. Tojuanti tijnequij tijchihuase tlatzactli para totlapiyalhua, huan altepeme para toconehua huan tosihua-jhua. <sup>17</sup> Huan teipa titlacame tijuicase totepos huan tiquinyacantiyase ne sequinoc israelitame titlahuilanatij hasta quema tiquincalaquitij nochí injuanti ipan inintlá catli quiselise. Pero toconehua huan tosihuajhua mocahuase nica ipan altepeme catli cuali moyahualojtose ica tepamitl para amo tleno ininpantis ica masehualme catli itztoque nica nechca. <sup>18</sup> Huan tojuanti amo timocuepase tochajchaj hasta senquistoc nochí israelitame moaxcatijtose inintlá catli quintocaros para quiselise. <sup>19</sup> Pero tojuanti amo tijselise niyon se tlali ica neca nali atentli Jordán, pampa ya tijselijtose nica ipan ni nali.

<sup>20</sup> Huan Moisés quinnanquili:

—Sintla melahuac anquitlamichihuase catli anquijtohuaj huan anmocualtlalise huan anquihiicase amotepos para antlahuilanatij ipan itlahuiancayo TOTECO, huajca cuali. <sup>21</sup> Pero monequi nochí amosoldados quiixcotonase nopa hueyatlı Jordán iixpa TOTECO huan tlahuilanase

hasta TOTECO quintlamitojtocatos nochí icualancaitacahua iixpa,<sup>22</sup> huan mocuilijs nopa tlali. Huan teipa, quena, ya huelis anmocuepase ipan amotlal nica quema ya anquichijtose, nochí catli anmocajtoyaj iixpa TOTECO huan iniixpa israelitame para anquichihuase. Huan ni tlalme nica elis amoaxca iixpa TOTECO.<sup>23</sup> Pero sintla amo anquitlamichihuase nochí ya ni catli anquijtojtoque, cuali xijmatica antlajtlacolchijtose ica TOTECO, huan se tonal anmechajsis se tlatzacuilitistli ica nopa tlajtlacoli.<sup>24</sup> Huajca ama xipecihuaca xijcualtlalica altepeme para amoconehua huan amosihuajhua, huan tlatzactli para amoborregojhua, huan teipa xijtlamichihuaca nochí catli anquijtojtoque.

<sup>25</sup> Huan nochí iteipan ixhuihua Rubén huan Gad quinanquilijque:

—Timotequipanojcahua tijchihuase senquistoc nochí catli ta technahuatijtoc.<sup>26</sup> Toconehua, tosihuajhua huan totlapiyalhua mocahuase ipan altepeme ipan tlali Galaad.<sup>27</sup> Huan tojuanti catli hueli tijhuicaj tepostli tijpanose ni hueyatl iixpa TOTECO huan titlahuilanatij quen technahuatijtoc.

<sup>28</sup> Huajca Moisés quinnahuati nopa totajtzi Eleazar, Josué huan nopa tlayacanani tlen nochí israelitame ica ni camanali:

<sup>29</sup> —Sintla nochí nopa tlahuilanca tlacame ipan nopa huejhueyi familias Gad huan Rubén quipanose hueyatl Jordán cuali mocuaultlalijtoque para tlahuilanatij quen TOTECO quinnahuatía, huan tlahuilanase hasta quema ya anquitlamitlantose nopa cuali tlali,

huajca xiquinmacaca nopa tlali Galaad para ma eli iniaxca. <sup>30</sup> Pero sintla amo quipanose ica inintepos para tlahuilanatij, huajca quintocaros se tlali ipan neca nali ipan tlali Canaán campa anquiselise amojuanti.

<sup>31</sup> Huan nochí iteipan ixhuihua Gad huan Rubén tlananquilijque:

—Tijtlamichihuase catli TOTECO technahuatij-toc, timotequipanojcahua. <sup>32</sup> Temachtli cuali tim-occualtlalijtose ica totepos huan tijpanose ne huey-atl para titlahuilanatij quen TOTECO technahuatía ipan tlali Canaán, pero teipa timocahuase ica ni tlali catli ama tijselíaj ipan ni nali tlen ni hueyatl Jordán.

<sup>33</sup> Huajca Moisés quinmacac nopa hueyi familia Gad, Rubén huan tlajco nopa hueyi familia Manasés, catli elqui icono José, nopa tlalme ipan nica nali. Huan quiselijque nopa tlali catli achtihui quinahuatiyyaj nopa amorreo tlanahuatiani, Sehón huan Og tlen altepetl Basán. Nojquiya quiselijque nochí nopa altepeme catli quinahuatiyyaj huan nochí tlali catli quinyahualojtoya.

<sup>34</sup> Huan nopa hueyi familia Gad quisencajque nopa altepeme tlen Dibón, Atarot, Aroer, <sup>35</sup> Atarot Sofán, Jazer, Jogbeha, <sup>36</sup> Bet Nimra huan Bet Arán, huan cuali quinyahualojque ica tepamitl huan quichijque tlatzactli para ininborregojhua.

<sup>37</sup> Huan nopa hueyi familia Rubén quinsencajque nopa altepeme tlen Hesbón, Eleale, Quiriataim, <sup>38</sup> Nebo huan Baal Meón huan quipatlaque inintoca. Huan nojquiya quisencajque nopa altepetl Sibma.

<sup>39</sup> Huan iixhuihua Maquir, catli elqui iconē Manasés tlen huejcajya, moaxcatitoj nopa tlali tlen Galaad catli quitequihuiyaj nopa amorreos huan moaxcatijque nopa tlali. <sup>40</sup> Huajca Moisés quinmacac iixhuihua Maquir nopa tlali Galaad, huan nopona mocajque para itztose. <sup>41</sup> Huan iixhuihua Jair, ne seyoc iconē Manasés tlen huejcajya, yajque moaxcatitoj catli eliyaya iniaxca sequinoc amorreos huan quitocaxtijque Havot Jair. <sup>42</sup> Huan Noba ihuaya iteiximatcahua yajque moaxcatitoj Kenat ica nochī pilaltepetzitzitzi catli iaxca, huan quitocaxtijque Noba quen ya itoca eltoya.

## 33

### *Nopa ojtli catli israelitame quitoquilijtoyaj*

<sup>1</sup> Nica eltoc inintoca nochī nopa lugares campa nopa israelitame panotiyajque quema quisque ipan tlali Egipto ica nochī nopa huejhueyi pamitl tlen ininmasehualhua, huan quinyacantiyohuiyaj Moisés ihuaya Aarón. <sup>2</sup> Moisés quiijcuilojtiyajqui nochī inintoca nopa lugares campa quiquetziyajque ininyoyoncalhua.

<sup>3</sup> Nopa israelitame quistejque nopa altepetl Ramesés ipan tlali Egipto ipan 14 itequi nopa achtihui metztli ipan nopa israelita calendario [33:3 Ni tonal quemantic huetzi ipan marzo huan quemantic ipan ipejya abril ipan tocalendario tlen ama.]. Quinextijque nopa ilhuitl Pascua huan ipan ijnaloc tlen ne seyoc tonali quistejque ica hueyi chicahualistli iniixtla nopa egiptome.

<sup>4</sup> Huan quema quistejque, nopa egiptome noja quintlaltocayayaq ininconehua catli achihuime pampa TOTECO quichijtoya ma miyuica. Huan TOTECO nojquiya quintlamitepejqui noch i intilaixcopincayohua.

<sup>5</sup> Huan nopa israelitame quistejque altepetl Ramesés huan quiquetzque ininyoyoncalhua ipan Sucot.

<sup>6</sup> Quistejque Sucot huan mochihuatoj ipan Etam campa pehua nopa huactoc tlali.

<sup>7</sup> Quistejque Etam huan mocuepque para quimacase se huelta ica Pi Hahirot catli mocahua ica campa hualquisa tonati tlen Baal Zefón, huan npona mochijque nechca Migdol.

<sup>8</sup> Huan quema quistejque Pi Hahirot, quiixcotonque nopa hueyi atl huan ajsitoj campa nopa huactoc tlali. Huan nejnentiayque eyi tonali ipan nopa huactoc tlali tlen Etam huan mochijque campa Mara.

<sup>9</sup> Huan quistejque tlen Mara huan ajsitoj ipan nopa huactoc tlali catli itoca Elim campa oncayaya 12 amelme huan 70 apachi cuame, huan mochijque npona.

<sup>10</sup> Teipa quistejque Elim huan mochihuatoj nechca nopa hueyi atl catli itoca Chichiltic.

<sup>11</sup> Huan quistejque campa nopa Hueyi Atl Chichiltic huan mochihuatoj ipan nopa huactoc tlali catli itoca Sin.

<sup>12</sup> Huan quistejque campa nopa huactoc tlali Sin huan mochihuatoj ipan Dofca.

<sup>13</sup> Huan quistejque Dofca huan mochihuatoj ipan Alús.

<sup>14</sup> Teipa quistejque Alús huan mochihuatoj ipan huactoc tlali tlen Refidim campa amo oncayaya atl para quiijise.

<sup>15</sup> Huan quistejque Refidim huan mochihuatoj ipan nopa huactoc tlali Sinaí.

<sup>16</sup> Teipa quistejque nopa huactoc tlali Sinaí huan mochihuatoj ipan Kibrot Hataava.

<sup>17</sup> Huan quistejque Kibrot Hataava huan mochihuatoj ipan Hazerot.

<sup>18</sup> Huan quistejque Hazerot huan mochihuatoj ipan Ritma.

<sup>19</sup> Teipa quistejque Ritma huan mochihuatoj ipan Rimón Peres.

<sup>20</sup> Huan quistejque Rimón Peres huan mochihuatoj ipan Libna.

<sup>21</sup> Huan quistejque Libna huan mochihuatoj ipan Rissa.

<sup>22</sup> Huan quistejque Rissa huan mochihuatoj ipan Ceelata.

<sup>23</sup> Teipa quistejque Ceelata huan mochihuatoj ipan nopa tepetl Sefer.

<sup>24</sup> Huan quistejque campa nopa tepetl Sefer huan mochihuatoj ipan Harada.

<sup>25</sup> Huan quistejque Harada huan mochihuatoj ipan Macelot.

<sup>26</sup> Teipa quistejque Macelot huan mochihuatoj ipan Tahat.

<sup>27</sup> Huan quistejque Tahat huan mochihuatoj ipan Tara.

<sup>28</sup> Teipa quistejque Tara huan mochihuatoj ipan Mitca.

<sup>29</sup> Huan quistejque Mitca huan mochihuatoj ipan Hasmona.

<sup>30</sup> Huan quistejque Hasmona huan mochihuatoj ipan Moserot.

<sup>31</sup> Huan quistejque Moserot huan mochihuatoj ipan Bene Jaacán.

<sup>32</sup> Huan quistejque Bene Jaacán huan mochihuatoj ipan Hor ipan tlali Gidgad.

<sup>33</sup> Huan quistejque Hor ipan tlali Gidgad huan mochihuatoj ipan Jotbata.

<sup>34</sup> Huan quistejque Jotbata huan mochihuatoj ipan Abrona.

<sup>35</sup> Huan quistejque Abrona huan mochihuatoj ipan Ezión Geber.

<sup>36</sup> Huan quistejque Ezión Geber huan mochihuatoj ipan huactoc tlali tlen Zin campa Cades.

<sup>37</sup> Huan quistejque Cades huan mochihuatoj ipan nopa tepetl Hor campa monepantía nopa tlali Edom.

<sup>38</sup> Huan quen TOTECO quinahuati ma quichihua, tlejcoc nopa totajtzi Aarón ipan ne tepetl Hor huan nopona mijqui ipan nopa achtihui tonal ipan nopa macuipá metztli ipan nopa israelita calendario [33:38 Ni tonal eltoc ipan julio ipan tocalendario tlen ama.], quema ya quipiyayaya 40 xihuitl para quistoyaj ipan tlali Egipcio. <sup>39</sup> Huan quema Aarón mijqui ipan nopa tepetl Hor, quipiyayaya 123 xihuitl.

<sup>40</sup> Huan Tlanahuatijquetl Arad catli itztoya ipan nopa huactoc tlali Neguev ipan tlali Canaán quicajqui para ajsitihuayayaj nopa israelitame.

<sup>41</sup> Huan nopa israelitame quistejque tepetl Hor huan mochihuatoj ipan Zalmona.

<sup>42</sup> Huan quistejque Zalmona huan mochihuatoj ipan Punón.

<sup>43</sup> Huan quistejque Punón huan mochihuatoj ipan Obot.

<sup>44</sup> Huan quistejque Obot huan mochihuatoj ipan Ije Abarim campa monepantía ica tlali Moab.

<sup>45</sup> Huan quistejque Ije Abarim huan mochihuatoj ipan Dibón Gad.

<sup>46</sup> Huan quistejque Dibón Gad huan mochihuatoj ipan Almón Diblataim.

<sup>47</sup> Huan quistejque Almón Diblataim huan mochihuatoj ipan nopa tepeme tlen Abarim catli mocahua más nechca campa hualquisa tonati tlen Nebo.

<sup>48</sup> Huan quistejque nopa tepeme tlen Abarim huan mochihuatoj ipan nopa tlamayamitl ipan tlali Moab nechca nopa hueyatl Jordán, huan iixmelac altepetl Jericó catli mocajqui ipan seyoc nali.   <sup>49</sup> Huan quiquetzque ininyoyoncalhua nechca hueyatl Jordán ipan nopa tlamayamitl tlen tlali Moab, huan ininchajchaj pejqui campa Bet Jesimot huan ajsic hasta Abel Sitim.

### *Quenicatza ma momajmacaca tlali Canaán*

<sup>50</sup> Ipan nopa tlamayamitl ipan tlali Moab nechca hueyatl Jordán, iixmelac altepetl Jericó, TOTECO quicamanalhui Moisés huan quiilhui:

<sup>51</sup> “Xiquinilhui nopa israelitame ya ni: Quema anquixcotonase ni hueyatl Jordán huan ancalaquise ipan tlali Canaán,  
<sup>52</sup> xiquinmictica nochí catli itztoque ipan nopa tlali. Xiquinsosolhuilica nochí inindioses masque quichijtoque tlen tetl, o quitejtejtzontoque tlen

tepostli. Nochi inintlaixcopincayohua huan intiotzitzi xiquinsosolhuilica huan nojquiya xijssosoloca nochitlaixpamitl campa tlacajcahuaj ipan tepeme. <sup>53</sup> Ximocuilica nopa tlali huan nopona ximochantica para anitztose, pampa na nimechmactilia para elis amoaxca. <sup>54</sup> Pero monequi ximomajmacaca nopa tlali ica sorteo quen imiyaca imasehualhua ipan sesen hueyi familia. Nopa huejhueyi familias ica más miyac tlacame quichihuase se sorteo para nopa tlalme catli achi hueyi, huan nopa huejhueyi familias catli amo quipiya más miyaqui tlacame quichihuase sorteo para nopa tlalme catli amo más hueyi. Huan ijquiyampa, nopa sorteo quinextis para elis iaxca se familia, ya nopa elis iaxca.

<sup>55</sup> “Pero sintla amo anquintlamimictise catli ama itztoque ipan nopa tlali, catli anquincahuilise ma mocahuaca tlahuel amechcuesolmacase quen se cuatejtli catli calaqui ipan amoixteyol o quen se huitzli catli calaqui ipan amotlacayo. Huan miyac antlaijiyohuise ipan nopa tlali catli nimechmaca. <sup>56</sup> Huan na nimechtlatzacuiltis amojuanti quen nimoilhuiyaya niquntlatzacuiltis inijuanti.”

## 34

*Campa monepantía nopa tlali catli moaxcatise*

<sup>1</sup> Huan nojquiya TOTECO quiilhui Moisés:

<sup>2</sup> “Nojquiya xiquinmaca ni tlanahuatilme nopa israelitame: Quema ancalactose ipan tlali Canaán catli nimechmacas para amoaxca, ya ni nopa tlalme catli ihuaya anmonepantise.

<sup>3</sup> “Ica sur anmonepantise ica nopa huactoc tlali Zin nechca nopa tlali Edom. Inepa amotlal pehuas ica campa hualquisa tonati tlen nopa Hueyi Atl Mictoc, <sup>4</sup> huan yajtiyas para sur hasta nopa tlaxtlejcolis catli itoca Acrabim. Huan panos ipan nopa huactoc tlali Zin huan ajsis hasta campa Cades Barnea. Teipa panos campa Hasaradar hasta Asmón, <sup>5</sup> huan tlen Asmón quitoquilis nopa atlajtli catli monepantía ica tlali Egipio huan quitoquilijtiyas hasta norte campa nopa Hueyi Atl Mediterráneo.

<sup>6</sup> “Huan ica campa huetzi tonati anmonepantise ica nopa Hueyi Atl Mediterráneo.

<sup>7</sup> “Huan nopa nepamitl para amotlal ica norte pehuas ica nopa Hueyi Atl Mediterráneo huan yajtiyas xitlahuac para campa hualquisa tonati hasta ajsis campa nopa tepetl Hor. <sup>8</sup> Huan teipa tlen tepetl Hor yas hasta Lebo Hamat, huan teipa hasta Zedad. <sup>9</sup> Teipa tlen Zedad yas hasta Zifrón huan tlamic ipan Hazar Enán. Ya ni elis nopa nepamitl tlen amotlal ica norte.

<sup>10</sup> “Huan nopa nepamitl tlen amotlal ica campa hualquisa tonati, pehuas ipan Hazar Enán huan yas hasta Sefam. <sup>11</sup> Huan tlen Sefam inepa amotlal yas hasta Ribla achi más para campa hualquisa tonati tlen Aín. Huan tlen Aín temos hasta inaliyo campa hualquisa tonati ipan nopa Hueyi Atl Cineret. <sup>12</sup> Huan quitoquilis nopa hueyatl Jordán hasta itlamiya nopa Hueyi Atl catli itoca Mictoc.

“Nochi ya ni elis nopa nepamitl catli quiyahualohua amotlal.”

*Quenicatza ma moxelhuilica nopa tlali*

<sup>13</sup> Huan Moisés quinmacac nopa israelitame ni tlanahuatili:

“Huajca ya ni nopa tlali catli anmomajmacase ica sorteo quen TOTECO technahuatijtoc. Huan quiselise nochí nopa chicnahui huejhueyi familias huan tlajco catli mocajtoque. <sup>14</sup> Pampa nopa huejhueyi familias Rubén ihuaya Gad huan nopa tlajco hueyi familia Manasés ya mocuilijtoque inintlal catli quintocarohua, <sup>15</sup> ipan ni nali tlen hueyatlı Jordán. Inintlal mocahua achi más para campa hualquisa tonati tlen altepetl Jericó catli eltoc iixmelac ipan seyoc nali ni hueyatlı.”

<sup>16</sup> Huan TOTECO quicamanalhui Moisés huan quilhui:

<sup>17</sup> “Para temajmacase nopa tlali niquintlapejpenijtoc Eleazar nopa totajtzi huan Josué, icone Nun. <sup>18</sup> Pero nojquiya ma quinpalehuica se tlayacanquetl ipan sesen hueyi familia. <sup>19-28</sup> Huajca nica eltoc inintoca sesen tlayacanquetl tlen sesen hueyi familia catli quinpalehuise:

Familia, Tlayacanquetl  
 Judá, Caleb, icone Jefone  
 Simeón, Semuel, icone Amiud  
 Benjamín, Elidad, icone Quislón  
 Dan, Buqui, icone Jogli  
 Manasés icone José, Haniel, icone Efod  
 Efraín icone José, Kemuel, icone Siftán  
 Zabulón, Elizafán, icone Parnac  
 Isacar, Paltiel, icone Azán  
 Aser, Ahiud, icone Selomi  
 Neftalí, Pedael, icone Amiud

<sup>29</sup> Huajca ya ni eltoc nopa tlacame catli TOTECO quintequimacac ma quinzelhuilica nopa tlali Canaán nopa israelitame.”

## 35

### *Altepeme catli levitame quiselise*

<sup>1</sup> Huan quema nopa israelitame noja itztoyaj ipan nopa tlamayamitl ipan tlali Moab nechca hueyatl Jordán huan iixmelac altepetl Jericó, TOTECO quicamanalhui Moisés huan quiilhui:

<sup>2</sup> “Xiquinnahuati israelitame para sesen hueyi familia monequi quiquixtise sequin altepeme ipan nopa tlali catli quiselise para quinmacase levitame para ipan itztose. Nojquiya ma quinmacaca potreros campa sacayo catli quiyahualohua nopa altepeme.

<sup>3</sup> Quej nopa levitame quipiyase campa itztose, huan quipiyase sacatl para inihuacaxhua huan ininborregojhua. <sup>4</sup> Nopa potreros catli anquinmacase monequi yas 450 metros tlen sese inacastla nopa tepamitl catli quiyahualohua sese altepetl. <sup>5</sup> Nochi nopa potrero catli quiyahualohua se altepetl elis cuadradojtic huan quipiyas 900 metros más hueyi ipan sesen lado tlen imiyaca metros catli quipiya nopa tepamitl catli quiyahualohua nopa altepetl ipan nopa lado. Huan nopa altepetl mocahuas tlatlajco, huan nopa potreros campa quintlacualtise inintlapiyalhua, nochiyahaultic.

*Altepeme para ipan momanahuise catli temictijtoque*

**6** “Anquinmacase levitame 42 altepeme huan iyoca anquinmacase chicuase altepeme catli monequi xijtocaxtica: ‘altepeme campa hueli momanahuise’. Huan nopona ipan nopa chicuase altepeme, huelis cholos se masehuali catli quimictijtos se acajya. **7** Huajca ica nochí monequi xiquinmacaca 48 altepeme, sese ica ipotreros para inintlapiyalhua. **8** Huan ni inialtepehua levitame monequi anquinquixtilise tlen inintial nochí huejhueyi familias campa hueli. Huan nopa huejhueyi familias ica inintlal catli hueyi quinmacase más altepeme nopa levitame, huan nopa huejhueyi familias catli achi tziquitetzi inintial amo miyac altepeme quinmacase.”

### *Altepeme campa hueli momanahuise*

**9** Huan TOTECO nojquiya quiilhui Moisés:

**10** “Xiquinilhui nopa israelitame ya ni: ‘Quema anquiixtonase nopa hueyatl Jordán huan ancalaque ipan tlali Canaán, **11** monequi anquitlapejpenise chicuase “altepeme campa hueli momanahuise” campa huelis calaquití para momanahuis se catli temictijtoc masque amo quinequiyaya. **12** Huan nopona amo huelis quicuepilis iteiximatca nopa mijcatzi catli quitocarohua para momacuepas ica catli quichijtoc. Quej nopa se catli temictis amo miquis hasta hueli monextis iniixpa jueces huan masehualme para quinilhuis catli oncac. **13** Huan quej ni anquiniyocatlalise altepeme campa tlacame momanahuise: Xijtlapejpenica eyi altepeme ipan ni lado hueyatl Jordán campa más nechca campa hualquisa tonati. **14** Huan ne se eyi

altepeme anquitlapejpenise ipan ne seyoc lado hueyatl Jordán ipan tlali Canaán. <sup>15</sup> Huan nopa chicuase altepeme elis campa momanahuise huan motlatise nochí israelitame huan sequinoc tlali ehuani catli itztoque amohuaya quema quimictise se acajya, pero amo quichijque ica ininyolo o amo quinequiyayaj.

<sup>16</sup> “Pero sintla se acajya quimaquilis seyoc ica se tepestli huan nopa catli quicocojtoc miquis, huajca nopa tlacatl nelía se temictijquetl huan quena, nopa temictijquetl quipiya para anquimictise.

<sup>17</sup> “O sintla se acajya quimaquilis seyoc ica tetl huan nopa masehuali miquis, huajca yaya se temictijquetl, huan quipiya para anquimictise.

<sup>18</sup> “O sintla se acajya quimaquilis seyoc ica cuahuitl huan nopa masehuali ica ya nopa miquis, huajca yaya catli temaquili, se temictijquetl huan monequi anquimictise. <sup>19</sup> Iteiximatca nopa mijcatzi catli quitocarohua momacuepas quipiya para quimictis quema quipantis.

<sup>20</sup> “Huan sintla se acajya quiojchiyayaya ma panos huan quicuatopehua o quimajcahuilía se tlenijqui seyoc san pampa quicualancaita, o san pampa quinequi cualantli huan ne tlacatl miquis, huajca yaya se temictijquetl. <sup>21</sup> O masque se quimaquilis seyoc pampa mocualanijtoque huan amo tleno quihuica imaco, sintla ya miquis, huajca catli tecoco quipiya para miquis pampa mochijtoc se temictijquetl. Huan monequi iteiximatca nopa mijcatzi ma momacuepas quema quipantis huan quimictis.

<sup>22</sup> “ ‘Pero sintla se acajya quicuatopejqui seyoc catli amo ihuaya cualaniyaya, o sintla quicuamajcahuili se tlenijqui, pero amo pampa quichiyayaya ma pano, ya nopa amo san se.

<sup>23</sup> O sintla amo quicualancaitayaya, niyon amo quichiyayaya quicocos, huan huetzis tlen imaco se tlenijqui ica catli miquis se acajya, huajca amo san se. <sup>24</sup> Sintla quej ni huan amo quicualancaitayaya, huajca monequi anisraelitame anmosentilise huan anquitlajtolsencahuase catli melahuac ica ya huan iteiximatca nopa mijcatzi. <sup>25</sup> Sintla anquikitaj para amo quinamiqui ma miquis catli tecocojtoc, huajca monequi anquimanahuise imaco iteiximatca ne mijcatzi, huan anquicahuilise ma mocahua ipan nopa altepetl tlen tlamanahuili. Huan ya ni nopa tlanahuatili catli monequi quitoquilise ipan se altepetl campa tlacame momanahuise. Catli tecocojtoc monequi nochipa itztos ipan nopa altepetl tlen tlamanahuili hasta miquis nopa hueyi totajtzi catli quitequilijtoc nopa aceite para quiyyocacahuas para TOTECO.

<sup>26</sup> Pero sintla nopa tlacatl catli temictijtoc quisas ipan nopa altepetl catli ipan momanahuía,

<sup>27</sup> huan iteiximatca nopa mijcatzi quipantis huan quimictis, huajca catli momacueptoc amo quihuicas tlajtlacoli pampa quimicti, pampa quisqui tlen nopa altepetl. <sup>28</sup> Pampa catli temictijtoc monequi senitztos ipan nopa altepetl campa tlacame momanahuise hasta miquis nopa hueyi totajtzi. Huan sintla mocahuas hasta miquis nopa hueyi totajtzi, huajca quena, huelis mocuepas ipan ichaj campa itlal.

**29** “ ‘Huan ya ni elis se tlanahuatili para anquitoquilise hasta amoixhuihua quipiyase iniixhuihua.

*Tlanahuatilme para ajqueya monequi anquimictise*

**30** “ Sintla se acajya quimictía seyoc huan itztoque masehualme catli quiitaque huan nechtestigojquetzase, niamotECO para nelia, huajca monequi anquimictise nopa temictijquetl. Pero sintla san se tlacatl tlatestigojquetza catli panoc, amo huelis anquimictise, pampa amo anquimatiq temachtli sintla yaya catli quimicti ne seyoc.

**31** “ ‘Nojquiya amo huelis anquiselilise itomi se tlacatl catli temachtli temictijtoc ica cualantli para moquixtis huan amo tleno ipantis. Sintla temachtli se temictijquetl, quipiya para miquis.

**32** “ ‘Nojquiya amo hueli anquiselilise itomi se catli monequi nochipa itztos ipan se altepetl campa tlacame momanahuise, huan anquicahuilise ma mocuepa ichaj quema ayamo miqui nopa hueyi totajtzi.

**33** “ ‘¡Amo! Monequi anquitoquilise nochí ni tlanahuatili para amo anquichihuase amo tlapajpactli nopa tlali huan anquicahuilise ma momahua catli amo cuali nopona. Pampa se catli temictía quichihua amo tlapajpactli nopa tlali huan quichihua ma tlamahua catli amo cuali ipan nopa tlali. Huan amo aqui hueli quipajpacas nopa tlali ica nopa estli catli quitoyajqui, sintla amo miquis nopa temictijquetl catli temicti ica cualantli.

**34** “ ‘Xipiyaca cuidado para amo xijchihuaca amo tlapajpactli nopa tlali campa anyase. Amo xijcahuaca ma tlamahua catli amo cuali. Pampa na,

niamoTECO, npona nojquiya nimocahuas para niitztos amohuaya.’ ”

## 36

### *Catli sihuame ma quiselica*

<sup>1</sup> Nochi tlayacanani tlen nopa familia Galaad, catli elqui icono Maquir, catli elqui icono Manasés, catli elqui icono José, yajque quiitatoj Moisés huan nopa israelita tlayacanani, huan quiilhuijque:

<sup>2</sup> —Moisés, TOTECO mitznahuati xijtlajcoita nopa tlali huan ica sorteo xiquinmajmaca sese israelita catli quitocaros para quiselis. Huan nojquiya TOTECO mitznahuati xijmaca nopa tlali catli quintocarohuayaya toicni Zelofehad iichpocahua pampa amo quinpixqui telpocame. <sup>3</sup> Pero sintla monamictise ica tlacame ipan sequinoc huejhueyi familias tlen tiisraelitame, nopa tlali catli quiselijque pampa itztoyaj ipan tohueyi familia Manasés, teipa elis iaxcahua nopa sequinoc huejhueyi familias catliihuaya monamictise. Quej nopa techcuilijtiyase tlen totlal catli techtocarojtoc ipan sorteo. <sup>4</sup> Pampa teipa quema ajsis nopa Xihuitl Quema Nochi Elis Nemajcahualli quema quinmajcahuase nochitetequipanohuani ipan tlali Israel, nopa tlali catli eltoya iniaxca tohueyi familia Manasés ayacmo elis toaxca huan mochihuas itlal seyoc hueyi familia catliihuaya monamictijtose.

<sup>5</sup> Huajca Moisés quitlajtlani TOTECO huan teipa quinyolmelajqui nochinopa israelitame catli TOTECO quinahuatijtoya. Quiijto:

—Ni tlacame ipan ni hueyi familia Manasés catli iconे José quipiyaj razón.<sup>6</sup> Huajca ya ni catli TOTECO tlanahuatía. Iichpocahua Zelofehad huelise monamictise ica catli quinequise, pero monequi ininhuehuejhua nojquiya hualase ipan nopa hueyi familia Manasés quen injuanti.<sup>7</sup> Quej nopa niyon se tlali catli quitocarohua se hueyi familia amo panos ipan seyoc hueyi familia. Pampa sesen hueyi familia tlen israelitame monequi mocahuase ica nopa tlali catli quitocarohua nopa hueyi familia para quiselis.<sup>8</sup> Huan quema se sihuatl ipan tlen hueli hueyi familia quitocarohua quiselis se tlali, quipiya monamictis ica se tlacatl catli huala ipan san se ihueyi familia. Huan yeca sesen israelita mocahuis catli quitocarojtoc tlen ya ihueyi familia para quiselis.<sup>9</sup> Quej nopa se tlali catli quiselis se hueyi familia para iaxca, amo panos ipan seyoc hueyi familia. Huan sesen hueyi familia tlen israelitame mocahuase ica nopa tlali catli ya quintocarojtoc.

<sup>10</sup> Huajca iichpocahua Zelofehad quichijque nochí catli TOTECO quinahuati Moisés.<sup>11</sup> Maala, Tirsa, Hogla, Milca huan Noa, iichpocahua Zelofehad, monamictijque ica inincone hua inintiojhua.<sup>12</sup> Huajca ininhuehuejhua nojquiya itztoyaj ipan nopa hueyi familia Manasés catli elqui iconе José huejcayja. Huan yeca nopa tlali catli quiselijque nopa ichpocame mocajqui ipan inintlal nopa hueyi familia Manasés campa monequiyaya.

<sup>13</sup> Huajca nochí ya ni nopa tlanahuatili huan tlamachtili catli TOTECO quinmacac israelitame ica Moisés campa nopa tlamayamitl ipan tlali Moab,

NÚMEROS 36:13

clxv

NÚMEROS 36:13

nechca hueyatl Jordán, huan iixmelac altepetl Jericó.

**Icamanal toteco; Santa Bíblia  
Bible without Deuterocanon in Nahuatl, Huasteca  
Occidental (MX:nhw:Nahuatl, Huasteca Occidental)**

copyright © 2005 Wycliffe Bible Translators, Inc.

Language: Nahuatl, Huasteca Occidental

Translation by: Wycliffe Bible Translators, Inc.

Náhuatl, Huasteca Occidental [nhw], Mexico

**Copyright Information**

© 2005, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The Bible without Deuterocanon**

in Nahuatl, Huasteca Occidental

**© 2005, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022  
0d0cfbfa-2c44-59e4-b00b-2ef5eb44b02d